

(欽定)平定七省方略

北京中國書店印行



THE HISTORY OF THE

THE HISTORY OF THE

THE HISTORY OF THE



欽定勦平捻匪方略卷二百二十六 乙丑年

二月初一日卯山東巡撫閻敬銘奏言據濟甯

州曹縣稟報正月十二日僧格林沁追賊至新

鄭縣十六日至尉氏縣賊蹤已竄至扶溝等語

臣以東豫接壤之區惟曹單最爲緊要卽調原

駐魚臺之參將王心安一營勇丁五百名原駐

嶧縣之參將宋延德一營勇丁五百名原駐觀

城之遊擊郭大勝一營勇丁五百名馳赴曹單
交界駐紮防堵適奉

諭旨指示復調原駐東昌之守備曹正榜一營勇丁
五百名併赴曹單厚集兵力嚴爲扼守並飛飭
沿邊州縣嚴籌防守鎮無恙已又數周同知劉
時霖一營及佐領塔克蘇堪馬隊回省如賊果
東犯卽飭前往濟甯與駐紮曹單各軍協力迎

勦毋令闖入至藩司丁寶楨於十五日卸任十
九日起程北上昨日於接奉

諭旨後當卽飛飭迅速折回俟其到省當再籌商一
切或飭該藩司帶兵出省或臣親身出省容俟
確探賊信相機辦理再行馳報奏入

上諭曰所調各營勇丁著迅速到防嚴密布置一面
飛飭各州縣妥籌防守鎮撫居民並多設偵探如

賊蹤竄近邊境卽飭各軍協力迎剿毋令闖入

初四日庚午張之萬奏言魯寶踞匪被剿西趨經

官軍節節擊敗復由魯山折竄東北僧格林沁
由襄城一路進軍抄擊臣督飭豫軍盡力會剿
該匪不敢屯紮悉由石固驛一帶北竄新鄭正
月十一日僧格林沁督軍追至新鄭縣境是晚
派總兵郭寶昌帶勇襲破賊營逆衆翻牆逃竄

我軍奮力掩殺斬馘多名餘匪棄壘而遁因大
軍跟追甚急遂由洧川東竄尉氏遊騎漸近汴
垣臣以省會空虛先期派知府湯聘珍率領所
部進紮省南關外賊知有備未敢進徧十三四
等日張曜所部副將周明崑周登高各率勇隊
由洧川追至尉氏縣之保全寨地方猝遇賊衆
大股周登高率勇抵敵斃賊三十餘人該匪疊

經我軍追剿全股由鄢陵一帶折而南趨十六日僧格林沁進軍尉氏十七日各軍跟蹤前進營總春壽等率馬隊先行參將蔣希夷亦由閒道帶步隊疾進與賊相距數里十八日黎明春壽蔣希夷等乘賊不備揮兵銳進擊破賊卡數處賊見官軍猝至紛紛竄走我軍從後追截陣斬悍賊甚多及僧格林沁大隊到齊探知賊蹤

不遠復令各隊過河追擊乃援賊馬步蠡擁而
來前竄之賊回身復鬪我軍馬隊更番衝擊逆
衆抵死不退愈聚愈衆馬隊爲賊所乘幸宋慶
張曜所部趕將營盤築定會合郭寶昌步隊憑
壘迎擊始將賊衆壓退二十一二等日該匪悉
由臨潁郟城等屬循熟南趨擾至西平攻撲縣
城經署知縣金福楸礮斃白旗賊目賊乃沿洪

河奔竄僧格林沁駐軍鄆陵因馬隊轉戰日久
兵力疲乏亟須休息再圖進剿其張曜宋慶各
軍已由鄆城一帶跟蹤追擊臣查該匪本有東
歸潁亳之意今既乘隙鋌走未敢復回故巢則
遊魂爲變其勢將成流竄此時僧格林沁所部
馬隊旣因奔馳日久須稍事休息以資整頓臣
已函商該大臣先令豫軍躡蹤追剿一面飛飭

張曜宋慶等視賊所向探蹤疾追急擊勿失至
汝南各寨伏莽初平未便再令驚擾臣已函囑
毛昶熙就現有兵力擇要布置並飛檄各地方
官嚴爲之備惟該匪竄突靡定一經官軍邀擊
難保不乘虛回竄北面之防仍形緊要已飛飭
省中司道加意嚴防臣於二十二日由葉縣進
紮襄城現仍確探賊蹤何處喫重卽刻移營前

進相機策應

張之萬又奏言接奉

諭旨飭令帶兵回顧省城 臣遵卽由襄城取道回省
督同司道將省防一切事宜妥爲布置以期有
備無患一面飛飭張曜等星夜進兵抄前截擊
勿令寇蹤蔓擾 臣一俟布置就緒仍當審度緩
急何處喫緊卽行移軍進紮督飭各軍盡力勦

辦以保巖疆

同日山西道監察御史賈鐸奏言 臣籍隸河南
世居固始稔知安徽六霍一帶爲皖豫楚三省
交界之區向係捻匪出沒之所近聞苗逆伏誅
後其餘匪竄入六安等處夥黨甚衆或潛匿山
陬或寄居鎮市夜閒草竊白晝行搶常爲地方
之害其尤甚者麻埠鎮有趙傳經混名趙大元

帥仙人洞有王濤王枝王濤混名王金狗桃灣
地有武汶彬混名小太保青龍灣有蒯汶通俱
係著名逆黨怙惡不悛並聞麻埠鎮有地主教
教首江智芒副教首趙傳曾均係霍山縣人於
去年九月十三日勾通苗黨趙傳經等做會燒
香聚衆斂錢蓋有地主宮傳教入會者已多至
數千人晝散夜聚形蹤詭祕似此捻教各匪勾

結生事若不及早翦除恐大兵凱撤仍復糾衆
倡亂爲禍更不可測可否請

旨飭下安徽撫臣喬松年派員撥兵馳赴六安州麻
埠鎮等處嚴密查拏兜勦淨盡並將地主官拆
毀以絕根株庶不致養癰貽害均奏入

上命議政王軍機大臣傳諭僧格林沁官文喬松年
張之萬劉蓉吳昌壽毛昶熙曰張之萬奏賊匪由

洧川東竄尉氏經僧格林沁督軍擊敗遂由臨潁
郟城一帶循熟南趨擾至西平沿河奔竄髮捻合
而爲一人數衆多乘隙鋌走若不合楚豫皖三省
之力聚而殲旃勢將此勦彼竄流毒無所底止著
張之萬飭張曜宋慶等軍視賊所向探蹤疾追急
擊勿失僧格林沁駐軍鄆陵整頓馬步著卽拊循
激勵以作士氣一面催提詹啟綸黃秉忠兩軍迅

速到豫俟兵力厚集由該大臣酌量調遣務當穩
慎進攻謀定後戰盡殄賊氛官文前有合兵會剿
及派成大吉江長貴周有全等分軍扼守要隘之
奏此時賊蹤漸近楚疆成大吉一軍前已令赴豫
省卽著官文飭該提督等偵探賊蹤迎頭截擊其
從前派定守兵並著調令出境攔剿以收兩面夾
擊之效儻賊蹤日趨日近卽著官文留省居守吳

昌壽出省督兵以期呼應靈通不致貽誤軍事類
毫一帶爲捻匪故巢尤須嚴防回竄仍著喬松年
督飭英翰等軍嚴密防守並酌撥勁兵會合楚豫
官軍三面兜剿毋得稍有疏虞汝甯伏莽未清此
時賊蹤已至西平偪近汝郡深恐勾結蔓延益難
收拾毛昶熙務當督飭兵團認真堵截不得縱賊
南行致干咎戾張之萬現已回省著將省防布置

妥協仍偵探賊蹤出省督兵勦賊以保巖疆荆子
關姜玉順一軍前已有旨飭令赴豫歸僧格林沁
調遣現雖賊勢南趨而商雒一帶防守尤不可稍
涉空虛著劉蓉督飭在防各營嚴密扼守不得因
賊氛稍遠遂形懈弛據御史賈鐸奏苗逆伏誅後
餘匪竄入六安等處夥黨甚衆麻埠鎮有趙傳經
等尤爲著名逆黨並聞麻埠鎮有地主教教首江

智芒等均係霍山縣人勾通苗黨趙傳經等做會聚衆蓋有地主宮傳教入會者已數千人請飭查拏等語苗黨趙傳經等以漏網餘生膽敢糾衆釀亂怙惡不悛現在出沒六霍一帶若不及早翦除深恐餘燼復熾著喬松年迅卽派兵馳赴六安州麻埠鎮等處按照該御史所指各匪犯嚴密查拏兜剿淨盡並將地主宮拆毀以絕根株該處偏近

光固一帶儻匪徒被擊西竄難保不闌入豫疆現
在捻衆駸駸南趨尤慮與固始匪徒勾合致勦辦
又形棘手著張之萬嚴飭光固等處防兵並各該
地方文武各官認真緝捕有犯必獲以靖餘孽

初五日 辛未 劉長佑奏言欽奉

諭旨以逆匪擾及尉氏飭令嚴防邊境遵卽飛飭大
名鎮總兵姜國仲大順廣道范梁酌調標兵暨

防河練勇先赴毗連豫東沿河地方擇要防堵
一面商同省局司道豫調勁兵精選壯勇藉資
策應並一面統籌餉糈修繕軍械以備急需旋
據范梁等會稟探得河南鄭州中牟一帶均有
賊蹤現飭沿河州縣將南岸船隻提回北岸一
面趕緊集團分赴河岸扼要巡防並由營派撥
官兵在彼駐紮互相應援仍多派偵役確探賊

蹤如果竄近直境卽當隨時飛報相機堵剿等
情臣查此起擒匪雖係敗殘之餘實多兇悍死
黨一經追剿難保不分股狂奔而黃河東北地
勢平衍一經闖入深恐防不勝防連日接據探
報該匪被剿東奔西突尙無定蹤並聞宋逆憬
詩亦在其內該匪狡猾異常誠如

聖諭恐有餘匪入境勾結尤爲直東兩省隱患臣已

嚴飭大名鎮道督飭員弁兵勇嚴密查拏餘匪
以杜勾結臣察看情形該匪如有窺渡之意卽
當親督各起兵勇馳往策應期與僧格林沁追
兵前後夾擊務殄餘孽以慰

宸廑奏入

上命議政王軍機大臣傳諭劉長佑曰劉長佑奏籌
防豫捻情形所辦尙爲周妥著飭大名鎮道勤加

偵探嚴密防範毋令匪蹤竄入該督仍隨時體察
軍情相機辦理

同日富明阿奏言臣欽奉

諭旨飭催詹啟綸一軍迅速抵豫查詹啟綸帶勇二
千名於正月初十十一兩日均已分起起程因
沿途雨雪過甚軍行維艱行抵清江適漕督吳
棠准親王僧格林沁咨有暫緩徵調之說該總

兵據札請示臣卽飭令暫駐清江恭候

聖諭再定行止今奉

廷寄知逆匪回竄魯山勢甚猖獗卽派員馳赴清江催詹啟綸剋日督帶所部星夜赴豫毋稍延緩並令探賊所向迎頭截擊勿使該逆蔓延奏
入報

聞

初六日 壬申 喬松年奏言 臣欽奉

諭旨以豫賊竄向東南飭將潁亳邊防妥籌堵禦 臣
前奏請回安慶省城因恭候

諭旨尙未起程旋據探報僧格林沁大勝之後又復
小挫賊勢蔓延於陳州許州之間漸有東竄之
勢 臣前料賊匪萬一回竄必犯潁州是以先將
英翰一軍調防潁州其所部黃秉忠四營 臣仍

飭其入豫助剿已於正月十九日拔隊由陳州
前進以剿爲防英翰統帶所部早到潁州獨當
一面可期得力臣尙慮亳州蒙城稍覺空虛已
調原駐廬州之總兵黃鳴鐸帶領所部往防亳
州又派總兵李南華帶領所部往防蒙城該兩
員皆蒙城人久著戰功於地方情形熟悉並飭
會同地方官將團練妥爲整頓以期兵民一氣

聯絡防守皖防似尙周密 臣仍稍緩回省儻賊
蹤果近 臣卽督飭諸軍奮力截剿以期盡殲醜
類奏入

上諭曰據奏布置情形尙屬周妥昨據張之萬奏報
賊蹤已至西平如果竄近皖疆該撫卽督飭英翰
等軍奮力截剿盡殲醜類毋令闖入

初九日 乙亥 官文奏言鄂居天下之中頻年鄰氛

環偪籌勦籌防屢煩兵力同治二年八月亳捻
張總愚程二老砍等闖入棗陽嗣皖捻王廷幹
張勾等勾結豫南汝正新息各匪並苗逆餘黨
苗添罄於是年十二月繞越應城三關由信陽
桐柏闖入隨州其時隨棗則陳大禧並皖匪大
股鄖西則藍二順大股忽分忽合東擊西竄迨
漢中之賊分道東趨號稱數十萬自與捻股勾

合狼狽爲奸焚殺擄掠腹地蔓延人心惴惴臣
於上年四月出省督師審度戰守力堵要隘兼
施勦撫半年以來殺斃解散之外楚軍各營及
僧格林沁軍營先後收降者不下二十萬衆於
是陳得才自盡藍城春伏誅逆黨瓦解力絕計
窮無能爲役然自上年二月由隨棗襄樊互延
千餘里接踵奔突下至蘄水蘄州黃梅廣濟直

侵英霍宿太十月內經官軍擊敗張總愚陳大
禧賴汝洸等二萬餘衆復由羅麻黃孝狂奔隨
棗襄樊所過郡縣不下一二十處賊情詭譎變
詐萬端而官軍之轉戰亦艱危備歷仰賴

聖主洪福武漢奠安省外郡縣未陷一城上游堵剿
嚴密金陵旋即克復不至掣動大局東南數省
克期大定該匪北竄之後臣即派常星阿等馬

步各隊隨同僧格林沁出境剿賊鄂省各要隘
則派成大吉駐紮德隨李成謀扼紮襄樊周鳳
山扼紮應山梁作楫會同水師張啟基等防守
老河口周有全防剿鄖陽力顧鄂邊遏賊回竄
現接僧格林沁來咨髮捻各逆前由鄧州竄至
寶豐縣至西梁窪地方經馬步各軍偪賊紮營
疊有斬擒十二月二十一日復獲大勝斃賊二

三千名解散甚夥二十二日官軍追至魯山殺斃解散尤多賊之馬步僅存數千惟該逆避兵奔竄又由宜陽縣南白楊樹地方折向西南有復竄朱陽關南趨之勢臣飛飭姜玉順馳赴荆子關扼勦添派梁洪勝所部同往扼紮其毗連之老河口襄樊一帶又經臣照會成大吉全軍仍駐襄陽之八條岡令李成謀移紮隨州

復派提督余文科暫統飛虎各營駐守呂堰驛
以資兼顧至蔣凝學一軍前飭由商城取道馳
赴商南相機迎剿茲因西路空虛又飭該道馳
赴荆子關一帶先顧西秦門戶俟陝西情形稍
鬆再行赴甘援剿似此面面有兵該逆釜底游
魂無難盡數殄滅查湖北軍務賊數以此次爲
最多而諸將士自冬徂夏復自夏至冬冒暑衝

寒血戰千餘里亦惟此次爲最久現當楚省肅
清未便沒其微勞查常星阿富森保等被衆後
或派在前敵出境追剿或防堵要隘深知愧奮
除常星阿蘇倫保温德勒克西業經僧格林沁
奏請開復並

賞還勇號所有富森保楊朝林藍斯明姜玉順梁洪
勝相應請

旨一併開復原參處分

賞還勇號並

賞還周鳳山花翎俸知感激奮興迅圖滅此窮寇其

餘水陸員弁勇丁及隨營各員暨地方員弁紳士團練可否由臣擇其尤爲出力者覈實酌保以示鼓勵並查明陣亡人員請卹之處出自

逾格天恩奏入

上命議政王軍機大臣傳諭官文曰據官文奏稱副都統富森保等或出境追剿或防堵要隘用能肅清楚境尙知愧奮富森保楊朝林藍斯明姜玉順梁洪勝均著開復原叅處分賞還勇號周鳳山著賞還花翎以示鼓勵惟髮捻各匪竄擾楚境時官文以欽差大臣出省督剿屢經嚴諭務將股匪就地殲除不准旁竄他省官文覆奏時亦曾以此自

任乃紙上空談竟無實際在事文武僅欲以驅逐
出境了事以致竄楚之賊長驅入豫現賊蹤已及
西平難保不再行回竄該大臣何得因楚省肅清
遂謂已竟全功鋪張其詞爲將士乞恩保獎所有
上年勦匪尤爲出力各員暨陣亡員弁著官文先
行存記俟此股髮捻匪衆悉數殄除再由官文奏
請分別獎卹

十九日乙酉張之萬奏言臣於正月二十九日由

襄城拔隊起程馳至鄢陵會商僧格林沁飛飭

張曜宋慶等各率所部星夜進軍視賊所向急

擊勿失臣遂於二月初二日馳回省城連日接

據探報逆眾盤旋於西平境內數日二十三日

副將徐邦道帶隊追至偵知近城十里外賊卡

林立卽於是晚前往劫營該匪不意我軍猝至

棄卡逃遁我軍追殺十餘里頗有斬獲二十四日該副將復整隊往追行十餘里遇賊大股兵單未能深入相持至晚而退該匪知官軍日近悉由郟城上蔡遂平交界之五溝營黃埠等處南竄沿途焚掠裹脅其氛甚惡二十六七日該匪擾至汝陽縣境攻破金鄉寨裹脅丁壯而去二十八日竄至汝郡東北復誘破唐營萬家

兩小寨是晚該匪遣悍黨數百潛伏於汝郡城東意欲乘隙攻襲經臣毛永熙督率地方文武及臣營留汝各員布置城守嚴爲之備賊不敢偪亦卽潛退刻下賊蹤肆蔓於正陽息縣新蔡之交訊據獲賊供稱有由信陽竄往楚省之說現徐邦道一軍及張曜宋慶湯聘珍等軍均已到汝相機剿擊臣查汝東各寨伏莽初平近因

雨雪日久寒牆類多坍塌人心未能自固此時
寇蹤逼近萬一勾結煽惑又恐滋蔓難圖臣甫
經抵省卽星夜南行已恐鞭長莫及毛昶熙留
駐汝郡現兵不過千人亦難資以堵勦所恃張
曜宋慶等軍業經抵汝且僧格林沁亦於本月
初八日自鄆陵拔營前進逆匪懾於聲威斷不
敢蔓延久踞臣一面嚴飭地方官吏固守城寨

一、面飛催張曜等統率豫軍相機前進盡力剿擊。如果賊竄楚疆仍卽追剿出境並先期飛咨鄂省趕緊派兵迎截與僧格林沁大軍會合痛剿殲此窮寇。臣在營日久省中防務及應辦公事亟須整頓此番旋省該司道等逐日稟商事件日不暇給現在趕緊料理一有就緒卽日出省督軍剿賊。

張之萬又奏言 臣奉

旨回顧省防根本重地守禦不可不備查養勇不如
練兵擬將 臣標三營兵丁儘數挑選簡練軍實
派員管帶日夕訓練俾成勁旅無事則駐省操
練有事則登陴防守以備不虞而杜窺伺至省
會城垣尙稱堅固惟城外四圍地盡浮沙風力
稍勁挾而飛走填壓外濠堆積城根形如陂陀

雖屢經剗空而旋挑旋積漸積漸高臣旋省後
周視城垣見西北一帶積沙尤甚其高處幾平
雉堞可履而登萬一賊蹤竄近誠爲可慮現臣
派員勘估籌畫經費雇募民夫晝夜挑空務使
淨盡此外一切防守之具亦經督率司道趕緊
布置務期嚴密周備以仰副

聖主綏靖中原至意

張之萬又奏言以地方疆吏受

命督師掃蕩賊氛是臣專責乃自抵任以來帶兵出
省已閱三年雖兩次肅清淮蔡而遇此髮捻合
竄未能迅行

天討日久無功咎無可道若復恃有僧格林沁在豫
任賊狂竄蔓延則臣罪戾滋深具有天良何敢
出此惟查臣部步隊本有三十餘營合之吉林

黑龍江馬隊共有馬步一萬餘人以兵力計之
原可與僧格林沁相輔而行用收夾擊之效自
上年賊竄馬山口後所有各營馬步均歸僧格
林沁調遣此後臣由南陽移紮汝郡復由汝郡
移紮葉縣襄城止有親軍數百人隸臣左右此
外如張曜宋慶湯聘珍等各隊均經僧格林沁
派令追賊出境經年累月始得接見各營將領

一次是臣有勦賊之責而無勦賊之權況臣到任卽帶兵出省與兩司相見之日絕少遇有公事僅恃書函千里內外往返需時一切用人行政或函商已定則必憚於更端批札稍遲將別滋夫疑竇兩司與臣皆係積年京秩驟膺外任於地方情狀本屬未能周知非朝夕接見悉心講求何以令行政舉此臣久不在省於地方公

事不能整頓之實在情形也假令臣所部兵力
尙足辦賊自應專心兵事俟寇氛掃蕩再爲整
頓地方現在髮捻各股愈聚愈衆臣部親軍數
百人外更無兵將足資調遣臣名爲出省帶兵
實則隨僧格林沁之後奉行

欽差大臣文書而已儻臣果欲出號施令或與僧格
林沁意見相左則前敵將領何所稟承是則非

徒無益又將有損於軍事 臣斷不敢鹵莽至此
或謂 臣不出省則僧格林沁後路無人一切車
馬草料米麪必致呼應不靈此非所慮也大抵
文員之畏軍令甚於畏叅革此時僧軍所需羽
書一至咄嗟立辦並無貽誤之處固無俟乎撫
臣之督催也軍務地方均屬

朝廷公事 臣出省實與軍務無裨而地方公事因

之積壓不少此次到省據藩司蘇廷魁臬司王
正誼等屢以爲言勸臣奏請在省暫駐伏惟臣
子萬不得已之衷非極艱難不敢直陳於

君父至地方一切應辦公事苟有補救亦可仰答夫
生成臣應否留省之處未敢擅便伏候

聖裁奏入

上命議政王軍機大臣傳諭僧格林沁官文喬松年

張之萬毛昶熙吳昌壽曰張之萬奏逆衆盤旋西
平境內數日副將徐邦道等追至潛往劫營賊棄
卡遁官軍追殺頗有斬獲該匪遂由郟城上蔡遂
平交界之五溝營黃埠等處南竄沿途攻破民寨
裹脅丁壯其氛甚惡二十八日竄至汝郡潛伏城
東欲圖攻襲經毛昶熙督率地方文武嚴爲戒備
刻下賊蹤肆蔓於正陽息縣新蔡之交訊據獲賊

供稱有由信陽竄往楚省之說徐邦道及張曜宋慶等軍均已到汝僧格林沁亦已自鄆陵拔營前進著卽督飭馬步各軍奮力痛剿該匪懾於聲威自必南趨楚境當豫計其必由之路先行派兵在彼多設埋伏或於山深林密之處多設旌旗以爲疑兵使賊不敢竄近山谷如其入山負嶠不妨率隊圍困使不得再出滋擾著該親王相機妥籌辦

理僧格林沁忠勇性成急於滅賊而於該匪狡詐
百出之處或非意料所及上兵伐謀須令人不可
測度未可一意跟追再墮狡計近日軍情賊勢並
須趕緊馳奏以慰懸繫正息等處距光羅不遠前
諭如賊氛竄近楚省令官文在省守禦吳昌壽出
省督勦此股賊匪游魂無定必將擾及楚邊著吳
昌壽卽行調集勁旅剋日出省擇要防勦攔頭夾

擊以期速殄狂氛潁州密邇寇蹤遠防不如近剿
著喬松年卽行移紮潁州一帶親督英翰等所部
各隊嚴密防堵其駐防皖境之劉銘傳等軍卽著
飭令整頓隊伍移營前進如賊氛竄近光固該提
督等卽可出境攔截痛加殲剿不可以有用之兵
株守本境詹啟綸勇隊已到何處著僧格林沁嚴
行催提到汝責令隨剿勿任沿途逗留總之此股

賊匪東奔西突大爲腹地之患必須喬松年吳昌
壽親督皖楚在防各軍出省與僧格林沁之軍會
合一處前截後追方能制其死命該撫等惟當嚴
飭將士等不可稍有畛域之見致成不了之局汝
甯防務緊要毛昶熙旣在郡城當飭在城文武兵
弁齊心守禦俟大兵至汝整隊夾擊無失事機張
之萬現在回省卽著將省城守禦各事宜認真布

置並著僧格林沁隨時察看軍情如必須張之萬
出省卽行飛咨該撫遵辦

欽定剿平捻匪方略卷二百二十七 乙丑年

三月初六日 辛丑

上命議政王軍機大臣傳諭僧格林沁官文曾國藩
李鴻章喬松年張之萬吳昌壽曰前因張之萬奏
賊由鄆城上蔡遂平交界之五溝營等處南竄至
汝甯城東肆蔓於正陽新息之交有由信陽竄楚
之說當諭僧格林沁督隊跟追吳昌壽帶兵出省

防勦近日賊勢若何久未據僧格林沁等奏報此
股賊匪能否就地殲除抑已竄越楚皖著僧格林
沁激勵各軍穩慎進攻詹啟綸一軍諒已早到汝
甯現在軍勢賊情該親王務當迅速馳奏以慰廑
系賊衆駸駸南竄吳昌壽當剋期帶兵出省進至
豫境察看賊勢兜勦並著督令成大吉等一併出
境會勦以收夾擊之功官文於省城防守事宜務

須妥爲經理並嚴飭水陸諸軍聽吳昌壽節制不
得稍有牽制致誤戎機劉銘傳一軍多係淮勇皖
勇精銳之師利於馳擊是否仍紮三河尖地方現
旣不令赴閩卽當責令剿滅此股捻逆著曾國藩
李鴻章傳知該提督整頓隊伍如賊近皖境卽令
其實力剿洗如賊在楚豫卽檄令越境迎剿聽候
僧格林沁調遣僧格林沁之兵轉戰經年疲勞過

甚正宜駐於平原曠野地方蓄養銳氣凡山徑崎
嶇藪澤低窪處所斷不可再行冒險前進且該大
臣但須指揮調度使各路將士合力進剿賊股卽
可殄滅豈可身臨前敵致蹈危機張之萬於省城
防守及地方應辦事宜諒已布置妥協並著探悉
汝防軍情隨時奏報以聞

初八日

癸卯

大學士湖廣總督官文湖北巡撫吳

昌壽奏言豫捻經僧格林沁剿敗由汝甯擾及
光羅偏近楚境伏查汝甯以南與湖北孝感之
九里關毗連光羅又與黃麻接壤臣官文先已
飛調成大吉移紮麻城之宋埠岐亭姜玉順張
嵩齡扼紮九里關譚仁芳由長樂調回三里城
李成謀扼防小河司周鳳山移紮黃安並飭蔣
凝學由武勝關等處迎頭截擊兼顧德安應山

飭水師萬化林等嚴防港汊要隘以昭周密現
探張總愚陳大濬等由汝甯上蔡分股南竄鄂
省東北兩路均形喫重 臣吳昌壽定於二月二
十五日出省前赴黃州一帶居中聯絡 臣官文
已通飭水陸各營暫歸 臣吳昌壽調遣以一事
權省城根本重地防守事宜 臣官文已飭總兵
胡定坤等駐紮城外並督同在城文武嚴密稽

查漢鎮地當孔道尤易藏奸並揀派協領喜昌
同副將唐瑞廷等晝夜巡防藉資保衛

同日張之萬奏言捻匪由汝郡向東南繞竄當

經臣毛昶熙傳諭各鄉民堡嚴爲之備一面派

已革副將徐邦道遊擊王玉佩參將蔣希夷帶

隊駐紮汝正所屬之翰東汝南埠閩灣各寨幫

同防守臣張之萬飛催張曜宋慶湯聘珍等星

馳報驛二月初二日賊撲新蔡屬之徐家寨該縣知縣章慶保督勇往勦殺斃多名初三日匪黨竄撲汝南埠外寨遊擊王玉佩擊卻之初四日該匪過河直撲翰東寨徐邦道率領寨丁出擊斬賊數十名營官都司郭紹欽力戰陣亡時陳大溘死黨葉瀾城葉和尚等皆充兵勇竄回閩灣適蔣希夷趕到立即擒斬淨盡初六七八

等日匪衆圍攻正陽之盧岡小陳等寨均經蔣
希夷郭寶昌等擊退初九日張曜宋慶各軍齊
抵翰東偵知寨南尙有賊卡挑隊往劫餘匪遂
乘夜南遁前股屯聚正陽信陽屬之陡溝以西
後隊在正陽屬之油坊店大林店銅鐘一帶遊
弋並擾及息縣之土扶橋彭家店時家圍張家
寨等處進窺縣城署知縣蔣彙之督勇擊敗十

四日該匪前股渡河竄擾信羅之交後隊正在
搶渡張曜等各軍踵至乘勢蹙之淹死無算先
是張曜因信陽空虛稟知臣毛昶熙豫飭湯聘
珍高自秀馳援湯聘珍駐紮南關親率馬隊及
參將蔣東才都司鄒春陽等向東十八里鋪踏
看營壘突見山岡馬賊擁簇而下立即督隊迎
戰十五日復整軍往剿賊以數百騎來犯我軍

追壓至雙林寺賊之馬步大隊已由十八里鋪
東路竄來長亙十餘里勢甚兇惡湯聘珍飛調
高自秀一營守紮東面令各營抱隊穩紮部勒
甫定雙林寺之賊卽渡河向三里店一路徑撲
該州南關十八里鋪之賊分由校場南北兩路
抄襲我軍已爲賊截斷哨官胡得勝丁萬春郭
金友王九如趙昌虎蔣文行劉柏倫皆歿於陣

參將蔣東才已革知縣談燮和把總樂得勝等
血戰多時始得撤入關廂其竄撲南關之賊經
南汝光道蒯賀蓀開放槍礮轟斃甚衆賊乃退
至中山店一帶十八日張曜知賊在中山店遂
與成保郭寶昌引軍並進陳國瑞亦帶隊東來
兩面夾擊該匪折竄五里店西南山內現聞僧
格林沁大兵亦由五里店一帶前進 臣查此次

賊衆南趨經官軍節節勦擊各寨盡力固守未
爲所乘遂圖潛襲信陽又被官軍扼截賊志不
逞往來遊駛所向靡常此時豫軍及僧格林沁
大兵均已南進並飛咨楚省迎擊或可就地殲
除所有陣亡之擬保遊擊儘先都司胡得勝都
司郭紹欽擬保都司儘先守備丁萬春守備銜
千總郭金友把總王九如趙昌虎蔣文行劉柏

倫等效命疆場實堪憫惻合無仰懇

天恩飭部從優議卹以慰忠魂

張之萬又奏言正繕摺閒又據探稟張曜會同
成保郭寶昌陳國瑞等軍截匪獲勝後二月十
九日行抵信陽屬之十八里廟賊衆由山口橫
衝而出我軍分投迎戰衝壓數次始將賊衆擊
退計斃七八百名二十一日該匪由信陽屬陡

溝長臺之閒徑竄正北僧格林沁傳令各軍跟蹤追勦不得繞出賊前由北遏截又據逃出難民供稱二十四日陳國瑞追賊於確山城東十餘里之罐山地方賊衆大敗沿途殺斃長髮老賊三千餘人奪馬二三百匹又據各州縣馳稟二十四日賊匪竄擾遂平縣境二十五日竄至西平縣境二十六日大股由沙河擾及郟城之

東邊馬竄至鄆屬小商橋各等語 臣查該匪被
勦竄回省南州縣同時戒嚴已飛飭該地方文
武嚴加防備 臣仍審度緩急隨時策應均奏入
上命軍機大臣傳諭僧格林沁官文張之萬吳昌壽
曰張之萬奏賊竄信陽並折竄北向現籌布置官
文等奏吳昌壽督兵出省賊由正羅各屬南趨信
陽爲張曜等擊敗復向北竄經陳國瑞追擊於確

山城東大獲勝仗殺斃長髮老賊二千餘人奪馬
二三百匹如果屬實甚爲得力陳國瑞現在所部
究有若干兵勇及出力戰狀僧格林沁查明卽可
奏請恩施以示獎勵賊由遂平西平等處擾及郟
城日向北趨僧格林沁傳令各隊跟追不得繞出
賊前由北遏截自因北面地勢平曠馬隊易於奏
功惟北路空虛而賊蹤飄忽如地近平原仍須檄

飭各路進兵繞前遏截以杜紛竄汴省以南州縣
卽著張之萬嚴檄該牧令布置城守認真團練爲
堅壁清野之計黃河緊要渡口亦當迅籌防守勿
稍疏虞河北一帶團防事宜著張之萬責成該鎮
道及各州縣迅速興辦毋致臨期貽誤是爲至要
直東一帶交界地方前經各該督撫遵旨派有兵
勇防守仍著僧格林沁偵探賊情隨時知照各該

省飭令帶兵將弁迎頭截擊萬不可令其竄入直
東境內致逆勢益形滋蔓官文等所奏水陸防堵
情形布置尙爲嚴密此時賊已北趨吳昌壽駐紮
黃州距賊較遠著卽督率楚軍進駐豫疆如賊匪
折向南趨亦可迎頭截剿並著官文籌畫餉需源
源接濟所有楚北各軍卽著統歸吳昌壽調遣吳
昌壽抵豫後韓著隨同僧格林沁合力攻剿聽候

進止機宜不得稍分畛域張之萬所奏陣亡之擬
保遊擊儘先都司胡得勝都司郭紹欽擬保都司
儘先守備丁萬春守備銜千總郭金友把總王九
如趙昌虎蔣文行劉相倫均著交部從優議卹以
慰忠魂

初九日

甲辰

署漕運總督兵部右侍郎彭玉麟奏

言欽奉

恩旨命臣署理漕運總督聞

命之下感悚莫名查東南轉漕關繫

國計甚鉅軍興以來河運久停現幸軍務將竣自

須規復舊制臣於斯事全未講求何可冒昧嘗

試貽誤倉儲臣於咸豐十一年蒙

恩簡任安徽巡撫自揣才力難勝封疆之任具疏力

辭仰荷

聖慈垂察改補今職彼時粵逆鷓張苗練捻匪交相
搆煽皖江南北有岌岌不可終日之勢臣方專
力水師其艱難與皖撫相等區區愚忱旣爲

皇上優容亦爲天下共諒以目前情形而論漕臣責
任雖重較之十一年之安徽巡撫則有勞逸之
別難易之分若辭皖撫於昔年而任漕督於今
日未免辭勞而就逸舍難而就易旣變初心恐

貽物議 臣本有失血之證軍中時時舉發近來
心血過虧逐漸加甚蒲柳早衰萬難再膺重任
惟有仰求

皇上天恩另行簡員署理漕運總督俾 臣得稍安愚
拙之分不勝幸甚奏入

上諭曰仍著迅赴署任毋庸固辭

初十日巳乙 閩敬銘奏言接各路探報捻匪從鄆

陵汝甯三河尖節節南竄去東較遠藩司丁寶
楨統帶勇營到防卽在曹單兩縣交界之青堦
集居中駐紮惟查東豫接壤地方率皆平野無
要可扼臣慮賊蹤飄忽嚴飭各州縣並檄丁寶
楨隨時偵探本月初六日忽接曹縣稟稱考城
縣五市園地方突有賊騎往來丁寶楨已派參
將宋延德一營先往截擊初七日連接曹單定

陶城武蒔澤鄆城距野金鄉濟甯各州縣來稟
據稱該境均有賊匪復據曹州府濟甯州探報
此次竄入東境多係馬賊約有二千餘人等語
臣思此股賊匪情勢詭譎旣由考城繞道西竄
又零星蔓延牽掣我兵且馬行迅疾日夜可二
百餘里防剿在在喫緊丁寶楨所部兵力不敷
臣飛咨曹州鎮保德卽帶前挑兵丁一千名迅

速追擊該藩司復咨調兗州鎮兵五百名卽由
護理總兵范正坦統帶於初七日前赴濟甯併
力會剿臣並札調同知劉時霖一營前往東平
遊擊王正起一營來省駐紮又於撫濟三營挑
選兵丁相機援應奏入

上命軍機大臣傳諭僧格林沁官文劉長佑閻敬銘
張之萬吳昌壽曰閻敬銘奏豫匪突入東境曹州

濟甯一帶調兵迎剿並布置情形河南賊匪情形
久未據僧格林沁奏報前據張之萬奏稱賊由遂
平西平等處繞及鄆城日向北趨當以北路空虛
賊蹤飄忽諭令僧格林沁繞前截擊何以數日之
閒曹州單縣定陶城武荷澤鄆城鉅野金鄉濟甯
均有馬賊蔓延東境既有防兵何以任令闖入漫
無準備僧格林沁不截北竄之路致令擾及完善

措置殊未合宜著僧林格沁卽行統領馬隊追剿
嚴扼北犯之路會合山東防兵將曹濟各屬馬賊
一律削平無任再肆延蔓丁寶楨已派參將宋延
德先往截擊該藩司旣在曹單交界之青堦集居
中駐紮卽著閻敬銘飭令趕緊調派兵弁認真剿
捕該撫以丁寶楨勇隊無多慮其不敷分布已飛
調總兵保德帶兵一千名追擊並調范正坦等帶

兵前往濟甯東平等處勦辦著嚴飭該總兵等實力勦洗省城防務並須妥爲布置毋稍大意直隸東明長垣一帶與曹考接壤劉長佑前次備調之各起兵勇著卽調赴大名等處嚴爲防備如須出省布置並著酌度情形妥爲辦理直隸現存馬步共有若干遇便奏聞僧格林沁帶兵北向著吳昌壽遵照屢次諭旨帶兵直抵豫境爲僧格林沁接

替之軍不得稍分畛域此股賊匪飄忽而來究係
何處股匪是否有宋憬詩在內著僧格林沁闡敬
銘查明具奏張之萬於吳昌壽到豫時飭令各營
兵勇聽候調遣兼令各州縣整飭團練同心滅賊
並嚴飭河北鎮道加意嚴密防守以靖地方沐省
防務仍著妥籌辦理毋稍疏懈

十三日

戊申

僧格林沁奏言查髮捻各逆前由臨

穎鄆城一路向南奔突 臣令張曜宋慶郭寶昌
跟蹤尾追並令副都統倭和總兵陳國瑞由扶
溝商水繼進嗣探該逆有竄往上蔡之勢惟恐
再竄楚疆擾及完善因飛咨官文扼要布置一
面札飭提督成大吉姜玉順卽赴九里關外西
自黃陂站七里坪東至界嶺等處嚴密扼防旋
探該逆竄至汝甯有攻毀民寨情事更恐煽惑

伏莽又肆臨張遂於二月初五日飭營總何建
鼇取道商水先往堵禦 臣僧格林沁卽於初八
日親督馬隊自鄆陵起程前進並商令 臣國瑞
暫紮許州以爲後路聲援十一日 臣行抵汝甯
偵知逆衆由息縣以北向東南奔突 臣札調總
兵詹啟綸迅赴三河尖會同藩司英翰實力堵
截以扼入皖之路十四日 臣追至息縣屬之陡

溝該逆連夜竄入羅山境內十六日我軍馳至
羅山西南之張家店已繞出賊前正可迎頭截
勦而該逆又向信陽一帶狂遁十八日在中山
鋪等處經郭寶昌等追及賊尾小有斬擒逆衆
復西竄信陽以東三河一帶十九日翼長成保
常星阿張曜宋慶會合郭寶昌行至十八里廟
賊衆由山口衝出郭寶昌等奮力迎擊自己至

申斃賊數百名二十日臣至信陽該逆已折而
北竄復由二十里河向西北奔逸臣卽催調陳
國瑞等自陡溝探蹤西進二十四日臣至確山
適陳國瑞等軍亦到該逆大股約有萬餘在確
山迤東數里列隊屯聚臣當派翼長全順管帶
馬隊與陳國瑞步隊由西面進何建鰲倭和帶
領參將施紹恆等由西南進以常星阿所部馬

隊助之並令成保帶領黃旗馬隊在南面依山
列仗以郭寶昌之軍伏於山口總兵張曜宋慶
等在後策應布置甫定臣在山巔督陣逆衆旋
卽蠶擁前來直撲西面兇猛異常陳國瑞鏖戰
時許步賊已怯而馬賊猶拌命死鬪正相持閒
郭寶昌由山口突出將馬賊衝斷何建鼇倭和
隨後接應全順常星阿亦各帶馬隊直前衝壓

逆勢不支紛紛敗退我軍追殺十餘里屍橫徧
野追至小橋地方逆衆復敢回拒我軍又極力
奮擊賊遂向東北竄遁是役計斃悍賊三千餘
名奪獲旗幟刀矛不計其數逆衆遺棄輜重甚
多救出難民及逃散者不下數千人據獲賊供
稱是日係逆首賴汝洸任化榜歐老紅張總愚
陳大禧等各股悍黨合力死戰受創後敗竄者

僅係馬賊其步賊已所餘無幾該逆現由遂平
西平鄆城鄆陵許州扶溝各境直走睢州三月
初一日臣追至睢州以北據探該逆由李八集
竄過黃河老隄圖擾東境當飭藩司英翰總兵
詹啟綸由潁亳歸德虞城一路向單縣進發初
四日臣追至曹縣西北該逆仍向東北竄突恐
其偷渡運河復飛咨撫臣闔敬銘並札兗州鎮

道分投嚴防又慮該逆不渡運河必將回擾豫
疆遂令總兵張曜宋慶等卽在虞城一帶扼紮
俾資防勦 臣連日自定陶城武嘉祥鉅野等境
於初七日追至汶上縣之馬家海地方而該逆
行走甚速晝夜無停竟於是日由開河地方渡
過運河初九日竄至甯陽折而東南 臣現已督
軍追至曲阜縣西北此股逆匪形同流寇一味

狂奔我軍馳追而月每日均在百里以外往返
不下三千餘里未敢稍息步隊奔馳旣久業已
節節落後擬稍待兵勇到齊卽當相機追剿查
確山之戰陳國瑞勇隊打仗最爲奮勉郭寶昌
勇隊同時進剿亦極出力是以每營賞給銀五
千兩何建鼇所部勇隊奮力接應亦賞銀三千
兩已飭糧臺照數給發其陳國瑞郭寶昌之帶

隊員弁均屬勇往未便沒其微勞謹另繕清單

懇請

獎勵出自

天恩

僧格林沁又奏言提督銜候補總兵卓勇巴圖

魯郭寶昌自到臣營每遇打仗勇往向前平日

整飭勇隊紀律嚴明且人甚樸誠堪勝專闖大

員之任可否遇缺

簡放之處出自

聖裁奏入

上命軍機大臣傳諭僧格林沁劉長佑吳棠彭玉麟
閻敬銘張之萬吳昌壽曰豫省髮捻各逆由臨潁
鄆城狂竄汝甯息縣羅山信陽確山等處經官軍
節節躡剿殲賊甚衆該逆復奔許州鄆陵扶溝並

自李八集竄過黃河老隄向東北竄逸由開河地方竄過運河至甯陽折而東南此股賊匪勢同流寇官軍追勦而月往返馳逐幾及三千里各營將士均形勞苦步兵逐日遄行足無停趾疲乏異常該親王於步隊兵勇到齊後須令暫爲休息再行進兵方不至有前突後竭之虞賊蹤剽疾此拏彼竄是其慣技著該親王檄令各營及東省官軍分

路布置於逆匪圖竄之路豫爲扼要駐紮庶四面
兜揜易於殄滅若一味跟勦官軍處處俱落賊後
恐該逆任意蔓延將成不了之局僧格林沁韜略
素嫻諒能謀定後戰迅殄逆氛也陳國瑞等打仗
奮勇該親王已將陳國瑞郭寶昌兩軍各賞銀五
千兩何建鼇等所部賞銀三千兩所辦甚是惟該
親王所部馬隊晝夜奔馳不辭勞瘁亟應量加鼓

勵亦著賞銀五千兩卽由山東藩庫發給其馬隊出力各員弁並著隨時保奏候旨施恩闕敬銘飛檄東省官軍會同僧格林沁所部各營協力勦洗務將此股就地殲除毋任再行肆擾賊匪大股雖趨東境而豫省匪蹤尙未淨盡著吳昌壽懍遵前旨迅赴豫疆實力勦辦該省餘匪卽責成吳昌壽迅速掃除不得稍分畛域張之萬仍一面查明何

路尙有伏莽飭屬認真搜捕同心殺賊以期次第
廓清並遵前旨令各營兵勇聽候吳昌壽調遣直
隸東明長垣一帶毗連曹考難保該匪不由東竄
直劉長佑前次備調之各起兵勇是否已抵大名
等處應否出省布置均著妥籌辦理並將防守情
形隨時奏聞曹州濟甯之匪經僧格林沁大兵跟
剿恐其竄入徐州一帶著彭玉麟迅速赴任督飭

官軍嚴密防守毋令擾及完區彭玉麟未到任以前卽著吳棠分路布置妥爲辦理僧格林沁另片奏郭寶昌打仗勇往請旨遇缺簡放已諭軍機處存記惟陳國瑞打仗素稱得力確山之戰據奏最爲奮勉亦應量予恩施並著該親王隨時察看酌量保奏俾資鼓舞

上諭內閣曰河南髮捻各逆由臨潁等處狂竄信陽

州境經總兵郭寶昌會合翼長成保等併力截剿
斃賊數百名該逆遁至確山縣地方僧格林沁親
督各軍分路進剿並分軍設伏策應該逆蠡擁來
撲總兵陳國瑞督勇力戰步賊披靡馬賊猶拌死
抗拒山口伏兵突出將馬賊衝斷賊勢不支紛紛
敗退官軍追殺十餘里計斃悍賊三千餘名奪獲
器械輜重甚多救出難民數千名剿辦甚爲得手

著僧格林沁乘此聲威督軍追剿以期迅殄逆氛
單開尤爲出力之守備范承先著以都司仍歸漕
標河標儘先卽補把總紀長著免補把總以千總
仍歸漕標河標儘先卽補段得勝著免補把總以
千總仍歸湖北督標儘先卽補張玉廷著免補把
總以千總仍歸淮揚鎮標儘先卽補外委劉金斗
著以把總歸曹州鎮標儘先卽補軍功王立中著

以把總歸壽春鎮標儘先卽補軍功丁自精等三
名均著以外委歸壽春鎮標儘先卽補外委田得
元著以把總歸壽春鎮標儘先卽補軍功宋全得
著以外委歸兗州鎮標儘先卽補把總藍國普著
以千總歸壽春鎮標儘先卽補副將康錦文著交
部從優議敘副將張士元著賞加總兵銜都司雷
彥著免補都司以遊擊儘先補用守備郭運昌著

免補守備以都司儘先卽補王鳳鳴等二員均著
免補守備以都司儘先卽補外委宋朝如著免補
把總以千總儘先卽補郭宗儀等二員均著免補
外委以把總歸壽春鎮標儘先卽補千總張學維
著免補千總以守備儘先補用以示獎勵

十五日 庚戌 劉長佑奏言前探賊匪已竄楚界當

以賊蹤雖遠而擬走靡定仍須實力嚴防飭大

名鎮道妥爲布置並派宣化通永天津正定各
鎮標兵二千一百名臣標五營兵一千名速卽
整理裝資聽候調遣復令棗強縣知縣李秉衡
涿州營守備李惠英飭各募勇五百名以資策
應三月初八初九等日疊據大名鎮總兵姜國
仲大順廣道范梁及各州縣稟稱賊匪回竄鄆
陵旁趨考城曹州於初五日由定陶向曹郡東

北一帶狂奔傳聞有山東蒗澤縣擒首郭秉鈞
在內又探宋逆憬詩由確山被官兵擊敗後帶
領馬賊二千餘人分股疾趨並聲言欲回堂邑
報復前仇僧格林沁全軍跟蹤緊躡等情臣查
開東長雖與豫境相接然有黃水漫溢河流紛
歧兵勇駐守尙可杜其偷越惟山東范濮連界
之張秋鎮本屬黃運合流之處河面甚狹船隻

亦多卽係該逆前次偷渡故道儻防範稍疏一
被搶渡則必闖入觀朝冠莘館邱等州縣與直
境西南兩路犬牙相錯地勢平衍無險可扼必
須厚集兵力方足杜其北竄兼收夾擊之功臣
已催調兵勇擬於十六十八兩日與臬司李鶴
年先後出省前赴廣平威縣一帶察看賊勢相

機籌辦

劉長佑又奏言 臣欽奉

諭旨飭查直隸現存馬步名數查 臣前擬在各標抽
練精兵二萬五千人嗣因餉需不足先在 臣標
抽練馬步兵一千四百名提標同大名鎮各一
千三百名宣化鎮一千二百名天津鎮一千零
八十名通永鎮九百八十名正定鎮七百五十
名共計馬步兵八千餘名均已訓練成軍此次

所謂大名鎮兵一千名大順廣道范梁所募勇
一千名廣平府知府楊毓枬原帶壯勇五百名
續募壯勇五百名已上共兵勇三千名馳赴大
廣所屬防堵又調宣化鎮兵六百名通永天津
正定三鎮各五百名及臣標一千名共三千一
百名又飭棗強縣知縣李秉衡守備李惠英各
募勇五百名已上共兵勇四千一百名由臣督

帶出省分布防勦如賊氛逼近兵力尙有不敷
再當隨時酌量調撥

同日閩敬銘奏言據藩司丁寶楨暨各州縣稟
報捻首賴汶洸張總愚等闖入東境於本月初
五日竄至城武縣境大田集僧格林沁帶領馬
隊躡追甚緊初五日由定陶竄至嘉祥縣羊山
地方次日僧格林沁大隊亦至賊復由羊山北

竄汶上初九日竄至汶河南岸甯陽縣白馬廟
午後又東竄曲阜僧格林沁仍帶隊緊追不使
喘息查該逆自二月二十三日在確山爲官兵
擊敗歷許州考城曹州以至曲阜十五日內擾
及數十縣境繞竄二千餘里迅疾異常雖係窮
寇而馬賊頗多且各處裏脅又逾萬人官軍日
夜窮追稍一憩息賊卽遠颺必須厚集兵力四

面兜勦方能殲滅否則縱有懲創難絕根株臣
現札調同知劉時霖一營移紮開山添募勇丁
五百名委都司韓登泰管帶又挑省標精壯兵
丁七百名飭參將玉山管帶與前調遊擊王正
起一營均紮城外互爲犄角一面札飭駐紮觀
范之參將黃兆昇嚴防黃河北岸並咨兗州鎮
范正坦續挑精兵五百名扼賊由濟甯南竄之

路以資防剿

同日張之萬奏言逆匪在確山縣東經僧格林
沁大軍擊敗悉向東北奔竄自遂平西平郟城
以達臨潁許州鄆陵各境二月二十九日賊撲
扶溝縣城經知縣鄒金生擊卻初一日賊由尉
氏通許邊境疾走杞縣初二日進撲東關知縣
查以謙令把總張志榮練總侯守箴縋城出擊

斬長髮老賊十七名生擒悍黨五名餘匪連夜遁至蘭儀之儀封壩頭水口村及睢州之匡牆西陵寺榆廂鋪等處初二日賊騎陸續竄過乾河擾及考城之張莊程賀村等處初三日全股竄入東省曹縣境內初四日僧格林沁親統馬步大軍由考城一路追抵定陶據探賊蹤復向東竄單縣魚臺之交卽飭張曜宋慶蔣希夷各

隊同紮虞城該親王仍督軍追躡臣查該匪日夜狂奔其勢已成強弩之末似尙不難翦滅惟賊蹤飄忽設因官軍邀擊折而西趨難保不再圖回擾臣已嚴飭張曜宋慶馳往虞城扼要駐紮至直東交界處所伏莽未絕萬一再行勾結則河朔完善之區何堪設想臣現檄調知府湯聘珍參將崔廷桂率所部兵勇剋期北渡馳赴

直豫東交界地方聯營扼紮並飛檄河北鎮道
嚴加備禦以杜賊匪窺伺一面確探賊蹤何處
喫緊臣卽出省督率堵剿均奏入

上命軍機大臣傳諭僧格林沁官文劉長佑吳棠彭
玉麟閻敬銘沈桂芬張之萬吳昌壽曰前據僧格
林沁奏追剿髮捻各逆由豫入東當諭該親王暫
休兵力分路布置並令直隸山東河南及漕運各

督撫分籌防勦吳昌壽帶兵入豫矣本日據張之
萬奏賊竄東境閻敬銘奏捻蹤東竄與僧格林沁
所奏情形大略相同並據劉長佑奏調兵出省督
辦及存營調出兵數覽奏均悉僧格林沁以馬隊
追賊晝夜遄行二千餘里賊匪到處有馬可擄官
軍無馬更換疲乏殊甚若再併力追逐勢必爲賊
所乘務當穩慎進取飭令丁寶楨所帶之勇分投

軍機處
三十一
三十一

布置嚴密扼截閩敬銘亦當懷遵前旨檄令東省
各營處處截剿並督飭團練固守鄉村毋任賊勢
蔓延僧格林沁所帶步隊亦須暫息數日再行追
賊丁寶楨所部勇丁卽著歸僧格林沁調遣合力
攻剿張之萬現飭張曜宋慶等軍馳往虞城卽著
聽候僧格林沁調遣嚴密扼截毋任賊蹤回竄知
府湯聘珍等軍張之萬現已檄令北渡並檄河北

鎮道調集營兵整頓團練務當督令節節設防嚴
密布置汴梁以南尙恐有另股敗匪續行北竄張
之萬亦當分兵豫防毋得顧此失彼劉長佑現已
調兵定期出省擬與臬司李鶴年先駐廣平仍須
嚴扼濮范沿河一帶勿令逆蹤偷渡一面與張之
萬所派河北防兵聯絡聲勢勿稍疏懈直隸各標
兵丁仍著隨時訓練以備續行調遣此股逆匪旣

有宋景詩在內難保不復竄直東一帶肆行滋擾
臨清州南北各州縣闔敬銘務當調派兵勇與直
隸防兵互相援應嚴加防範所調同知劉時霖等
各營分布開山等處並籌布省城防守情形卽著
認真辦理吳棠彭玉麟仍當遵奉前次諭旨嚴扼
邳宿一帶以防賊撲清江東犯裏下河之路吳昌
壽當迅速帶兵馳赴豫省督率攻勦並將到豫日

期馳奏毋稍觀望楚北邊境卽由官文分飭各軍
扼守以防回竄至山西澤潞兩府與河北彰衛懷
毗連平定一路亦與直隸井陘獲鹿接壤沈桂芬
當分派兵勇擇要駐守毋任賊蹤竄入是爲至要

十七日

壬子

上命軍機大臣傳諭曾國藩曰昨據僧格林沁閣敬
銘等各奏豫匪竄入東境蔓延曹濟等屬歷十數

州縣而至曲阜僧格林沁現帶馬隊緊躡其後閻敬銘亦派丁寶楨等帶勇追擊此股賊匪由豫竄東勢極飄忽恐不能逞志於東必將竄擾徐邳一帶屢諭彭玉麟趕緊赴漕督新任辦理徐宿防務彭玉麟未到任以前仍由吳棠認真辦理惟徐宿等境與東省接壤地方甚屬空虛恐防兵不能得力難固藩籬著曾國藩速派得力兵將馳赴徐宿

交彭玉麟等妥爲調遣如賊竄江蘇邊界卽須出境會合山東官兵夾擊裏下河地方尤爲緊要並須妥爲防範勿令賊蹤闖入彭玉麟懇辭漕督業經批令仍赴新任毋庸固辭該大臣可就近催令赴任辦防以便吳棠早日入粵劉銘傳一軍現在何處能否分兵赴淮東交界處所並著妥籌調派

十九日

甲寅

署兩廣總督漕運總督吳棠奏言據

探髮捻由河南確山一帶回竄三月初五日竄
入東省曹縣屬境並單縣之黃岡集等處查此
股竄捻馬賊居多異常飄忽曹單與徐州之豐
碭接壤防堵固形喫重卽下游清淮一帶亦須
扼要嚴防庶可有備無患銅豐蕭碭等屬已由
徐州鎮道分別布置其桃源之成子河爲清淮
門戶臣現派副將張從龍統帶兵勇各四百名

參將朱光廷帶勇四百名並礮船七隻前赴該處及五隄頭一帶會合原派防兵水陸設防又派副將龔雲福帶礮船四十隻前赴邳宿運河分駐扼堵旣可爲徐防策應兼杜搶渡北趨奏

入

上命軍機大臣傳諭僧格林沁曾國藩劉長佑吳棠彭玉麟喬松年閻敬銘張之萬吳昌壽曰前因豫

省髮捻各匪被勦北竄關入東境疊據僧格林沁
劉長佑張之萬等連章入告當諭僧格林沁暨各
省督撫等分派兵勇整頓鄉團扼要截擊並恐豫
省賊蹤未淨諭吳昌壽迅赴豫疆實力勦辦現在
吳棠以東省之曹單與徐州之豐碭接壤勢極喫
緊下游清淮一帶亦須扼要設防已經徐州鎮道
分兵嚴扼並飭張從龍等水陸各軍分防成子河


及邳宿等處著吳棠督飭各兵勇實力防維設遇賊蹤紛擾卽認真兜擊毋令竄入裏下河完善之區致成巨患彭玉麟經朝廷簡署漕運總督疊經催令迅速赴任著懍遵前旨趕緊馳抵署任督飭兵勇實力籌勦以重職守揚防裁撤兵勇難保無逗留淮揚一帶希圖滋擾者著吳棠彭玉麟妥爲防範不得任令勾結竄匪滋生事端蒙穎一帶亦

係賊蹤擾竄之路著喬松年嚴檄在防兵勇遇賊
卽擊毋任竄脫現在賊蹤竄近清淮該處兵力深
恐不敷著曾國藩一面偵探一面將現存兵勇酌
量撥赴江北以資援應劉銘傳一軍能否分兵赴
淮東交界處所扼要駐守仍著妥籌調派賊入東
境曲阜後匪勢如何及官兵接仗情形尙未接各
路奏報著僧格林沁閻敬銘查探確實奏聞僧格

林沁所部各隊休息數日後卽著調齊兵勇穩慎
進攻閩敬銘亦當督飭丁寶楨會合各路兵勇分
投截剿以期悉數殄除毋令滋蔓直隸與東境毗
連劉長佑現經出省卽飭派出各軍妥籌扼擊不
得稍涉大意僧格林沁已統全部馬隊在東省剿
賊後路步隊想已陸續趕到合之東省兵勇聯絡
進剿聲勢已壯深恐匪衆被擊回竄則豫省又形

契重張之萬迅飭河北鎮道激勵民團盡力堵遏
並飭張曜宋慶等軍迅圖夾擊以收聚殲之效此
時豫省各軍俱赴北路追賊南面空虛可慮著吳
昌壽懍遵疊次諭旨星馳赴豫以勦爲防俟行入
豫省卽趕緊馳奏不准觀望遲延致干重咎

欽定勦平捻匪方略卷二百二十八 乙丑年



三月二十日 乙卯 喬松年奏言 臣 由潁州赴太和

查看團練本擬於界首集派兵駐守嗣據探報
賊已竄入山東曹縣境內宿亳又形喫緊因飭
英翰率所部移紮蒙亳適中之雒河集高鑑集
隨時確探賊蹤迎頭截勦 臣 卽由太和潁上回
至壽州就近調度查山東曹單等縣與徐州連

界臣已函知吳棠暨徐州鎮道一體嚴防再恭
奉

諭旨垂詢賊情並知已蒙

飭令提督劉銘傳一軍出境迎勦臣查劉銘傳勇敢
明練綽有將才所部淮皖之勇亦皆能戰今派
往勦辦此股捻匪必能得手至其進兵之路以
臣愚見刻下賊蹤已入山東似宜從碭山蕭縣

一路前進探賊所至迎頭截剿庶可收前截後
追之效

同日閩敬銘奏言三月初九日探得賊匪由汝
赴甯僧格林沁帶隊緊躡丁寶楨帶隊馳抵兗
州聞該逆已折繞西面轉竄甯陽初十日護理
兗州鎮總兵范正坦奉調帶兵赴甯途中猝遇
賊匪衆寡不敵以致守備張俊之等六員力竭

陣亡十一日賊由甯陽漸近東平十三日僧格
林沁自甯陽向東平前進令丁寶楨分道馳至
泰安以防北竄省城之路丁寶楨行抵泰郡賊
果於十三四五等日擾及東阿平陰肥城一帶
十五日丁寶楨拔隊扼駐張夏已在賊前臣復
調駐紮省城圩外之王正起一營前往楊家臺
駐紮開山之同知劉時霖兩哨前往杜家廟專

顧長清赴省一路至省城爲根本重地兵數無
多城外土圩周圍計四十餘里之長且爲山水
衝激大半傾圮臣已趕籌補築並添派兵勇聯
絡民團協力防守抑臣尤有慮者賊匪素多詭
謀恐其分股牽掣我師復分股偷渡黃河北犯
東昌一帶臣已飭沿河州縣將船隻盡行提歸
北岸並會同紳董嚴稽渡口副都統定安由東

昌移紮張秋遊擊周森藻礮船在東阿上下河
路往來梭巡以防賊匪偷渡庶保無虞再兗州
鎮總兵范正坦一聞賊警立即帶隊急行中途
遇賊回竄猝不及防以致失利應請免其處分
所有打仗陣亡之守備張俊之把總尹振彪姚
廣勳外委袁汝漢劉慶元沈憲珍仰懇

天恩飭部優卹

閻敬銘又奏言正繕摺聞據丁寶楨稟稱探得該匪於十七日回渡汝河復竄甯陽一帶丁寶楨立即抄隊進赴甯陽等情果如所探是此股賊匪後畏追師前避迎截又復繞道回奔慮其潛走滋陽泗水向東南竄去丁寶楨自應帶隊跟追期與僧格林沁會合夾擊

同日張之萬奏言接奉

諭旨飭令僧格林沁北行而以吳昌壽策應後路仰
見

廟堂勝算計出萬全惟近日髮捻賊蹤及豫省情形
有不敢不爲我

皇上敬陳者現據探報捻匪梟渡運河後向汶上兗
州一帶竄遁其勢已駸駸趨向東北僧格林沁
督隊緊追斷不任其北駛惟賊蹤雖距豫較遠

而被勦回竄仍屬意中之事總兵張曜宋慶及
參將蔣希夷等經僧格林沁派令回紮虞城業
已擇要安營並因歸德城守空虛又經張曜分
派都司商自秀屯駐中五臺寺其商邱縣屬之
劉口集與曹縣毗連尤屬喫緊臣飛檄副將徐
邦道扼要嚴防復函商臣毛永熙移紮宋郡檄
飭崔廷桂管帶歸德鎮兵前赴河北聯絡直東

各軍專顧河防調知府湯聘珍勇隊來省聽候
派撥臣亦擬相機出省以資堵遏此近日布置
邊防之情形也至湖北撫臣吳昌壽現駐黃州
而僧格林沁大兵已追賊至汶上南北相去千
有餘里就令吳昌壽兼程疾進亦斷難首尾相
應况楚軍之行向不迅速卽如鄧州之役僧格
林沁調姜玉順一軍赴豫協勦遲至月餘並未

入境而賊早他竄况楚軍形勢今昔不同自金陵攻克後楚軍凱撤之師所過滋擾姜玉順藍斯明等軍大半歸自關中皆係多隆阿舊部自該將軍故後無人統轄此軍到處騷擾實甚百姓銜之切骨且長技在於槍礮又必先營後陣以之剽剽悍輕狡之捻尤非所宜故連年捻逆一入楚邊無不逞志僧格林沁老於兵事深悉

賊情每謂與捻匪接仗難於長髮皖軍爲上豫
軍次之楚軍見賊卽潰敗蓋畏賊馬衝突又不
習於長槍故也抑臣更有慮者豫省頻年兵燹
民力已極凋敝而供億車馬苦累尤不勝言若
楚省兵勇再令往駐豫中計其軍裝一切所需
車輛每縣必至千乘一縣不足勢須鄰封協濟
車輛不足更須派撥民夫大河以南各屬必致

全行擾及而所過地方又均係被匪較重之區
地本荒蕪方冀招集流亡及時播種稍示撫綏
一聞兵至復將舍業而逃徧地哀鴻將來何從
措手此尤臣所流涕而道者也臣身爲疆吏具
有天良何敢存門戶之見惟以楚軍來豫旣苦
相隔太遠與僧軍合力之無期又恐遷地弗良
當捻匪兇鋒而易挫夫此殘敗之賊不能卽滅

者良以僧格林沁馬隊疲乏之故然近日所統
步隊如陳國瑞等軍皆賊所憚馬步相依必能
得力再會合皖豫各軍定當奏捷 臣管窺所及
何敢緘默不言是否有當伏乞

聖裁均奏入

上命軍機大臣傳諭曾國藩劉長佑吳棠彭玉麟喬
松年閻敬銘張之萬吳昌壽毛昶熙劉銘傳曰前

據僧格林沁奏稱賊由曲阜向東南竄逸吳棠奏稱賊蹤偏近徐州諒卽張之萬摺內所稱向兗州迤北一帶竄遁之匪該逆旣向徐州附近一帶奔竄難保不南趨裏下河西竄蒙宿歸德等處僧格林沁馬力如已歇息著卽調齊馬步各隊視賊所向飭各路兵勇合力圍剿尤須防其北竄仍當一面兼顧北路節節嚴防毋令蔓延直東境內闔敬

銘亦當厚集兵力多設偵探扼要堵截並多撥勁
旅赴前敵隨同協剿毋令賊蹤久留東境歸德商
邱虞城旣各有兵防守毛永熙亦率所部由汝郡
移紮歸郡兵力旣厚遇有賊匪竄至務須奮力剿
殺不得以驅逐出境卽爲了事河北一帶現有崔
廷桂兩營駐紮卽著張之萬飭該員聯絡直隸防
兵嚴防河岸勿令賊匪搶渡昨有旨諭喬松年督

令蒙穎防兵截賊繞竄之路現據該撫奏稱已派
英翰駐紮雒河與昨日諭旨相合著卽飭該藩司
認真防堵勿稍鬆懈此時劉銘傳一軍自應從蕭
碭一路前進卽著喬松年飭該提督趕緊督兵迎
頭截勦金陵距皖比較遠劉銘傳進止卽著聽候
喬松年調遣無論行抵何處統歸僧格林沁節制
不得專候會國藩檄調致誤事機至豫省兵力無

多現俱移防東路後路不免空虛吳昌壽仍當督
帶楚北兵勇二三千名迅卽遵奉疊次諭旨趕緊
赴豫助剿俾豫省得以騰出兵力專防東路其抵
豫境日期並卽迅速馳奏正寄諭閒復據閩敬銘
馳奏賊已回竄甯陽東平一帶復渡汶河回竄甯
陽蹤跡飄忽所向靡定東省地勢平衍可以任意
馳騁且現已裹脅二萬餘人之多設令闖入畿疆

爲患益鉅總宜厚集兵力四面蹙之同時合力兜
勦方能速行翦滅至直東一帶現有兵勇尙恐不
敷分布著劉長佑於現調兵勇外速行添調扼要
分布如賊匪竄至東昌臨清一帶卽行越境會合
東省兵勇迎勦闔敬銘於挑曹州等鎮營各兵外
仍添調官兵並添募得力勇丁奮力迎截不准縱
令北竄僧格林沁務宜繞由北路向南偪勦吳棠

彭玉麟卽剋期飭令清淮兵勇北上探賊所向越境截擊不得稍分畛域曾國藩亦卽派兵渡江向清淮一帶後路接應劉銘傳督帶全軍一面由蕭礪飛速前進如賊仍在東境卽由蕭礪一帶迎剿喬松年添籌兵勇接應劉銘傳後路毋稍遲緩以上應調各軍除由各該省接濟糧餉外如有不足行抵何省卽由何省供支總期士飽馬騰不可稍

有缺乏豫省河北防兵祇有兩營張之萬仍當添撥重兵嚴密防堵儻令賊匪偷渡河北擾及畿疆必將張之萬從重治罪賊勢臨張如此各路統兵大臣並該省督撫等務當振刷精神力圖防剿賊蹤儻由何路竄逸卽惟何路帶兵大員及地方督撫是問勿謂誥誡之不早也吳昌壽已有旨歷次嚴催諒不至再行遷延致干重咎僧格林沁所統

馬隊現有若干應否添調河北採買馬匹是否到
齊均著迅速奏聞前次打仗得勝兵勇應賞銀兩
亦著速行賞給山東陣亡之守備張俊之把總尹
振彪姚廣勳外委袁汝漢劉慶元沈憲珍均著交
部從優議卹

二十一日

丙辰

吳昌壽奏言

臣

前奉

諭旨出省督兵時值豫捻尙踞光羅鄂省安麻等處

較爲喫重是以先赴黃州一帶豫籌遏擊措置
甫定探報該匪又由信陽北竄確山分擾西遂
續經豫軍連擊獲勝窮蹙狂奔去無定向等語
查此股賊匪刻下離楚雖遠而餘孽未清難保
不散而復聚亟應迅圖會剿盡絕根株第沿邊
幾及千里在在須防賊蹤飄忽異常分合莫定
楚軍勞師擊遠要當使內顧無虞而後外攘得

力茲通籌邊勢以德安之應山當中路之衝東
爲黃孝安麻西接隨棗襄樊及光鄖一帶最爲
扼要 臣卽擬於初六日拔營前往一俟抵德安
後審度賊勢如竄近鄂邊則分兵截擊負嶠麕
聚則會合夾攻惟有竭盡愚忱相機督辦斷不
致稍存畛域儻賊勢日衰豫軍已足就地殲除
毋須楚師深入再當隨時奏請

訓示欽遵辦理奏入

上命軍機大臣傳諭官文吳昌壽曰昨據張之萬等奏豫賊竄擾各情形當諭吳昌壽督帶楚北兵勇二三千名迅遵疊次諭旨趕緊赴豫助剿茲據吳昌壽奏稱遵於初六日拔營前進擬行抵德安後相機督辦儻賊勢日衰豫軍已足就地殲除毋須楚師深入再隨時察看請旨等語自係尙未接奉

續寄諭旨豫省髮捻各逆雖分竄東境而餘匪伏莽所在尙多現在僧格林沁馬步各軍全赴東省跟剿豫省兵力甚單尙須扼守東路兼顧河防儻賊蹤回竄勾結不惟豫省有燎原之勢卽楚邊亦在在堪虞是以疊次嚴諭吳昌壽帶兵赴豫廓清豫賊卽以防固楚疆今該撫擬行至德安審度賊勢再定進止機宜雖爲慎重起見未免意存畛域

賊情飄忽無定豫省兵力空虛著吳昌壽仍懍遵
昨日諭旨迅帶得力兵勇二三千名星馳赴豫實
力助剿毋得遷延觀望並將到豫日期迅速馳奏
以慰廛繫至楚省沿邊幾及千里防務未可稍鬆
官文接奉此旨卽於成大吉等諸將中酌派一員
統領楚防各軍嚴密防範以便吳昌壽馳赴豫省
其在防不得力兵勇卽責令派出之員簡校裁汰

以期兵歸有用應山黃孝安麻隨棗襄樊光鄖等
處地當扼要尤須派得力將弁加意防守

二十四日己未吳棠奏言臣欽奉

諭旨飭嚴扼邳宿一帶以防賊撲清江東犯裏下河
現據探報賊匪已竄至泰安一帶蒙陰縣境亦
有賊蹤蒙陰距邳宿僅數百里又出運河之北
道途四達深恐窮寇狂奔乘機闖入臣當派總

兵張從龍遊擊劉鶴年勇營參將吳鳳柱遊擊
王樹楠及徐州防軍馬隊移紮宿郟交界之新
安鎮及劉馬莊地方嚴加防備又飭姚廣武撥
勇駐守邳城又飭前防邳宿運河之副將龔雲
福偵探賊蹤如果南竄卽由運河駛回清淮援
應又派都司恆貴守備龔得魁孫耀等挑選河
潛標兵丁駐守清江河北土圩惟淮徐兵力本

單揚州一軍復經撤防江北地面千有餘里分撥實屬不敷臣已函商督臣曾國藩派提督黃翼升酌帶礮艇百餘隻來浦駐防又函商撫臣李鴻章派防守鎮江之總兵張樹珊暨道員吳毓芬等軍北來共防邳宿一路以杜該匪南竄並派總兵歐陽利見帶所部礮船四十隻赴淮揚鎮本任仍懇

天恩飭下曾國藩李鴻章迅派各軍星夜前來以資
堵剿奏入

上命軍機大臣傳諭僧格林沁曾國藩劉長佑鄭敦
謹吳棠彭玉麟李鴻章閻敬銘曰吳棠奏北路竄
匪已至山東泰安一帶蒙陰縣境亦有賊蹤距邳
宿僅數百里淮徐兵力本單揚州一軍又經撤防
請飭黃翼升張樹珊等軍北來駐防前因江北兵

集賢堂奏稿卷之三十一
力較單諭曾國藩撥兵接應現據吳棠所奏各情
自非厚集兵力不足以資堵剿著曾國藩仍遵前
旨將現存兵勇酌量調撥派黃翼升帶礮艇百餘
隻到浦駐防並著李鴻章迅派張樹珊吳毓芬等
軍馳赴邳宿一帶防守以固裏下河藩籬賊匪竄
入東境蹤跡飄忽兗沂邊境均與淮徐毗連吳棠
已派張從龍分投設防卽著嚴飭該員弁等認真

遏截遇賊卽擊毋任紛竄俟江南水陸各軍到齊
兵力更厚或飭張從龍等出境剿賊以江南各軍
爲後路援應或飭江南新到之軍充作前敵以淮
徐各軍嚴防要隘均著吳棠彭玉麟酌度辦理總
期與東省之兵合力擊賊迅圖殄滅不得稍分畛
域彭玉麟未到任以前吳棠責無旁貸務當激勵
各將士妥籌防剿以副委任賊入東境後是否仍

踞甯陽汶上一帶抑又紛竄旁趨官軍接仗情形
如何近日未據僧格林沁奏報朝廷深爲懸繫該
匪窮蹙鋌走無巢可歸若不急圖剿辦必致肆意
盤踞逞其荼毒東省爲畿輔屏蔽設日久蔓延關
繫殊非淺鮮著僧格林沁卽飭丁寶楨等並閩敬
銘節次所派各兵勇奮力圍剿毋得退縮觀望致
誤戎機賊匪經過之地村落爲墟官兵採辦糧草

深恐不易僧格林沁大兵一到所需尤多著閩敬
銘飛飭完善各州縣趕辦芻糧妥速接濟毋令缺
乏俟軍務完竣准其作正開銷賊匪所到之處每
以焚掠裹脅爲事東省伏莽未淨勾結響應本在
意中著閩敬銘督飭派出兵勇並該地方文武員
弁搜捕彈壓以清亂源僧格林沁馬步兵力是否
足敷勦辦仍著查明具奏前諭該大臣行賞犒軍

並將陳國瑞酌量保奏現在陳國瑞諒已到營著
傳知該員令其感激圖功實力報效隨同該大臣
馬隊奮勇殺賊儻能始終出力定當破格獎勵以
旌其勞該大臣仍遵前次諭旨嚴飭各路兵勇四
面兜剿繞由北路偏賊南趨派隊跟追毋令賊匪
得以喘息以期一鼓殲除黃河沿岸一帶地面遼
闊著鄭敦謹挑選河標兵丁於各渡口及水淺處

所設卡巡防並將渡船提歸北岸毋令賊匪偷渡
劉長佑閩敬銘亦當派兵集團一體嚴防東南兵
力漸厚直東一帶兵力尙恐不敷著劉長佑遵奉
前旨於現調兵勇外再行添調扼要屯紮俟賊蹤
竄近卽著嚴飭防兵迎頭攔擊毋稍疏縱此股賊
匪由鄂豫狂竄北趨雖係殘敗之餘尙多著名悍
寇若不亟圖掃蕩其患誠無已時現在各路將弁

均歸僧格林沁調遣務當統籌勝算分派諸軍處
處策應迅殄逆氛儻何路防勦不力卽由該大臣
指名嚴叅重治其罪決不寬貸

二十六日辛酉劉長佑奏言據大名鎮道稟報賊

匪竄至東平境內勢將北渡當卽飛調天津通
永兩鎮官兵一千名馳赴景州又調廣平府知
府楊毓枬棗強縣知縣李秉衡練勇一千名馳

赴威縣又調副將劉景芳參將劉祺管帶馬勇
分巡景州吳橋故城清河一帶臣與臬司李鶴
年連奉

諭旨先後抵威探知該逆由濟南竄向平陰肥城復
回竄東平東阿屬境查平陰東阿均距黃河南
岸不遠臣與李鶴年悉心商度擬先酌撥一二
營前赴元城南樂擇要駐紮以備冠縣朝城一

路兼爲西北防軍策應其東北一路原派天津
通永兩鎮之官兵合駐景州以備德州恩縣一
路並添調海口六營兵五百名飭赴吳橋駐紮
與天津通永官兵就近互相聯絡威縣爲直南
適中之地擬派楊毓耜所部練勇駐紮曲周派
署宣化鎮總兵冷慶所部標兵督李秉衡練勇
駐紮清河相距威縣均祇數十里足成犄角之

勢臣與李鶴年仍察看緩急隨時籌辦奏入

上命軍機大臣傳諭僧格林沁官文劉長佑闔敬銘
沈桂芬張之萬吳昌壽曰劉長佑於抵威縣後探
知該匪竄至平陰肥城又復回竄東平東阿屬境
現擬酌撥數營前赴元城南樂以備冠縣朝城一
路並派天津通永兩鎮之兵合駐景州以備德州
恩縣一路添調海口六營兵飭赴吳橋互相策應

該督駐紮威縣居中調度與曲周之楊毓柎清河
之冷慶等軍相爲犄角所籌布置情形尙屬周密
惟賊氛距黃河南岸甚近直東毗連處所在在可
渡處處須防且爲該逆熟徑誠恐兵以分而見單
一經偷渡勢又蔓延劉長佑惟當督飭在防各軍
確探賊蹤嚴密堵禦如賊蹤竄至東昌臨清卽飭
所派各軍會合東省官軍越境夾擊以勦爲防仍

一面自固藩籬方爲妥善此股賊匪經僧格林沁
跟蹤追剿該逆飄忽靡常聲東擊西乃其慣技僧
格林沁馬步各軍及閩敬銘所派丁寶楨等軍務
須聯絡策應或由南路緊躡或由北路要截總當
將該逆就地殲除實力剿洗毋任擾及畿疆現在
辦理情形卽著該親王迅速馳奏河北衛懷所屬
瀕河地方均可偷渡難保該逆不被剿西馳以圖

北竄屢經有旨諭張之萬嚴密設防現在賊氛密
邇該撫所派防軍能否厚集儻先事漫無準備致
賊蹤擾及完善震動畿疆必惟該撫是問吳昌壽
當懷遵疊次諭旨速行赴豫助剿以便豫省騰出
兵力嚴扼河北之防毋得觀望遷延稍分畛域致
干重咎其楚邊防務卽由官文妥爲調度山西去
賊雖遠其毗連直豫之平定潞澤等處亦當豫爲

籌策以備不虞著沈桂芬多設偵探籌畫布置毋
稍疏忽

上又命軍機大臣傳諭曾國藩吳棠彭玉麟李鴻章
喬松年曰前據吳棠奏豫匪竄至山東泰安一帶
蒙陰亦有賊蹤江北兵力不敷分布諭曾國藩李
鴻章派黃翼升張樹珊吳毓芬等水陸各軍赴援
並令吳棠彭玉麟妥籌截剿現據劉長佑奏該匪

由濟南竄向平陰肥城又回竄東平東阿屬境賊蹤飄忽奔突靡常本日已諭知直隸豫東等省協力防剿嚴扼其四竄之路惟東省地勢平行在在與江北毗連裏下河一帶完善之區斷不可令賊蹤闖入著曾國藩仍遵前旨速撥得力兵勇派黃翼升帶礮船百餘隻到浦駐防李鴻章迅飭張樹珊吳毓芬馳赴邳宿防守不得稍有延緩致誤事

機吳棠彭玉麟於江南諸軍到齊後悉心酌度或
令新到之軍作爲前敵以淮徐各軍分防要隘嚴
密布置務臻妥善總須防剿兼施如賊蹤竄近卽
令前敵各營實力迎剿與東省之兵合力夾擊毋
得稍分畛域以上各節屢經有旨諭知惟恐不能
及早調發是以再三申諭彭玉麟疊次有旨催令
赴任計日當可抵淮務當妥籌調遣以副委任吳

棠在江北日久情形最熟應將一切緊要機宜向
彭玉麟告述其劉銘傳一軍前諭喬松年飭由蕭
場一路前進仍著該撫迅催該提督剋期啟行與
江淮各軍聯絡攻剿勿稍觀望

二十九日甲子李鴻章奏言揚防凱撤經臣於上

年十一月間奏明就近派兵接防現准富明阿
咨報起程赴京適捻逆竄入東境淮徐戒嚴揚

州爲南北衝途亟應布置防範查有按察使銜
江蘇補用道吳毓芬統帶淮勇四營前守溧陽
長興各城戰功卓著業飭卽日拔隊馳赴揚州
擇要扼紮以資保衛又准署兩廣督臣吳棠咨
稱現署淮揚鎮總兵龔耀倫係實任廣東督標
右營參將已奏派隨同赴粵所有實授淮揚鎮
總兵歐陽利見現在蘇州帶兵請飭赴任等因

當因東境捻氛正熾淮防緊要咨令該總兵速
往交替茲據報稱統帶淮揚水師中營礮船四
十號於三月二十二日由蘇拔隊起程赴任
李鴻章又奏言劉銘傳周盛波各軍現留皖防
剿捻逆聞捻馬多而且悍臣軍向在江南專用
步隊陸路剿捻則不利於馳驟據劉銘傳商請
添練馬隊擬派參將崔萬榮帶同馬勇王春德

等赴古北口張家口一帶挑買戰馬五百匹剋
日回營以備急需除咨明兵部外相應請

旨飭部知照各關口將崔萬榮等戰馬按數查驗照
例免稅放行

同日閻敬銘奏言據探賊於三月十七日回竄
甯陽十八九等日由滋陽走曲阜南竄鄒縣二
十一二等日由鄒竄滕復竄嶧縣之韓莊一帶

欲圖渡運僧格林沁追軍已偪遂折向東北直
入蘭山縣屬南趨郟城走贛榆青口出境查青
口東北卽接莒州賊勢飄忽難保不窺東路空
虛復行入境擾及完善之區 臣先已飛檄各營
縣督團堵禦並飛咨青州副都統恩夔嚴爲防
範當賊於十六日渡汶之時丁寶楨先派參將
莫組紳帶勇駐紮甯陽突遇該逆竄至莫組紳

卽於汶河南岸陳家店地方接仗鏖戰多時適
僭格林沁大兵將到該匪始收隊狂奔丁寶楨
聞信卽於十八日自張夏馳抵甯陽追至兗州
而該匪已竄滕縣現賊雖出境難保不再行折
回查東省南界以濟南爲門戶丁寶楨因移紮
該處居中調度惟東之滕嶧蘭郟西之金魚曹
單數百餘里在在須防兵力實屬不敷丁寶楨

已添招勇丁一千名臣擬再陸續選募以資堵
剿至東省各營官兵疲弱已久祇曹州鎮兵調
赴丁寶楨行營者尙屬可用兗營兵丁竟難得
力已令撤回河北一帶河防除臣於水路添設
船勇外復令參將黃兆昇一隊駐紮東昌以控
北路均奏入

上命軍機大臣傳諭僧格林沁曾國藩吳棠彭玉麟

李鴻章喬松年閻敬銘張之萬劉銘傳曰賊由滕
嶧圖渡運河復折向東北由嶧縣奔至蘭山南趨
郟城赴贛榆青口是此股賊匪已出東境海州淮
安一帶俱形喫緊前經疊諭吳棠彭玉麟嚴密堵
截現在賊氛已近尤須加意防勦著吳棠彭玉麟
仍懍遵疊次諭旨選派得力弁兵扼守要隘毋令
一賊一騎闖入腹地仍一面派兵迎頭攔擊如江

南調往之張樹珊吳毓芬等軍到齊即可派赴前敵實力勦洗與東省追賊之兵夾擊以收聚殲之效仍當酌添後路之兵層層接應本日據李鴻章奏已派吳毓芬前赴揚防歐陽利見帶礮船赴江北此時賊已入境著卽迅飭該員等及張樹珊軍飛速前進均歸吳棠彭玉麟調遣揚防亦屬緊要著曾國藩李鴻章另揀得力之員前往鎮撫曾國

藩並嚴飭黃翼升礮船星夜前進不得稍有遲誤
儻赴援遷延致令裏下河等完善地方被賊蹂躪
必惟該督撫等是問劉銘傳一軍前已諭知喬松
年令由蕭瑒進剿刻下賊竄贛榆正可攔截現在
是否起程著劉銘傳遵旨飛速前進不准延緩李
鴻章奏劉銘傳一軍擬添練馬隊之處正恐緩不
濟急著曾國藩李鴻章查明揚防所撤之馬隊如

尙未起程卽著酌量撥給俾該提督管帶馳勦僧
格林沁現已追賊抵滕仍著穩慎進取與江淮諸
軍協勦馬步各隊亦宜稍爲休息養其銳氣毋使
疲乏贛榆一帶水田居多尤須加意慎重不可爲
賊所乘丁寶楨一軍應由何路進取並著僧格林
沁酌量調遣山東所募勇丁認真訓練登萊青等
屬防守緊要青州駐防旗營是否足敷守禦著閩

敬銘妥籌辦理賊氛雖至江北難保不復行回竄
閩敬銘仍當加意防範並飭派出之黃兆昇等嚴
防北路英翰一軍前經喬松年派在雒河集扼守
現在逆匪去皖境較遠此軍及詹啟綸一軍應由
何路防勦著僧格林沁妥籌調度以厚兵力張之
萬仍遵前旨督飭將弁於河南北要隘嚴密防堵
毋稍大意

欽定剿平捻匪方略卷二百二十九 乙丑年

四月初二日 丙寅 僧格林沁國瑞奏言捻逆剽急

靡常三月初十日我軍追至曲阜縣西北該逆
直前抗拒 臣等督飭馬隊衝擊擒斬多名匪勢
不支卽向北竄 臣等以逆衆旣向北趨追剿更
難鬆勁一面飭藩司丁寶楨帶領隊伍馳赴秦
安一帶扼要嚴防一面仍督官軍向北躡追十

三日追至汶河該逆已於十二日偷渡遂飭總
兵陳國瑞郭寶昌等帶領步隊先行渡河賊匪
前股業已竄過鹽河後股之賊因官軍追至聞
風亂竄淹斃賊匪數百名餘匪卽在河北游弋
十五日我軍渡河追勦該逆又向東南奔至岡
上屯回竄汶河以南仍由甯陽曲阜鄒滕嶧各
境漸向南趨遂飭總兵張曜宋慶移紮永城夏

邑以便迎頭截剿並調藩司英翰總兵詹啟綸
移紮徐州探蹤迎擊仍親督馬步馳追該逆悉
由臺莊渡運旋向蘭山郟城各境東竄二十五
日追至贛榆查探賊蹤已由青口南竄遁出東
境查該逆旣由青口向南仍應督軍追剿以防
回竄並飭丁寶楨移紮嶧縣防守惟青口距清
江匪遙已飛咨漕運督臣嚴飭在防各軍探蹤

迎勦並恐該逆被偪西遁圖渡運河已調英翰
詹啟綸由徐州進兵俾前截後追以收夾攻之
效現在餘匪雖屬無多皆係悍黨乘馬狂奔日
趨百餘里我軍緊追已有不及之勢若欲繞出
賊前必須日行二百餘里馬力實有未逮而堵
禦之兵無多又恐爲賊所乘卽如湯聘珍之在
信陽范正坦之在兗州丁寶楨之在甯陽俱因

賊衆我寡接仗失利逆衆前向北竄當因北有
黃河之險足遏賊蹤是以督軍追勦不使停留
今賊旣南趨官軍奔馳半月之久不無疲乏擬
緩程前進以息兵馬之力南路現已有兵堵截
臣等惟有合力進取早蕩寇氛

僧格林沁國瑞又奏言三月二十五日官軍馳
抵贛榆駐紮附郭一帶空閒村莊因人馬無處

覓食派員傳知縣陳繼煥來營以便查詢賊蹤
購買糧草乃該員並不出城旋向官兵開放槍
礮復將查詢賊情及買取食物之兵勇二名誑
入城中人馬均行扣留城上槍礮不絕次日該
員僅遣家丁二名出見並據申稱以士民堅留
守城不能來見當諭知買糧送出卽行發價或
令商賈出城以便公平買賣該家丁回城後陳

繼煥又復不出復派千總何鍾第前往催問詎
城上紳民將其喚至城邊用槍打傷數處其餘
買食兵勇亦被擊傷數名陳繼煥復遣人來營
遞稟據稱本欲遵諭出城行至垛口被百姓擁
回又據紳耆張如松等稟稱愚民恐縣官出城
致生內變伏思 臣等統領馬步官軍追剿竄匪
皆係緊躡賊蹤難以運糧隨行是以到處紮隊

皆傍城寨以便購買糧草接濟軍食今知縣陳
繼煥明知官軍到境閉門深拒並不曉諭紳民
商買賣給軍糧又令紳民擊傷弁兵勇丁多名
種種荒謬實出情理之外相應請

旨將同知銜署贛榆縣知縣陳繼煥卽行革職拏問
交吳棠提同該邑紳民詳加審訊從重懲辦並

請

飭下該督撫通飭各地方城寨官紳遇有官軍經過
不得擅開槍礮並將糧草一切公平買賣以利

師行奏八

上命軍機大臣傳諭僧格林沁曾國藩吳棠彭玉麟
李鴻章喬松年張之萬閻敬銘曰賊匪由嶧縣臺
莊渡運向蘭山郟城各境東竄業已遁出東境僧
格林沁追至贛榆縣地方馬力已乏自應稍爲休

息且由北而南地多水田馬隊亦未能馳騁不可
再令冒險前進與賊相持僧格林沁務當穩慎進
取先令步隊追賊而以馬隊從平曠地方截其回
竄方爲妥善江南派往淮揚之張樹珊吳毓芬兩
軍歐陽利見所帶礮船及疊諭派防江北之兵著
曾國藩李鴻章飭令速赴江北並嚴飭黃翼升礮
船星夜前赴裏下河一帶吳棠彭玉麟仍當相機

調度嚴密扼守駐紮永城徐州之張曜詹啟綸等
軍著僧格林沁飭令探蹤迎剿並飭劉銘傳懷遵
前旨由蕭碭一帶往東迎擊兼防贖匪回向西竄
之路其雒河集及歸德一帶仍著喬松年張之禹
一體嚴防閻敬銘亦當檄令丁寶楨等扼守本境
毋任賊蹤回竄前據閻敬銘奏稱范正坦挫敗情
形並未言及丁寶楨在甯陽遇賊接仗失利之事

卽著該撫查明具奏知縣陳繼煥於僧格林沁督
兵追至贛榆旣不遵令出城又不聽購買糧草並
任紳民將買取食物之兵勇扣留槍傷差弁實屬
荒謬著卽革職拏問交吳棠彭玉麟提同該邑紳
民審訊並將擊傷官兵之人從重懲辦江北州縣
疲玩已久此後該省督撫務當嚴飭該地方官並
各團寨紳民查明官軍經過時不准擅開槍礮並

聽軍士與商民將糧草公平購買毋許阻撓致誤
軍行

初三日丁卯曾國藩奏言現在豫捻竄擾山東蔓

延曹濟至於曲阜勢極飄忽若折而南向一入

江境防不勝防而徐州清江尤爲喫重臣前聞

豫逆逼近徐州之信卽調駐防鎮江之樹字六
營移赴徐州而李鴻章亦調該軍移紮清江兩

處相隔三百餘里勢難兼顧欽奉

諭旨飭防徐宿裏下河等處臣卽日會商李鴻章札
飭樹字六營專駐清江另檄現駐六安之劉銘
傳周盛波兩軍移防徐宿與東兵收夾擊之效
奏入報

聞

同日兵部右侍郎彭玉麟奏言臣復奉

恩命飭臣迅赴漕運總督署任臣自度褊急之性迂
愚之識羸病之軀斷難勝此巨任若強不能以
爲能譬猶責弱者以舉重命跛者以疾行其爲
顛躓可立而待與其僨事追悔何若量分瀆陳
伏乞

天恩另行簡員署理漕運總督並開兵部右侍郎本
缺俾臣以閒員效力軍中料理長江水師善後

事宜實爲至幸抑臣更有請者現在粵東淮北防堵均極緊要臣未能赴淮吳棠卽未能交卸赴粵此次重申前請若

皇上責臣以必行臣惟有負罪再辭臣因此而獲嚴譴固屬咎有應得而兩處軍務未免耽延貽誤實非淺鮮惟有仰求

聖慈曲諒允臣所請庶幾臣一身幸免隕越之咎而

粵淮兩地速得主持之人不勝戰慄屏營之至
奏入

上諭曰覽奏情辭懇摯出於至誠彭玉麟著准其開
漕運總督署缺所有長江水師善後事宜仍著該
侍郎妥爲料理

初四日戊辰吳棠奏言據邳州探稱三月二十日

東境股匪由鄒滕至臺兒莊地方竄擾又據遊

擊張保聖稟稱在邳北四戶地方遇賊邊馬二百餘人經該遊擊帶勇邀擊殺賊十餘名又據總兵姚廣武報稱該匪邊馬竄至臺莊運河北岸經該總兵帶勇截退賊由邳州北走沂州府蘭陵紅山蘭山李家莊一帶繞竄海州等處姚廣武卽帶步隊馳往宿遷會合張從龍一軍堵截又據海州贛榆沭陽各州縣報稱三月二十

五日均有匪蹤竄擾約計三四萬人臣查該逆現已竄至海州該處南接清淮東南則趨鹽阜皆爲裏下河最要門戶兵力實屬不敷臣現抽撥副將汪陞發等帶礮船二十號並派遊擊扎拉芬等帶漕標兵五百名道員郭禮圖等督率團練嚴守鹽阜之射陽湖馬家蕩等處先顧裏下河又派總兵姚廣武帶馬步隊一千餘名馳

赴汴陽截勦遊擊滕國棟等帶礮船四十號駛
入安東鹽河防守又調總兵張從龍帶隊駐紮
王家營以扼鹽河之險所有清江兩岸土圩仍
留運司李元華等統帶勇練防守至前與曾國
藩李鴻章函商調撥之總兵歐陽利見已據報
稱三月二十二日起程道員張樹聲等軍臣已
疊次飛催計應陸續前來此時賊衆兵單情形

萬緊臣惟有就現在兵力分投扼截不敢稍涉
大意

吳棠又奏言臣蒙

聖恩簡署兩廣總督清淮士民紛然驚駭僉謂此間
寇警可虞而臣去尤可慮此固閭巷無識之談
不足置議惟臣念賊氛逼近無論議戰議守先
須內定民心方可分籌禦侮此時清淮兵單出

擊則不能留守各城圩防守事宜悉資民力若
人情惶惑心志不堅因此稍有貽誤是 臣咎戾
彌深且署漕運督 臣彭玉麟專力戎行不欲復
任吏事聞已連疏請辭諒邀

聖允合無仰乞

天恩收回 臣署任兩廣總督

成命俾 臣得專辦清淮防剿兼使江北士民同心協

力無所猶豫實於軍務大局裨益不淺奏入

上命軍機大臣傳諭僧格林沁曾國藩吳棠李鴻章
彭玉麟曰現在賊在海州境內吳棠派汪陞發等
分守鹽阜之射陽湖馬家蕩等處布置均屬周妥
惟賊衆兵單前敵旣難操勝算後路亦深慮空虛
歐陽利見雖可卽日到淮張樹聲張樹珊等軍何
以尙未起程著曾國藩李鴻章飛催前進以厚兵

力吳棠於諸軍到淮時相機調度力保裏下河完
善之區方爲不負委任陳國瑞詹啟綸等軍於該
處地勢均能熟習著僧格林沁催該總兵等繞前
夾擊輔以馬隊勿令回竄東省此時揚防喫緊會
國藩當與李鴻章力籌添兵保衛該督撫應否出
省前赴江北督剿之處並著酌量辦理迅速馳奏
如裏下河被賊蹂躪惟該督撫等是問劉銘傳一

軍已據曾國藩奏稱調赴徐宿著卽嚴催前進如
仍觀望不前致賊蹤日肆滋蔓卽將該提督從重
叅辦昨據彭玉麟奏力辭署理清督已有旨俯如
所請該員現仍以兵部侍郎總統水師著卽迅撥
輕利礮船數十號前赴清淮一帶嚴防如能親自
統帶前來會同吳棠辦理勦匪事宜更爲得力該
侍郎接奉此旨卽著妥籌辦法吳棠奏清淮士民

聞該漕督有赴粵之信紛然驚駭懇辭著理兩廣
總督專辦清淮防勦具見體國公忠不肯避難就
易深堪嘉尙吳棠仍著暫留漕運總督本任俟此
股賊匪一律掃除再赴兩廣總督署任

初五日己巳河南巡撫吳昌壽奏言現在賊匪既
經北竄東省曹州等處距楚愈遠僧格林沁又
經帶兵北向亟應遵奉

諭旨卽日督兵馳赴豫境臣現派甘肅安肅道蔣凝
學一軍由隨州進紮確山提督姜玉順一軍由
九里關移赴正陽臣親帶提督譚仁芳一軍直
抵信陽審定賊蹤相機截剿所有籌兵轉餉各
事宜俟抵豫境後隨時咨會河南撫臣張之萬
及督臣官文合力通籌用資接應至楚省邊防
仍留提督成大吉等營照舊扼紮察看前路軍

情再行酌調再前經陝甘督臣楊岳斌調赴甘
省之蔣凝學一軍現駐隨州去豫甚近是以調
同前進伏乞

俯准將蔣凝學所部留歸臣營調遣以資臂助奏入
上命軍機大臣傳諭官文楊岳斌吳昌壽曰本日已
降旨命張之萬署理河東河道總督吳昌壽調補
河南巡撫鄭敦謹補授湖北巡撫吳昌壽身任豫

撫該省防勦事宜責無旁貸現在賊匪雖由山東
逸入江北之海州贛榆難保不復行回竄卽著吳
昌壽探明何路有賊卽由何路進勦掃蕩逆氛並
將各處伏莽次第殲除至豫省吏治廢弛已久該
撫到任後務須加意整頓並實行團練使官爲經
理與民同心保衛姜玉順譚仁芳等軍並著吳昌
壽檄令趕緊進紮妥爲布置賊蹤雖去鄂愈遠惟

該逆剽疾異常楚省邊防仍未可稍涉大意著官
文督飭成大吉等營扼要嚴防妥爲備豫蔣凝學
一軍仍著楊岳斌催令迅赴肅州如豫省兵力不
敷卽著吳昌壽咨調得力楚軍合力會剿

初八日壬申吳昌壽奏言臣於四月初一日行抵

信陽州城卽催前調各營迅速進拔相機辦理
惟近據探報並接在籍侍郎臣毛昶熙來信以

捻股盡竄東境濟甯一帶豫境並無餘孽等語
現應如何防剿當咨商河南撫臣張之萬熟籌
妥辦奏入

上諭曰該撫已調任河南巡撫著懷遵四月初五日
諭旨認真妥籌辦理並著嚴飭在防之湯聘珍等
軍會同河北鎮道嚴防要隘實力舉行團練以杜
該匪回竄之路

初九日癸酉吳棠奏言逆匪竄入海沭一帶經臣

分路派隊嚴守城圩壘據海州贛榆沭陽各州
縣稟稱賊蹤來撲均經兵團固守斷賊擄掠復
經親王僧格林沁督令總兵陳國瑞帶隊追剿
三月二十七日在海境之房山地方擊賊獲勝
二十八日進紮沭陽二十九日賊由沭陽西竄
臣派副將閃鳳來隨同總兵張從龍等由運河

北岸西進防賊竄越運河總兵歐陽利見帶礮
船四十隻於四月初一日到浦業經督臣曾國
藩飭該總兵撥礮船二十隻暨副將龔耀倫等
所帶礮船三十隻統令馳赴邳宿扼防運河是
日賊由沐境西竄由唐店祠嶧等處徑竄窩灣
一帶希圖渡運經兵勇截擊賊又折向西竄親
王僧格林沁由沐陽督師西追竄匪初一日已

抵宿遷縣北之崑崙驛該逆折走呂家湖西竄
邳境臣查此起匪股剽急異常步隊追勦往往
不及前派參將吳鳳柱帶馬隊一百名現又派
副將楊文全帶馬隊二百名馳赴總兵陳國瑞
軍營隨同追賊如賊出境亦令出境追擊又調
總兵趙三元帶礮船三十餘隻駛入邳宿運河
徑赴東境之臺兒莊韓莊一帶防賊偷渡其餘

陸軍俟江南援兵到齊悉令進紮邳宿一帶跟蹤會剿不敢稍分畛域至道員吳毓芬一軍派赴揚州現已到防已經撫臣李鴻章飭令在揚紮定應請

旨飭令毋庸北來總兵張樹珊一軍已報由鎮江北渡提督黃翼升水師到浦臣卽催令前進又據宿遷縣稟稱總兵詹啟綸一軍四月初二日行

抵邳州已函囑其趕赴僧格林沁軍營聽候調遣

吳棠又奏言清淮向無水師自黃開榜礮船到淮後遂可顧及邳宿山東黃運兩河未設河防以致捻逆乘閒竄越似應添調水師徑扼河險偪賊黃運之間以期一律戡定臣現派清淮各礮船儘力分防邳宿運河所有長江提督黃翼

升調浦水師計日將到臣一面商之督臣卽飭
黃翼升所部礮船先赴山東運河察看防守處
所可否

飭下曾國藩添撥礮船百餘號統交黃翼升管帶兼
領山東黃河入直之路至山東河道因糧艘卽
日北上聞已開工挑濬仍請

飭下鄭敦謹閻敬銘迅查該省河道何處淺阻趕緊

挑通以便舟師往來惟捻股晝夜狂奔恐運道
縣長赴防不及請將此起水師留紮濟甯一帶
以免賊蹤再行竄入奏入

上命軍機大臣傳諭僧格林沁曾國藩吳棠張之萬
彭玉麟李鴻章喬松年閻敬銘吳昌壽曰捻匪竄
撲海州贛榆沐陽僧格林沁飭陳國瑞追擊獲勝
賊由沐陽西竄峒崕等處徑竄濰灣希圖渡運現

又折走呂家湖西竄邳境雖經兵練節節勦辦總未大挫兇鋒吳棠現派吳鳳柱等隨同陳國瑞追勦詹啟綸軍亦已抵邳著僧格林沁督飭該總兵等兩面夾擊痛挫賊鋒該親王馬隊如遇山路水田仍宜慎重進取劉銘傳一軍著曾國藩喬松年嚴飭迅赴徐邳一帶勦辦該提督現已行抵何處曾否接仗著該督撫查明具奏如逗留不進以致

賊氛肆擾卽行從重叅處吳棠仍催趙三元管帶
礮船駛赴臺兒莊韓莊一帶防賊偷渡一俟江南
援兵到齊悉令進紮邳宿探明賊蹤越境會勦山
東黃運兩河未設河防黃翼升水師計可到浦著
曾國藩添撥礮船百餘號歸黃翼升統帶彭玉麟
仍遵前旨帶領水師輕利礮船均著由浦入東兼
顧山東黃河入直之路現因糧艘北上河道業已

挑濬著張之萬圖敬銘查明何處淺阻趕緊挑通
以便舟師來往逆匪晝夜狂奔恐運道縣長赴防
不及卽可將此起水師留紮濟甯一帶以防逆蹤
再有竄越並著該提督等妥籌調撥安徽山東防
務喫緊喬松年務當督飭各軍嚴防蒙宿等處與
劉銘傳實力勦洗閩敬銘督飭丁寶楨等扼紮要
隘勿任再行回竄河北之防不可不嚴吳昌壽卽

赴豫省相機調派並飭河北鎮道等嚴密防範河
標兵弁著張之萬整頓調派防河不可有名無實
吳毓芬一軍已到揚防著李鴻章吳棠卽飭該道
在揚鎮撫張樹珊等軍仍著曾國藩李鴻章催令
迅速到浦歸吳棠調遣邳宿軍情著僧格林沁吳
棠等隨時馳奏

十二日
丙子李鴻章奏言前准漕臣吳棠來咨商

調吳毓芬赴浦策應臣以揚州關繫緊要吳毓芬兵力本單未可遠離因派現守鎮江之總兵張樹珊統帶所部馳赴清江據報已於四月初一日自鎮渡江又准督臣曾國藩咨派道員張樹聲前往淮徐督勦臣卽飭該道員於三月二十九日起程北去連准吳棠咨函捻逆大股竄至邳州沭陽境內清江萬分喫緊臣又嚴飭張

樹聲張樹珊等兼程赴浦總兵歐陽利見所部
礮船四十號計亦早抵清江得此水陸兩軍合
之淮徐原防兵勇分布扼剿裏下河門戶當可
保固該逆不得逞於海汰恐將由徐邳回竄蒙
亳准會國藩咨會已調直隸提督劉銘傳會同
提督周盛波等統率所部由六安臨淮徑赴徐
宿一帶防剿 臣 又屢催該提督等迅速拔營迎

頭堵截以遏兇鋒

同日閩敬銘奏言據各路稟報擒匪南竄僧格
林沁追至贛榆該匪復遁海州三月二十七日
擾及沐陽大軍跟追抵沐四月初二日賊復折
向邳境奔走查邳境沿運西行卽近東境嶧縣
臺莊韓莊地面其時藩司丁寶楨先聞賊至贛
榆慮其回竄統帶全軍馳赴沂州爲迎截之謀

其韓莊等處祇有參將王心安一營殊覺兵單

臣令丁寶楨相度機宜兼顧滕嶧西路又飭沂

州府知府文彬等將添募新勇一千二百名並

舊有額勇分布於蘭山蒙沂各要隘以防竄越

該匪因運河水深不能偷渡連日在邳州之沙

湖集梁山一帶肆擾初四日僧格林沁追至邳

境該匪復由紅花埠南東入海州之桃林初六

日竄至贛榆東安莊等處 臣揆度逆情現在邳
沭海曠數百里平坦之地往來奔突勢將爲大
兵所躡非向北而西再竄東境之嶧滕卽由北
而東再竄東境之蘭莒 臣於嶧滕一路飭丁寶
楨分軍堵截於蘭莒一路飭沂州府縣扼要設
防現復派都司韓登泰帶勇五百名由省東一
路馳赴諸城莒州日照一帶扼守險隘期與沂

境聯絡聲援力保完善之地青州爲屏翰要區
臣已咨會副都統恩夔調兵守禦東昌一帶
張玉懷宋憬詩之夥黨王振聲將欲糾衆起事
卽經該府縣與參將韋應麒密拏正法均奏入
上命軍機大臣傳諭僧格林沁曾國藩劉長佑吳棠
彭玉麟李鴻章喬松年閻敬銘吳昌壽曰此股竄
匪經僧格林沁追剿由海沭折回邳境復竄贛榆

東安莊等處往來奔突已成窮寇無歸之勢會國
藩李鴻章所派張樹珊等水陸各軍業已起程尅
期當可抵滬劉銘傳周盛波等部亦由六安徑赴
徐宿是南路兵力厚集卽著吳棠於各軍到後相
機調遣與僧格林沁大軍聯絡夾擊並酌量分撥
水師於濟甯一帶扼紮杜賊沿河上竄之路僧格
林沁現已追賊至邳著督飭馬步各軍乘勢力勦

仍穩慎進取將此股逆匪一鼓殄除無令再行回
竄如兵力不敷卽催英翰詹啟綸等軍到營從北
兜剿與江南派援各軍合力夾擊該處東濱大海
若能三面蹙之必可就地殄滅僧格林沁當嚴密
調派無失機會東省嶧滕蘭莒各處與邳贛壤地
緊接著閩敬銘嚴飭丁寶楨韓登泰兩軍實力防
守並著僧格林沁妥籌兼顧彭玉麟仍遵疊次諭

旨帶領輕利礮船由浦入東阻遏河險其河道淺
阻之處並著咨會張之萬趕緊挑濬現在水師僅
有歐陽利見一軍赴浦尙形單薄著會國藩等迅
催黃翼升礮船星速前進扼要設防豫省河南北
各處防務著吳昌壽嚴密布置並將境內餘孽力
籌掃蕩直隸距賊較遠而大名等處防堵亦未可
稍鬆劉長佑仍當檄飭將弁認真防範青州一帶

爲濱海要區著閩敬銘咨會恩夔豫籌布置宋憬
詩等夥黨王振聲糾衆圖亂經閩敬銘密拏正法
尙爲妥速仍當督飭各屬地方官嚴密訪拏以消
伏莽皖北蒙亳地方衝要著喬松年調派得力將
弁妥籌守禦

同日湖北巡撫鄭敦謹奏言昨據濟甯州探報
前竄泰安賊匪復竄滕縣三月二十三、四等日

竄往韓莊現在大兵追勦等情查此股竄匪飄
忽靡常難保其不再回竄臣當卽挑選兵丁在
沿河要隘各處設卡巡防並分飭沿河府州縣
於渡口及水淺處所多派丁役往來梭巡將渡
船提歸北岸一面移咨河南撫臣張之萬轉飭
所屬並派撥標兵一體設防奏入報

聞

十四日 戊寅 署河東河道總督張之萬奏言捻股

由蘭山郟城各境東駛直竄贛榆青口海州淮
安一帶均形震動逆蹤飄忽無常現雖蔓延江
北難保不復行回竄所有直東皖豫邊防猶當
慎益加慎以防該匪乘隙闖入 臣 已飭張曜迅
速整備俟僧格林沁檄調到日卽督所部前進
聽候調遣惟豫境邊防尙須嚴爲之備所有留

防之軍仍駐永夏一帶聯絡皖軍以資堵扼臣
猶慮張曜出境後宋防兵單又將知府湯聘珍
一軍飭由考城移紮永夏與宋郡留防各軍協
力扼堵以顧東陞北路毗連直東亦未敢稍形
疏忽臣已飭河北鎮總兵楊長春挑選精壯兵
丁由懷慶馳赴內黃滑濬封邱一帶會同崔廷
桂等馬步各營及地方官於沿河渡口上下梭

巡嚴禁私渡並約直省官兵常川會哨邊境當
可無虞奏入

上諭曰所有豫省河南北防務昨已諭吳昌壽嚴密
布置並將境內餘孽力籌掃蕩仍著張之萬俟吳
昌壽到省時將防勦情形詳細告知其挑濬河道
事宜並著張之萬實力辦理

十五日己卯劉長佑奏言查直省之天河兩府屬

與山東之武城夏津恩縣陵縣德平樂陵陽信
海豐各州縣接壤大順廣三府屬與山東之邱
縣館陶莘縣朝城觀城濮州曹縣荷澤定陶臨
清等處均屬交界袤延千餘里無險可扼在在
宜防設將在營兵勇全數分布邊境該逆或乘
閒北竄則我軍皆落其後且備多力分非於適
中之地留重兵以資應援亦恐未能遏狂寇之

衝突臣現於威縣城內留駐兵勇一千餘名附
近威縣之曲周清河屬境共駐兵勇二千餘名
均可臨時調集親督前往爲各路應援惟開東
長防軍距威較遠又飭副將崔福泰新募壯勇
五百名益以原調大名練兵五百名駐防元城
縣屬小灘地方兼以開東長防軍策應並咨署
提臣徐廷楷在抽練兵內選備六百名聽候調

遣茲據僧格林沁邳州來函該逆於四月初二日竄赴邳州經官軍趕至正欲迎勦復由東北遁過沂河折由紅花埠向東南而逸竊思該匪趨向無定若竄青萊窺伺武定則直界之東北可慮若擾堯沂蔓延東昌曹州臨清則直界之西南喫重臣已飛飭各營帶兵官暨大名天津鎮道分路偵探如遇賊氛逼近務卽督率防兵

聯絡鄉團會合東省兵勇實力迎擊 臣仍隨時
體察情形調度策應以期有備無患奏入

上命軍機大臣傳諭僧格林沁會國藩劉長佑吳棠
李鴻章喬松年吳昌壽闡敬銘曰直隸地勢平行
無險可扼自應於適中之地厚集兵力以遏奔突
劉長佑現於威縣城內及曲周清河屬境一帶各
駐兵勇策應辦理尙屬周妥著卽督同臬司李鶴

年嚴密巡防毋稍鬆懈此時海州贛榆一帶當又
喫緊該匪被追窮急難保不由海口覓船遁入外
洋著吳棠督飭該地方官將海州贛榆等處海口
船隻先行提往他處毋爲該逆搶擄歐陽利見水
師業已起程赴浦黃翼升帶船仍著曾國藩李鴻
章迅催前進均著歸吳棠調遣一面嚴堵裏下河
各路一面嚴扼海口以杜紛竄張樹珊等軍計可

抵浦卽著吳棠督令張樹珊等與江北清浦所派
諸軍分投堵截沂郡日照等處海口卽由閩敬銘
設法嚴防兗沂曹陸路亦由閩敬銘督飭丁寶楨
韓登泰兩軍實力防守至賊匪竄向東南偏近海
滋僧格林沁正當乘此機會嚴飭各路援軍同時
並舉聚而殲旃劉銘傳周盛波兩軍已由六安徑
赴徐宿卽著吳棠飛速迎提飭令會合僧格林沁

之軍夾擊以期一鼓殄除英翰詹啟綸等軍亦可
由僧格林沁酌量添調此股逆匪蹤跡飄忽經官
軍痛勦難保不回竄皖豫喬松年吳昌壽務當於
交界處所分布兵勇嚴密扼守毋令匪蹤闖入

十八日壬午吳棠奏言捻股因官軍繞紮邳境又

由官湖等處回撲宿遷經遊擊張祖雲擊退賊
遂以大股盤踞宿境並宿沐交界之高流等處

零股邊馬分竄宿境沿運之窩灣阜河一帶意圖搶渡臣卽飭副將龔耀倫帶礮船三十號嚴防邳境之黃林莊灘上窩灣等處調回總兵趙三元帶礮船三十號嚴防阜河順河集等處並派總兵歐陽利見暨提督張光泰等各水師均赴邳宿境內併力防河四月初五六等日屢有賊馬衝至運河北隄經各水師隨時扼截屢有

斬擒賊復北趨新安鎮及郟境之紅花埠一帶
初九日僧格林沁督率各軍由郟境馳赴紅花
埠擊賊賊遂由紅花埠向北敗竄據郟城縣知
縣周士溥稟稱賊由該縣城西向北竄去道員
張樹聲總兵張樹珊於初六日帶勇到浦正值
賊股回撲宿沐清淮各隊悉赴上游深慮賊從
沐陽繞撲清淮得此一軍填紮後路足資守禦

提督黃翼升於初九日到浦卽赴邳宿一帶查
勘河道侍郎彭玉麟又撥總兵喻俊明帶水師
一營赴射陽湖扼守裏下河門戶惟臣處騎兵
無多昨已派副將楊文全等帶馬隊三百名赴
總兵陳國瑞營中隨同追賊現在江南調來樹
字營勇全係步隊追賊勢所不及臣現令張樹
聲等軍進紮嶧縣之韓莊地方進可與東軍合

力擊賊退可與水師聯絡斷賊竄越之路張從龍等軍駐紮邳宿之間或顧運河或顧清淮統俟臨時調派以臻周密

同日喬松年奏言捻匪由徐沂交界竄擾沐陽贛榆等處仍圖向西南奔竄清淮既有兵堵禦賊勢如折而西趨宿州泗州皆當其衝現據道員顏培瑚稟稱邳州宿遷之間已見賊蹤

臣卽

飭英翰一軍由雒河進紮宿州嚴扼要隘並派
張得勝所部由六安移紮泗州聯絡嚴防又派
原駐正陽之朱淮森所部並淮河水師礮船移
紮臨淮力顧東路劉銘傳一軍已於四月初八
日由六安拔隊路過壽州臣與之籌商機宜以
賊勢漸趨西南定由臨淮泗州赴徐州一帶進
擊俾期便捷該提督現已由壽起程至賊蹤飄

忽靡常徐宿皆屬喫重宿州爲皖省極要之地
賊若西趨必由此路窺伺現在劉銘傳及提督
周盛波進剿之軍計共一萬五千人合以詹啟
綸所部又數千人在徐州一帶兵力不至單薄
若英翰再行出境轉致有追兵而無迎剿之兵
此時英翰一軍自應仍紮宿州臣已飛飭英翰
等務與僧格林沁各軍前後夾擊以收合剿之

效

同日閻敬銘奏言據報四月初七八等日賊在
郟城之南唐店一帶盤踞勢向西南窰灣欲渡
運河初九日復由郟城之西南折向西北初十
日竄至蘭山西南其時僧格林沁大軍跟追臣
因賊勢西趨則日照諸城一路可以稍鬆惟該
逆非由蘭費北竄蒙陰必由西路直撲嶧滕先

飭沂州府知府文彬等帶勇嚴防並在青駝寺
撥勇分紮賊果於初十日竄至嶧縣西南之褚
頭林是蒙陰北路無虞而西路獨爲喫緊藩司
丁寶楨先自蒙陰探聞賊信連夜由小路繞出
鄒縣進發以期迎頭遏擊是日行抵滕縣因查
大泛口水淺灘高賊西犯則必偷渡北竄則滕
邑正當其衝當經丁寶楨分撥參將王心安一

軍由臺莊進紮大泛口丁寶楨由滕縣之臨城
驛迎擊十一日進紮臨城該逆竄至大泛口經
王心安扼要截殺斃賊百餘名遂折向正北直
犯臨城先經丁寶楨分撥各隊扼紮該處遏賊
來路十二日該匪邊馬直撲臨城五十里之
西村橋經我軍追逐折回賊之馬步大股全向
北路奔竄都司楊西林等帶隊馳進斃賊六七

百名續有馬賊數千接撲橋口經參將莫組紳
開礮轟擊斃賊百餘名該逆折向西趨復經參
將宋廷德等衝殺另股馬賊又繞由西路抄襲
我軍前後受敵都司楊酉林等戰歿於陣弁勇
多有傷亡旋經丁寶楨督軍追壓該逆直向正
西狂奔我軍均係步隊馳逐莫及是日之戰共
殺賊千餘名生擒四十餘名臣現飭該藩司整

齊隊伍由鄒滕一路繞赴東平防賊北竄此次
在臨城驛陣亡之都司楊酉林等均請

旨交部從優議卹均奏入

上命軍機大臣傳諭僧格林沁劉長佑吳棠張之萬
喬松年闔敬銘曰逆匪自竄擾海沭後南路兵勇
雲集又有僧格林沁盡力躡勦該逆不得逞志於
東南勢恐折而西北是以前諭僧格林沁督飭馬

步各軍從北堯勦無令回竄茲覽閩敬銘所奏賊由郟城蘭費竄至嶧縣西南之褚頭林等處官兵接仗受傷現在該逆由嶧縣邊界西趨兗濟正當其衝丁寶楨向稱知兵是以該撫令其出省勦賊現既退守東平去賊已遠兗濟一帶並無得力兵勇駐紮此時賊勢縱橫毫無阻遏其將何所底止著閩敬銘遴選得力將弁於兗州濟甯一帶分投

設防遇賊卽擊一面檄令丁寶楨穩紮東平防賊
北竄僧格林沁聞賊北竄之信諒已督隊跟追仍
著該親王繞出賊前督飭將弁並東省兵勇極力
兜勦將賊偪向東南庶可與淮徐之兵聯絡擊賊
以收聚殲之效邳宿清淮一帶防軍業經吳棠分
路布置兵力已厚著督飭各軍嚴扼水陸要隘儻
賊勢南趨卽令各路兵勇隨處翦除毋任旁竄運

河水師礮船如能由運入黃驥至東明長垣一帶
亦可輔陸路兵勇所不及著吳棠等斟酌情形妥
籌辦理吳棠前擬於濟甯一帶派撥得力師船駐
紮遏賊由黃運上竄之路已有旨照所請行此時
賊氛甚緊著卽迅速調撥毋落後著直隸大名一
帶在在與東省毗連前據劉長佑奏已於威縣曲
周清河各境調兵駐防著該督檄令在防兵勇實

力遏截毋稍疏懈河標兵弁著張之萬抵署任後
訓練調派分段設防以期周密賊匪分竄靡常宿
州當扼要之地防守不可不嚴喬松年已飭張得
勝移紮泗州朱淮森移紮臨淮並催劉銘傳拔隊
赴徐該提督到徐州後應卽分軍出境迎擊該撫
業經函商僧格林沁令英翰仍紮宿州著卽照該
撫所擬辦理以期得力山東臨城驛陣亡之都司

楊西林守備郭齡鼇黃松亭千總馬連勝馬芳洛
把總董富經劉登鼇張懷義趙廷棟劉懷清外委
侯賡昌均著交部從優議卹

Table with 10 columns and 1 header row. The header row contains faint, illegible text.

欽定剿平捻匪方略卷二百三十 乙丑年

中央民族
學院圖書

四月二十日 甲申 沈桂芬奏言豫匪由考

東境優及濟甯等處飄忽靡常晉省之平定遼
州地要兵虛亟應及早籌備當調前駐平陽之
省標精兵五百名飭令馳赴遼州並檄孟壽營
挑選精兵三百名就近防守平定各該處距省
較近將來如須添兵或派大員督防由省遣往

集賢堂卷之三十三
一
可期迅速惟潞澤兩府防堵設遇緊要不可無
武職大員督辦總兵和昌久駐茅津現無要事
擬令暫回平陽將沿河防兵酌量抽撥千名策
應東路並可南顧河防其茅津等處防兵查有
副將王巨孝熟悉情形堪以接替統帶仍飭河
東道楊寶臣隨時會商辦理以昭慎重奏入報

聞

二十一日酉乙吳昌壽奏言臣思豫省軍務緊要

於四月十五日卽由信陽赴省現在捻逆竄入

江北一帶剽疾異常楚邊留防之成大吉等軍

臣已咨交督臣官文督率辦理湖北巡撫關防

前經臣奏帶軍營茲旣前赴河南新任未便長

途攜帶擬委湖北候補知府富龍武等齎交督

臣官文暫爲接收俟新任撫臣鄭敦謹到日就

近轉交至姜玉順所部九營因勇隊較衆轉餉
多艱當與臣前帶湖北標兵分別回防歸伍譚
仁芳四營隨帶前行益以豫省舊募各勇兵力
已敷防勦奏入

上諭曰該撫抵任後務將豫省吏治軍務加意整頓
以副委任

二十二日

丙戌

李鴻章奏言據張樹聲張樹珊等

稟稱行抵清江適捻股回竄邳州沭陽境內清
淮空虛該軍暫紮河北並准漕臣吳棠函稱邳
宿運河已將各水師扼防清淮原防陸軍悉數
派赴宿北堵剿應令張樹聲等暫防裏下河門
戶俟劉銘傳等大隊到齊即可相機並進又據
宿遷縣知縣吳元漢探稟捻逆經官軍擊敗向
山東鄆城馬頭集西北一帶逃竄各等語查從

前擒竄海州時吳棠已商調水陸各營分布扼
守嗣回竄邳沐界內距清淮將及二百里黃翼
升暨歐陽利見等水師與張樹聲等陸軍先後
趕到劉銘傳周盛波自六安分起拔營亦剋期
可至聲援旣壯賊蹤愈遠裏下河斷可無虞卽
淮徐各郡亦可保守臣籌兵籌餉頭緒紛煩未
便遠離省城惟隨時會商督臣漕臣妥爲調度

並飛催劉銘傳周盛波張樹珊等相機前進會
合兜剿以期顧全大局奏入

上命軍機大臣傳諭僧格林沁曾國藩劉長佑吳棠
李鴻章喬松年圍敬銘劉銘傳曰捨股現由山東
滕嶧邊界西趨有直撲兗濟之勢黃翼升歐陽利
見等水師李鴻章奏稱已據吳棠先期調撥分布
扼守惟賊竄兗濟卽距直境甚近直隸威縣曲周

清河等處防兵三千餘名元城縣防兵千名深恐
兵力單薄不敷堵禦劉銘傳及周盛波所部各勇
共一萬數千人兵力有餘畿輔地廣兵單防堵正
關緊要著劉銘傳卽於所部勇丁挑選精銳數千
帶赴直隸與劉長佑會商分布直東交界地方嚴
密扼防以固畿疆門戶應給餉需著吳棠李鴻章
迅速籌款豫行撥給此軍行抵東境並著閻敬銘

竭力籌措餉需東海關稅銀闔敬銘亦可酌提撥
解以濟此軍食用劉銘傳本係直隸提督該省防
務責無旁貸務當懍遵諭旨統兵北行毋許稍涉
遷延張詩日已簡放宣化鎮總兵直隸帶兵需人
著曾國藩迅飭該員馳赴劉長佑軍營聽候調遣
河閒景州一帶與山東恩德等處毗連劉長佑前
調天津通永兩鎮兵一千名駐防景州並調海口

兵五百名駐防吳橋兵力仍恐單弱劉銘傳抵直
後應如何添兵分布之處仍著劉長佑酌量籌辦
劉銘傳周盛波所部勇丁著劉銘傳帶赴直隸外
所餘兵勇仍著曾國藩李鴻章吳棠迅速派員接
統由徐州一帶探明賊蹤所向迎頭截擊詹啟綸
一軍尙有數千徐州一帶兵力儘敷勦辦著僧格
林沁吳棠飛速迎提以資攻勦現在北路空虛僧

格林沁務當繞向北路偏賊南趨毋令竄入畿輔
黃河一帶仍著劉長佑閻敬銘嚴密防堵淮徐邳
宿等處著吳棠喬松年責令在防將士力行堵遏

二十三日丁亥曾國藩奏言查裏下河以清淮爲

屏蔽又以揚州爲後路臣於三月二十七日巡
歷江面先至鎮江繼至揚州察看各營布置揚
防向有萬餘人此次吳毓芬部下僅二千人尙

嫌力薄自不可更移他處因催張樹珊統帶樹
字六營護軍一營於四月初一日由鎮江拔隊
起程臣亦於初三日由揚州回省檄令黃翼升
帶張光泰等營於初五日駛赴清江旋准吳棠
函稱歐陽利見於初一日到清江浦防所張樹
珊張光泰均於初六日到防張樹聲自蘇州起
行於初八日到防黃翼升於初十日到防援軍

四集裏下河一帶當可無虞劉銘傳周盛波統
兵萬餘自六安拔營就道計日內將到邳宿等
處彭玉麟於未奉

諭旨飭撥礮船之先已派總兵喻俊明管帶水師前
往清江協同防勦備賊勢趨重下游擬親帶所
部兼程赴援正與

聖謨不謀而合目下捻氛所至又在郟城西北似東

路漸鬆西路喫緊 臣當會商吳棠李鴻章飭黃
翼升張樹聲等力因東防劉銘傳周盛波等嚴
扼西境各專責成冀與北路僧格林沁大軍共
收夾擊之效

同日劉長佑奏言准山東撫 臣閻敬銘咨稱賊
匪自贛榆竄入東境晝夜狂奔四月十五日已
竄至汶上縣趨向濟甯東平 臣查該逆旣竄東

平則臨清東昌一帶喫重若遽赴開長恐致鞭
長莫及是以暫緩起程當卽飛咨前副都統定
安督率所部在張秋李連橋相機堵剿並與臬
司李鶴年商度先派遊擊張得祿等管帶馬勇
百餘名大名鎮道抽撥馬勇百餘名由濮范至
壽張瀕河一帶梭織巡邏一面派定隊伍如探
聞賊欲渡黃卽行馳往沿河會合東軍迎剿茲

據委員探報並定安函稱該逆於十六日由開河袁家口等處折渡運河向西南奔竄河東已無賊蹤總兵陳國瑞亦於是日馳抵東平跟蹤追剿等語是西路大名開長等處防務較重臣一面飛飭大名鎮道督率兵勇鄉團嚴防河岸並飭副將崔福泰分隊由小灘馳往協同堵禦臣亦酌帶省標官兵親赴大名開長等處相機

督辦其威縣清河曲周景州一帶屯駐兵勇卽
留臬司李鶴年會督總兵陳濟清等嚴密巡防
均奏入

上命軍機大臣傳諭曾國藩吳棠彭玉麟曰吳毓芬
張樹珊等軍業已陸續到防復因捻匪回竄東省
直隸防兵較單劉銘傳係直隸提督急應迅赴本
任是以諭該提督於所部勇丁內挑選精銳數千

名帶赴直隸與劉長佑會商布置現在東南援軍
四集兵力已厚西北一帶兵力單弱賊匪屢犯東
境密邇畿疆非有知兵大員前往勦辦不能迅靖
寇氛本日據劉長佑奏賊由東平濟甯折竄西南
大名開長防務均形喫重更須亟集援軍以防賊
匪奔突著會國藩檄令劉銘傳懍遵前旨酌帶所
部數千名北行毋稍延緩所餘兵勇著該督遴員

統帶以期得力賊既由東平濟甯折竄西南有渡
黃上竄直隸之勢江南水陸援軍俱落賊後黃翼
升歐陽利見水師及彭玉麟等師船曾否溯流上
駛吳棠前奏駐紮濟甯一帶扼之黃運兩河之交
著吳棠彭玉麟斟酌情形迅速調派毋任遲延落
後

上又命軍機大臣傳諭僧格林沁劉長佑張之萬吳

昌壽闔敬銘沈桂芬曰賊自贛榆竄至汶上縣境
趨向濟甯東平復由開河袁家口等處折渡運河
向西南奔竄大名開長防務較重劉長佑現赴大
名等處相機防剿卽著妥籌布置毋令賊匪由曹
單一帶旁趨擾及直境吳昌壽亦當派撥兵勇在
東豫交界處所實力扼截黃河關繫緊要劉長佑
已飭大名鎮道設防並派兵梭巡北岸而山東所

轉河道較長濮范一帶伏莽未盡尤應嚴密防範
著閩敬銘調派兵團駐紮東省北岸力杜偷越豫
省沿河地方吳昌壽會同張之萬認真防堵並飭
河北鎮道與大名防軍聯絡聲勢以期周密前據
吳棠奏江南礮船駐紮濟甯一帶扼賊於黃運之
交刻下賊勢有渡黃上竄之意江南援軍俱落賊
後本日已諭吳棠彭玉麟催黃翼升等水師迅速

上駢僧格林沁追賊於紅花準一帶此時賊蹤回
竄東境勢漸北趨僧格林沁當懷遵前旨督帶兵
勇繞由北路偏賊向南庶可與清淮等軍兩面夾
擊毋令往來竄擾疲我兵力丁寶楨等軍已繞赴
東平正可就近擊賊著閩敬銘嚴飭該藩司等會
同陳國瑞之軍跟蹤追剿其威縣等處防務劉長
佑仍當飭李鶴年等盡力籌辦至山西地界多與

直豫接壤亦應先事籌防著沈桂芬勤加偵探扼
要防堵以保完善

二十四日戊子閻敬銘奏言據各處探報賊自滕

縣臨城驛西窺滋陽至濟甯州境石佛趙村等
處意圖渡運因水大難越復於四月十四五等
日折往甯陽汶上邊境時丁寶楨追至濟甯與
僧格林沁大軍會合前進賊見各路官兵緊逼

卽由開河袁家口等隔淤淺之處搶渡運河旋
於十八九等日西竄范縣之羅家樓濮州之箕
山集一帶屯聚逼近黃河南岸僧格林沁全軍
於十七日已至鄆城臣慮賊情窘急勾結水套
匪徒希圖北渡現雖有副都統定安等軍水陸
嚴防究恐河岸綿長兵力單薄當派同知劉時
霖帶隊前往一面飛咨直隸督臣劉長佑進兵

策應一面調齊遊擊王正起兩營隨臣於二十
三日出省馳赴東昌在平一帶調度布置以期
有備無患奏入

上命軍機大臣傳諭僧格林沁劉長佑吳棠閻敬銘
劉銘傳曰逆蹤逼近黃河南岸難保不勾結水套
匪徒西圖北渡閻敬銘已出省馳赴東昌在平一
帶卽著督飭派出各軍實力嚴防遇賊卽擊不得

稍有疏虞致令匪蹤北竄劉長佑現赴大名等處
著懷遵昨日諭旨相機防勦僧格林沁全軍業已
行抵鄆城著卽繞由北路偪賊南趨與清淮等軍
兩面夾擊以收聚殲之效昨諭吳棠等將黃翼升
歐陽利見水師及彭玉麟等師船相機調赴上游
著吳棠懷遵前旨會商彭玉麟星速調撥上駛於
直東兩省扼要駐紮以遏逆氛劉銘傳並懷遵前

旨酌帶勁旅數千速赴直境毋再遷延

二十七日辛卯閻敬銘奏言據報賊匪在范縣東

南連次攻破民寨現漸陸續南竄去范漸遠又據副都統定安函稱賊馬竄至蒗澤之甘露集勢向西南奔竄惟界近直隸開州該副都統卽赴開駐紮臣揣度情勢該逆爲僧格林沁大軍追逼陳國瑞現又在南路抄截丁寶楨亦在濟

甯防其回渡運河賊勢奔趨無定散布蒞鄆范
濮之間該處水套伏莽最多防河尤爲喫緊經
臣咨會定安派隊巡查河岸並飭參將黃兆昇
等水陸兵勇及聊城陽穀朝城范縣等地方官
調集民團在黃河北岸聯絡聲援復添派遊擊
王正起等帶隊前往協力遏截現賊去范猶近
濮州與開州接壤定安又率同參將韋應麒帶

兵三百名移赴開濼交界嚴防查匪股在范濼
之閒竄擾已及曹單忽南忽北剽疾靡常卽使
偏令南奔難保不乘隙回竄省防河防均不敢
一日稍弛臣於四月二十五日抵東昌後卽行
馳赴朝城范縣一帶詳閱各河口岸嚴爲布置
儻賊實在南趨河防較鬆臣卽派定將弁照舊
設防仍察看情形圖省籌辦一切奏入

上命軍機大臣傳諭僧格林沁會國藩嚴銘劉銘
傳曰賊匪散布青鄆濼港之閒界近開州闔嚴備
已調齊水陸兵勇及聊城等處民團在黃河北岸
聯絡布置著卽督飭派出員弁嚴密堵截毋稍疏
懈定安已率同章應麒移赴開濮交界著卽咨令
該副都統會同直省防軍扼要遏擊黃河水套伏
莽尙多設被賊匪勾結渡河爲患尤鉅並著嚴飭

該處防兵隨地防維毋稍大意賊匪爲僧格林沁
大軍所偪又有陳國瑞分兵抄截往往避兵而行
乘虛竄擾著僧格林沁仍遵前旨繞由北路截擊
務須穩慎攻取不可銳意輕進賊中各酋皆兇狡
善戰往往以騎夾步團陣滾進絕非從前擒匪志
在剽掠者可比其素所畏憚者惟僧格林沁一人
故專意欲老其師以逞詭計該親王轉戰數省追

奔逐北使賊不暇喘息而逆蹤轉瞬千里若專恃
僧格林沁跟蹤躡剿尙恐徒疲兵力亟宜增添勁
旅專派知兵大臣統率諸軍分路兜剿以期殄滅
無遺楚軍素稱能戰惟曾國藩聲威素著可以惟
所指揮前已有旨令該督酌度出省此時軍情更
緊燎原之勢已成設再任其長驅奔突有後追之
兵而無前截之兵此防彼竄累月經年數省膏腴

悉供搜括於中原大局所關非細曾國藩老於戎
事籌畫動中機宜前奏分布各軍專顧東西兩防
與北路僧格林沁共收夾擊之效可知該督於籌
辦此股賊匪亦已胸有成竹著卽剋期由省督率
南路水陸援兵偵探賊蹤相機勦辦曾國藩以欽
差大臣總督誓師呼應較靈其江南北應調何軍
出省後應駐何處督師均著該督斟酌妥辦一俟

部署出省卽行迅速馳奏以慰塵懷僧格林沁轉
戰數年勤勞備至南路既有曾國藩大枝勁旅卽
著繞赴北面屏蔽畿疆添調馬隊養足威望與曾
國藩會合夾擊務須加意持重斷不可輕進失利
直隸防兵仍單疊諭劉銘傳統帶精兵數千迅赴
直隸與劉長佑商辦防剿該提督自南而北計正
與賊相遇卽可痛加勦洗與僧格林沁之軍兩面

夾擊著懷遵疊次諭旨星夜兼程北上劉銘傳比
來後所部兵勇尙多著曾國藩遴派得力將弁妥
爲管帶僧格林沁曾國藩均係公忠體國爲朝廷
倚重之臣諒必能和衷共濟力持全局也

二十九日癸巳國瑞奏言四月二十六日據親王

僧格林沁家人富克精阿等飛馳到濟泣訴二
十四日該親王在曹州城西之高樓集地方追

及賊蹤比時陳國瑞郭寶昌何建鼇等各帶步
隊趕到該逆瞥見我軍卽列仗迎拒此次該逆
自汶上縣之袁路口過河竄至鄆城西北水套
一帶勾結鄆北伏莽聚集馬步數萬勢甚兇猛
經僧格林沁督軍擊退復率馬步進追不期伏
賊盡出我軍被賊圍裏該親王督令馬隊衝突
斃賊甚夥始將敗殘馬步各隊帶紮荒莊復被

該逆層層包裹僧格林沁於夜閒率領馬步衝
出賊圍該逆六股追襲行至距曹州府西十餘
里該親王力竭陣亡其翼長全順營總何建龍
總兵陳國瑞郭寶昌等現據逃回官弁聲稱均
受重傷存亡莫保該家人等曾隨官兵槍出僧
格林沁屍身乃因大股賊匪壓至將屍身掩藏
麥地得以馳來報信等語 臣聞信之下痛不欲

生賊匪現在曹州鉅野一帶盤旋臣祇得暫紮
濟甯收集兵勇先行尋覓該親王屍身再圖滅
此窮寇又翼長恩承向隨僧格林沁追剿竄匪
均係照料隊後一切軍務是日因見前路馬步
紛紛敗退隨即馳赴曹州嗣聞軍情賊勢萬難
在曹停留是以攜帶

欽差關防到濟所稱打仗情形大略相同當將關防

敬謹封存 臣幫辦無能咎無可辭惟有請

旨將 臣 先行治罪並請

簡放欽差總統全軍設法勦辦以挽大局奏入

上命軍機大臣傳諭曾國藩國瑞富明阿劉長佑吳

棠李鴻章閻敬銘喬松年吳昌壽劉銘傳曰此股

賊匪雖係窮寇內有牛洛紅張總愚陳大喜宋憬

詩賴汝洸等著名賊首兇狡異常自汝上縣之袁

路口過河竄至鄆城水套勾結鄆北伏莽聚集數
萬僧格林沁督軍擊退乘勝跟追不期伏賊盡出
層層圍裏該親王力竭陣亡覽奏曷勝震悼該親
王忠勇性成有進無退朝廷申諭再三令其持重
不料遽至於此前諭曾國藩出省會剿現在事機
愈迫著卽攜帶欽差大臣關防統領所部各軍前
赴山東於北面駐紮督勦劉銘傳諒已起程卽繞

赴北面與劉長佑會商堵剿之策不准稍涉遷延
逆氛如此猖獗必圖北犯大名等處防務十分喫
緊劉長佑當通籌調派分道扼防無令一賊闖入
直境開州等處有黃河可扼著督飭兵團晝夜巡
防毋令偷渡閻敬銘現駐東昌荏平一帶務當督
率兵勇整頓團練力遏寇氛如兵力不敷著於各
標內抽調丁寶楨是否仍在濟甯一路著閻敬銘

飭該藩司扼要駐守如再不得力必當重治其罪
直東伏莽甚多恐聞此信盜賊蠭起劉長佑閩敬
銘當責成各該地方文武悉心防範以期消患未
萌詹啟綸現在何處著喬松年閩敬銘催令北來
牽制賊股使不得銳意北犯安徽河南與賊氛偏
近喬松年當督飭英翰朱淮森等固守宿州臨淮
等境前有旨令富明阿緩程行走現在計抵直隸

接旨後卽著留於直隸與劉長佑籌商堵剿一面
奏聞劉長佑闔敬銘於接此旨後亦卽迅速傳知
該將軍遵辦吳昌壽卽帶兵出省駐紮直東交界
會合直隸山東各軍分投夾擊其河北一帶並著
嚴飭該鎮道等激勵團練認真防堵清淮距賊不
遠吳棠久在該處深得民心將來曾國藩督師北
上糧臺當設於徐州清淮爲該大臣後路著吳棠

整頓兵勇籌畫餉糈以備徵調水師輕利礮船吳
棠曾否酌撥若干赴上游之濟甯運河及黃河一
帶著卽迅速籌辦兩江總督已有旨令李鴻章暫
行署理卽著前赴金陵接印任事兩江任大責重
李鴻章務須細心經理仍隨時與曾國藩籌商曾
國藩軍營調兵集餉各事宜該撫並當妥爲籌畫
不得稍有遲誤曾國藩於接奉此旨後著先就現

有兵力帶領北上其餘各路得力將弁兵勇不妨
陸續檄調未可久待徵兵致勞塵盼總督印信暫
交藩司萬啟琛收存毋庸俟李鴻章到後交卸該
大臣公忠體國久著勲勤必能趕緊赴援綏靖北
路曾國荃諒已就痊該大臣仍當勗以大義令其
來京陛見候朕錄用或酌量招集舊部徑赴軍營
隨同帶兵勦賊並懇速行宣諭以收臂指之效欽

差大臣關防著國瑞暫行護理遇有應奏應行事
件准其鈐用濟甯一路關繫緊要務當收集各營
兵勇親加訓練勉圖自振國瑞於主將損失未能
督兵救援厥咎甚重此次僅予薄懲已屬法外施
仁若再不知愧奮自問當得何罪全順何建鼇陳
國瑞郭寶昌等下落並著確切查明具奏成保現
在何處及此次不能力救主將之各官弁著國瑞

一併據實嚴叅本日派侍衛克興阿岳林恩全吉
凌前赴軍營迎護僧格林沁靈柩回旗並令偵探
軍情俟到營時國瑞與之妥商辦理准其會銜奏
事近日軍情賊勢著卽隨時奏報僧格林沁遺骸
爲該家人等掩藏麥地著國瑞闡敬銘密派幹員
率同該家人等前往尋覓妥爲棺殮使忠骨得早
歸葬本日又諭阜保特普欽選調精壯馬隊五百

名馳赴直隸著國瑞劉長佑酌量調遣

上又命軍機大臣傳諭劉長佑崇厚曰據國瑞奏稱
僧格林沁追賊至曹州高樓集地方爲大股賊匪
追襲在曹州城西陣亡等語此股竄匪現在曹州
鉅野一帶並勾結水套伏莽其氛甚惡直隸邊境
多與東省毗連防剿尤爲緊要劉長佑現駐大名
一帶兵力尙單著崇厚迅帶洋槍隊一千五百名

配齊軍裝器械卽赴畿南一帶防勦應在何處扼
要駐守著與劉長佑體察情形會商籌辦天津防
務應如何豫行籌畫之處著崇厚妥速布置

上又命軍機大臣傳諭阜保特普欽曰現在捻逆回
竄山東曹州鉅野一帶僧格林沁力戰陣亡賊勢
愈熾非有得力馬隊不足制其奔突著阜保特普
欽於吉林黑龍江挑選馬隊各五百名配齊軍裝

器械派委得力員弁統帶剋日起程馳赴直隸聽候調遣毋許延誤

上諭內閣曰捻逆竄擾山東由汶上至鄆城水套一帶勾結伏莽勢甚兇悍經僧格林沁督軍迎剿將賊擊退復督馬步進追猝墮賊伏該親王督率諸將奮力衝突斃賊甚夥乃該逆恃衆層層圍裏該親王於四月二十四日夜間率隊衝出又因逆股

猛撲在曹州城西陣亡欽差大臣科爾沁博多勒
噶台親王僧格林沁於咸豐三年督師勦賊疊克
臨清連鎮馮官屯高唐州等處北路賴以肅清十
年整旅南征轉戰直隸山東河南安徽湖北等省
掃蕩捻圩殄除髮匪擒斬巨逆張落刑苗沛霖等
軍麾所至衆望允孚朝廷以該親王頻年轉戰士
卒疲勞申諭再三令其持重而該親王忠勇性成

視國事如家事臨陣必身冒鋒鏑誓滅此賊而後
已方期天鑒忠忱克竟全功長承恩眷乃猝遇賊
伏力竭陣亡覽其死事情形不禁爲之隕涕僧格
林沁著賞給陀羅經被照陣亡例以親王飾終典
禮從優議卹應得卹典該衙門詳察具奏任內一
切處分悉予開復准其入城治喪其靈柩回旗時
著沿途地方官妥爲照料並派乾清門侍衛克興

阿岳林恩全吉凌馳驛前往該營迎護賞給銀五
千兩由廣儲司給發經理喪事准其入祀京師昭
忠祠其死事地方及該親王出師省分均著建立
專祠生前事功宣付國史館立傳伊子伯彥諾謨
祜俟百日孝滿後卽著承襲親王該衙門毋庸帶
領引見伯彥諾謨祜所遺貝勒卽著賞給伊孫那
爾蘇以示篤念忠蓋之至意杭州將軍國瑞未能

救援主將咎無可辭著卽行革職仍暫護欽差大臣關防帶罪勦賊以觀後效內閣學士恩承久隨該親王勦賊失於援應著一併革職仍留營帶罪圖功山東巡撫閻敬銘布政使丁寶楨於所轄境內未能加意協助致督師重臣孤軍深入力竭捐軀亦有應得之咎均著先行交部嚴加議處其餘救援不力員弁著國瑞閻敬銘查明叅奏

上又諭內閣曰朕奉

慈安皇太后

慈禧皇太后懿旨科爾沁博多勒噶台親王僧格林沁

蒙

宣宗成皇帝恩眷之隆派充御前大臣管理旗營事務
文宗顯皇帝御極以來優加委任咸豐三年

特命勦辦髮逆十年督師南下轉戰直隸山東安徽河

南湖北等省於今六載屢殲巨憝懋建殊勳功在民生志安社稷頃因督戰陣亡雖已加恩優卹建立專祠並入祀昭忠祠尙不足以崇獎忠蓋國家定制王大臣中有公忠體國超衆宣勞者向有配饗之例况僧格林沁爲國宣力忠勇性成尤宜特沛殊恩用慰忠魂而昭異數僧格林沁著加恩配饗

太廟以示軫念勳舊有加無已至意

上又諭內閣曰欽差大臣協辦大學士兩江總督一
等毅勇侯曾國藩著卽前赴山東一帶督兵勦賊
兩江總督著李鴻章暫行署理江蘇巡撫著劉鄩
膏暫行護理

三十日甲午劉長佑奏言臣於四月二十二日馳

抵大名郡城接據探報賊匪由東河南竄濮州
荷澤范縣屬境攻陷民圩數處開州長垣東明

所轄沿河南岸各村莊均有邊馬游駛其欲渡
河北竄亦可想見且難保不故作南下之勢牽
掣我師而以另股自上下游乘閒偷渡賊情詭
譎在在宜防當咨定安轉飭管帶礮船參將周
森藻等並所部馬隊於壽張濮范水陸各要隘
加意巡防又聞洛河船隻甚多並咨河南撫臣
吳昌壽飭將現泊船隻挽入上流仍一面嚴檄

大名鎮道暨開州長垣東明各州縣選調鄉團
添備礮船協同官軍堵禦一面飛催大名鎮標
兵五百名馳赴長垣並調副將崔福泰等管帶
兵勇一千名星夜進駐清豐開州往來策應俱
已先後到防復咨署提臣徐廷楷飭令備調標
兵五百名卽速赴防以實腹地茲據大順廣道
范梁稟報二十三日有馬賊四五百名分竄開

州屬境之黃河南岸裹脅民人試水深淺經該處駐防千總李殿邦等開礮轟擊斃匪數十名賊始卻退又據署東明縣知縣張連瑞稟稱賊匪於二十二日攻撲該縣北門經該員會同在城文武督團守禦分隊出城奮擊傷賊二三十名該逆旋即退逸臣復飭大名鎮道星速撥兵策應並以該逆現踞南岸又照會曹州鎮總兵

就近援助直隸地勢平衍自應嚴防河岸以固
藩籬第增兵卽須增餉當此經費支絀之際不
得不樽節籌維且直隸各標兵丁除此次在防
及疊次出征外存營精壯亦實無可多調臣一
面督飭文武暨在防兵勇力籌防勦一面飛催
劉銘傳迅速率師剋期北上

同日閩敬銘奏言接藩司丁寶楨並鉅野縣知

縣飛稟四月二十四日午刻親王僧格林沁追
賊於曹州府高樓寨地方被賊圍裏是夜三鼓
該親王率軍衝圍失利遇害我軍均已潰散翼
長全順尙未查明下落等情並據張秋稟報二
十六日正南火光甚長查張秋正南係鄆城一
帶該匪之意不離東境臣與丁寶楨均經出省
內地空虛若乘閒直犯省城數日可到患何可

言已飭丁寶楨嚴扼濟甯腹心之地以防回竄
運河臣一面飛飭黃河北岸添雇民勇並調遊
擊郭大勝兩營參將黃兆昇同知劉時霖兩營
及遊擊周森藻礮船二十隻在濮范陽穀一帶
水陸分布以防搶渡黃河臣帶遊擊王正起所
部由莘縣星夜旋省趕緊籌防惟是東省兵勇
爲黃運兩路所分無可再調若江南礮船速至

東省在黃運兩路設防 臣卽可抽出各營與丁
寶楨相度機宜或防或剿庶幾局勢較靈不致
左牽右顧提督陳國瑞勇敢善戰此次奔馳日
久爲賊所疲若令收合散卒整軍而前必可一
雪斯恥其籌防各事及續探賊勢情形俟 臣抵
省後由驛馳報均奏入

上命軍機大臣傳諭劉長佑闔敬銘 汪芬曰賊匪

竄至濮州荷澤范縣境內又有馬賊分竄開州之
黃河南岸經千總李殿邦等擊退其攻撲東明縣
北門賊匪又經文武員弁擊退劉長佑已飭大名
鎮道撥兵策應惟現在僧格林沁遇伏陣亡軍威
挫折南路旣無跟追之兵難保該匪不一意北竄
昨諭劉長佑通籌調派分路扼防並催劉銘傳繞
赴北面與劉長佑會商堵剿之策第劉銘傳到直

需時而賊勢日熾直隸地勢平衍防兵單薄深恐
難遏奔衝劉長佑當懷遵前諭督飭在防員弁及
水陸各軍聯絡聲援實力防剿徐廷楷備調標兵
五百名著飭令卽速赴防此外如有可調之兵並
著劉長佑斟酌調派或添募精壯勇丁藉厚兵力
總之賊匪早一日殄滅卽可省無數餉需不得以
目前增餉爲艱因循貽誤洛河船隻甚多尤宜防

其搶渡著仍飛咨吳昌壽飭將現泊船隻挽入上
流劉長佑一面督飭兵團守禦河岸毋稍疏懈東
明孤懸黃河南岸閻敬銘當飭曹州鎮總兵等相
機援應賊匪趨向靡常山西之澤潞一帶與直隸
河南境地毗連亟應豫籌防守著沈桂芬偵探賊
情酌量調兵扼要嚴防濟甯一帶有丁寶楨兵勇
扼守難保該逆不乘閒直犯山東省城閻敬銘回

省後務將守禦事宜嚴密布置該撫亦不宜久居
省城何路軍情緊要卽親赴何路督勦其張秋至
省一帶河岸尤須妥籌扼防毋令偷渡至灤口河
身由濟南一帶歸入黃河距省甚近該處爲鹽船
聚集之處閻敬銘務將此項船隻提赴下游毋令
賊衆搶船北渡丁寶楨帶兵勦賊毫無成效著責
令就現有兵力扼守濟甯相機進勦如再有疏失

卽當從重治罪前諭吳棠酌調黃翼升等輕利礮
船駛入山東運河及直隸黃河一帶助剿茲據閩
敬銘奏東省兵勇無可再調若得江南礮船速至
方能抽調各營相機戰守等語是師船防河實爲
目前要務著劉長佑閩敬銘飛咨吳棠迅速辦理
至礮船所泊地方須在湖河水深之處運掉方靈
且有退步不致爲賊所擄並著與吳棠酌量妥辦

陳國瑞現在何處著闔敬銘傳知該總兵將傷病
趕緊調理一面收集所部速赴該撫軍營隨同剿
賊如賊勢北趨並令陳國瑞統赴北路迎頭截擊
以遏狂氛景德一帶空虛劉長佑闔敬銘務當豫
籌堵扼不可稍涉疏虞至親王僧格林沁殉難情
形屍身曾否覓獲及全順等下落仍著闔敬銘詳

查訊奏

上又命軍機大臣傳諭崇厚曰昨因直東防務喫緊
大名兵力尙單諭崇厚統帶洋槍隊一千五百名
馳赴畿南與劉長佑會商防剿並將天津防務豫
爲籌畫此起洋槍隊崇厚統帶起程外所有該處
原練勇丁卽著飭天津道李同文認真操練一面
將天津防務妥爲籌辦洋槍隊尙須添練並著責
成李同文於天津等鎮標內選擇添練以資防剿

上又命軍機大臣傳諭楊岳斌曰昨據國瑞馳奏僧
格林沁追勦捻匪在山東曹州城西遇伏陣亡賊
燄甚熾本日又據劉長佑奏賊衆屯聚濮范菏澤
一帶窺伺黃河南岸意圖北渡等語直東地勢平
衍兵力未厚曾國藩距直東交界地方尙遠恐一
時未能遠到楊岳斌前由樊城起程此時曾否入
關未據該督奏到陝豫邊界距直東交界地方甚

近且所部兵勇業已成隊在途著卽先其所急星
夜馳赴直東交界地方會同劉長佑閻敬銘聯絡
聲勢力固畿疆門戶毋稍遲延蔣凝學一軍著一
併帶赴直東一帶以厚兵力儻楊岳斌已抵西安
卽著暫行駐紮候旨遵行蒲州茅津渡及陝州沿
河均關緊要晉省兵力尤不足恃賊情飄忽異常
若闌入晉境大局所關匪細該督如在陝省駐紮

卽著派兵分紮各處與晉豫各省兵勇協同扼堵
儻遇賊匪西竄無論秦晉卽可迎頭截擊以固兩
省邊防

中央民
學院
館藏書

欽定勦平捻匪方略卷二百三十一 乙丑年

中央圖書館

五月初一日 乙未 理藩院奏言據科爾沁

歸藏館

彥諾謨祜呈稱貝勒之父科爾沁博多勒噶台

親王僧格林沁在軍營陣亡伯彥諾謨祜擬卽

往軍營迎接靈柩等因相應據情代表奏請

旨奏入

上諭曰著於本月初三日偕同前次派往山東之侍

衛克興阿岳林恩全吉凌一併馳驛前往

同日

上命軍機大臣傳諭曾國藩國瑞劉長佑李鴻章閻敬銘劉銘傳曰昨據劉長佑奏稱賊竄濮州蒗澤范縣馬賊復竄開州屬境在黃河南岸試水深淺另股馬賊攻撲東明縣城均經官兵擊退閻敬銘奏賊匪已趨張秋之南有直犯省城之勢該撫現

由東昌折回濟南防守各等語現在南自曹郡北至東昌數百里閒捻氛甚熾東省僅有丁寶楨所部三千人扼守濟甯能守而不能戰此外並無大枝勁旅足資攻剿賊衆盤踞該省縱橫自便濟南省城兵力甚單設被該逆圍攻岌岌可危且德州一帶與直隸河閒接壤距京甚近尤當防其北趨曾國藩李鴻章素顧大局際此軍情萬緊自當多

機援師迅速北上前諭曾國藩先將總督關防交
萬啟琛暫存不必俟李鴻章到金陵後交卸著卽
遵奉前諭就現有所部剋日統帶出省兼程馳赴
山東一面檄調各軍一面先就現有之兵繞由賊
匪北面向南偪剿保衛畿疆所有江北一帶及詹
啟綸等防剿各軍均可酌量調遣分籌布置李鴻
章務當於所部各軍內商撥勁旅數枝速派得力

鎮將統帶由上海乘坐輪船北駛或由膠州登岸
西趨濟南或由天津登岸由景德南趨東省均著
李鴻章迅速酌辦閻敬銘現回省城防守務當查
拏奸細先清內患以待援師水套一帶尙有伏莽
未靖著劉長佑會同閻敬銘嚴飭在防將士實力
堵扼勿任勾結北渡直隸地廣兵單劉長佑須嚴
守大名一帶河岸勿任賊蹤偷越景州吳橋等處

兵力較單並著劉長佑添兵防守劉銘傳本係直隸提督且疊經催令挑兵數千迅赴劉長佑軍營著懷遵前諭辦理不必再候曾國藩札知儻再遷延觀望必重治該提督以貽誤軍務之罪本日復諭官文等將楚北姜玉順所部九營飭令迅赴直東交界地方聽候劉長佑閩敬銘調遣著劉長佑等俟此軍到時咨商辦理何省軍情緊要卽由何

省調往勦賊劉長佑卽飭地方文武辦理堅壁清
野力行團練以助兵力務須由官督辦不可任聽
紳民自行專擅以杜流弊國瑞現駐濟甯著卽招
集潰散撫綏將士重整軍威以牽賊勢僧格林沁
忠骸仍著國瑞闔敬銘迅行尋覓棺殮前經明降
諭旨派克興阿等四員馳驛前往該營迎護僧格
林沁靈柩本日復准伯彥諾謨祐偕同克興阿等

馳驛前往著國瑞閣敬銘於伯彥諾謨祐等到東
時妥爲照料令其扶柩速行回京該貝勒一腔悲
憤並著國瑞閣敬銘留心防護勿令有冒險直前
之舉

上又命軍機大臣傳諭官文曰姜玉順所部九營前
據吳昌壽奏因轉餉多艱已令回防歸伍現在直
東軍務緊急自應厚集兵力迅殄狂氛著官文卽

飭姜玉順統帶所部九營迅赴直隸山東交界地方聽候劉長佑閻敬銘調遣其行裝口糧等項卽由官文籌款給發不得以餉絀爲詞稍事遲玩

上又命軍機大臣傳諭神機營曰現在賊犯山東一帶偏近畿輔京城重地亟宜豫籌防範除神機營弁兵由醇郡王日加教演外所有京城旗綠各營兵丁均著歸醇郡王節制調遣一切防範事宜由

醇郡王密籌布置

上又命軍機大臣傳諭步軍統領衙門順天府五城御史曰捻逆現在竄擾山東濮范曹單一帶逼近開州長垣勢欲渡河而北僧格林沁在山東督軍戰歿於陣賊勢愈熾難保不蓄意北犯欲靖外匪必先清內奸京師五方輻輳難保無奸徒溷跡著存誠等密飭員弁於內外城各地面認真盤查勿

令匪徒藏匿並著萬青藜卞寶第五城御史一體
密飭所屬清查保甲嚴詰奸宄以消患萌

同日前杭州將軍國瑞奏言據副都統翼長成
保等稟報我軍失利後馬步兵勇收集無多在
曹州關廂暫紮總兵陳國瑞所部百餘人退入
西南民寨四月二十五日在曹州府城西北將
親王僧格林沁忠軀尋獲擡至府城內暫行安

置查看忠軀脖項傷七處右膀傷一處並聲明
前次賊在高莊卽高樓集一帶盤踞僧格林沁
卽諭馬步分隊進兵已將賊壓退數里該逆從
後包抄我軍腹背受敵全軍敗退遂在荒莊紮
營乃賊勢過重紛紛圍築營壘四面合攻是夜
僧格林沁督帶馬步兵勇一齊闖出重圍殺賊
亦復不少但賊匪恃衆更番來撲官員兵丁皆

不辨東西前途一片柳林一經馬步穿過左右
兩面賊又來撲僧格林沁受傷落馬兵心無主
黑夜星散等情現在該逆因我馬步潰敗在鄆
鉅之交盤旋勢愈披猖臣所帶三營數不滿千
其餘勇隊星散無蹤雖經派弁設法分投招聚
而軍械鞭馬不全難以追剿惟有一面督飭糧
臺妥爲經理該親王身後事宜俟道路疏通將

靈樞迎回濟甯選派官兵護送回京仍一面督
飭各局與馬步兵勇籌備器械鞍馬再圖勦辦
再山東藩司丁寶楨一軍僅有三千名難抵強
寇臣現令該藩司將所有勇隊分布濟甯州城
西南一帶輪守運河以顧北路猶慮勇數尙單
鞭長莫及查有徐州鎮總兵詹啟綸帶勇三千
名自韓莊渡河駐紮碭山業已檄飭詹啟綸星

馳來濟期與丁寶楨先行併力防守運河一俟
臣收集各隊卽行會督進剿總兵陳國瑞於大
軍潰散後帶領零星勇隊究竟屯紮何處業已
派員往查翼長全順營總何建鰲有無下落並
打仗受傷陣亡馬步官兵勇丁統俟 臣確切查
明辦理至提督劉銘傳一軍聞已由徐州移營
與 臣軍營較近自應傳

旨催令趕緊北上以資攻勦奏入

上命軍機大臣傳諭國瑞劉長佑閻敬銘劉銘傳曰
僧格林沁忠勇捐軀現經國瑞尋獲遺骸受傷至
八處之多覽奏益深悲憤本日已明降諭旨令國
瑞等俟伯彥諾謨祐等馳抵該郡時酌派員弁將
靈櫬護送回京並將成保先行革職矣詹啟綸一
軍卽著國瑞飭令迅速移赴濟甯與丁寶楨之軍

扼截運河毋令賊衆搶渡並著國瑞招集潰散士卒加意拊循量予休養不可令其出隊閻敬銘亦當飭各路防兵分守黃運兩河以固大局劉銘傳業由徐州移營著卽懷遵疊次諭旨迅帶所部繞赴劉長佑軍營力固畿南門戶毋再稽遲陳國瑞現在何處民寨著國瑞閻敬銘查明飭該總兵收集散亡赴閻敬銘軍營聽候調遣卽由該撫飭令

會同劉銘傳截擊賊匪遏其北竄之路僧格林沁
殉難情形國瑞此奏仍未甚詳細著國瑞續查具
奏

上諭內閣曰本日據國瑞奏已將親王僧格林沁忠
骸棺斂身後事宜業經妥爲料理暫停曹州府城
等語僧格林沁爲國捐軀死事甚慘悲痛實深頃
覽國瑞所奏中懷稍慰卽著國瑞闔敬銘分飭所

屬官弁小心照料俟伊子伯彥諾謨祜及侍衛克
興阿等到時多派弁兵隨同護送該親王靈櫬回
京並著沿途地方官妥爲照料俟到京時再行親
臨賜奠以慰忠魂副都統翼長成保隨同僧格林
沁勦賊不能竭力救護致有此失咎有應得著先
行革職留營以觀後效

初二日丙申劉長佑奏言四月二十九日准總兵

陳國瑞函稱二十日在曹州府城西會合各隊
隨同僧格林沁與賊接仗被賊衝動全軍帶隊
各官均各分散該總兵身騎俱受重傷衝出重
圍欲探該親王所在勢實不能祇得暫投附近
民寨收集潰卒移時整隊復與追賊接戰轉敗
爲勝又據曹州鎮總兵保德稟稱僧格林沁於
二十四日與賊接仗失利力竭陣亡已將遺骸

擡至曹州郡城身受八傷經該地方文武妥爲
棺殮各等語目下統帥戰歿賊勢鷗張時思渡
河北竄開長等處固形喫重張秋一帶尤覺空
虛山東撫臣閻敬銘以省垣喫重於二十八日
自莘縣拔隊前赴東昌布置防務回顧省城現
在曾否回省尙未接准來咨臣查直境自開長
至景州一帶毗連東省在在宜防閻敬銘如果

回省東路未免空虛微特臣所部兵勇不敷分
布卽調度策應亦難周到臣一面激勵沿河各
軍暨各州縣整齊團練合力嚴防並檄催宣化
官兵進紮開州東路之柳下屯騰出正定官兵
一營移紮濮州之古雲集會同東省派防各營
嚴密扼守一面飭臬司李鶴年署通永鎮總兵
陳濟清嚴爲準備如東路有警卽會督兵勇馳

赴景州一帶相機堵截仍請

旨飭催提臣劉銘傳迅速移師兼程前進並請

飭下通商大臣崇厚派員統帶洋槍隊會同天津道

酌帶練勇馳赴景州駐防現據探報該匪從開

州南岸延絜濮范迪東地面臣擬馳赴大名調

度一面咨催前副都統定安馳回東境在濮范

一帶巡防並咨商閩敬銘分撥重兵迅赴張秋

鎮駐紮臣仍隨時確探賊蹤何路緊要卽往何
路督勦以免顧此失彼抑臣更有請者兩江督

臣曾國藩所部各軍深知賊情爲賊所憚刻下
江南底定且有江蘇撫臣李鴻章聲威久著足
資捍衛擬請

旨飭下曾國藩迅速統師北上援勦並請就近

簡派重臣統帶馬步大隊分赴河間正定一帶扼要

駐紮以固京師門戶

劉長佑又奏言總兵余承恩前在直東一帶頗著勞績聞其尙在山西原籍守制現在防勦需員可否仰懇

天恩俯准將余承恩調赴臣營用資臂助

同日吳棠奏言捻匪於四月十六七等日竄撲濟甯斬家口已渡運河竄至金鄉距清淮較遠

惟道途回達水陸各防仍宜隨時嚴備現飭副
將張從龍帶勇一千名仍住宿遷新安鎮以清
江東交界伏莽道員張樹聲總兵張樹珊一軍
現已由宿遷進紮韓莊飭與總兵姚廣武各軍
聯絡相機防勦提督黃翼升水師因山東河道
水淺暫泊邳宿之間藉資策應 臣另派總兵趙
三元帶清淮輕利礮船四十號前赴濟甯侍郎

彭玉麟於二十六日到淮卽日進赴宿邳查看
河道情形提督劉銘傳一軍現已由泗赴徐
臣
謹遵

旨咨催該提督迅速挑隊赴直復咨借淮關稅課銀
四千兩解赴徐州接濟劉銘傳軍食以利遄行
吳棠又奏言黃河防守最關緊要臣隨時詢問
舊日河營員弁均云黃河水性橫激與江湖平

浪及運河水性不同湖河師船入黃非所素習
不如就黃河船隻添置礮位配以濱黃弁兵勇
丁駕駛得宜地形較熟且河身寬闊要隘無多
布置亦易所言似切形勢 臣咨訪所及敢祈
聖明採擇如屬可行卽請

飭下該督撫等各就轄境黃河趕籌辦理以資守禦
同日吳昌壽奏言疊據探報捻匪由東省回竄

現在屯踞曹縣一帶偪近豫省考城查虞城考城與山東之曹單接壤其河北之滑縣濬縣內黃各屬係在直隸大名廣平各府屬境之後離河較遠如果前路防堵緊嚴賊蹤斷難竄越刻下豫省東路河防惟考城蘭儀一帶最爲喫緊而北岸則龍門口正當其衝先經前撫臣張之萬派參將崔廷桂帶兵一千緊扼該處臣現又

纂要指圖卷之三十一
三十一
添調知府湯聘珍帶勇三千同紮龍門口會同
崔廷桂及河北鎮道兵團嚴密截遏並聯絡直
隸防軍以期周密其南岸之考城派有總兵宋
慶張曜參將蔣希夷各營實力防守所有祥符
蘭儀各渡口船隻臣已飭各地方官一律提歸
北岸以防該匪搶渡至南岸中牟北岸封邱以
西各屬均近河隄誠恐該匪乘虛西渡復飭宋

慶等軍如果賊勢西趨卽當沿河攔截一面飛
調譚仁芳四營卽日由許州前進相機布置
同日禮部尙書祁寯藻奏言查曹州西路與直
隸大名府屬之開州清豐一帶連界統帥僧格
林沁戰歿軍心必至惶惑賊勢恐愈臨張此時
惟宜先扼北竄之路使賊不能蔓延俟兵力厚
集再圖進剿現奉

諭旨令曾國藩前赴山東一帶督兵勦賊計由江甯
馳赴山東亦需時日賊蹤飄忽無常恐又成尾
追之勢而前路堵截直隸最爲喫重總督劉長
佑布政使唐訓方按察使李鶴年皆堪任統率
之職而將吏中更當擇尤委任以收指臂之用
謹就 臣素所聞知者如總兵余承恩知府楊毓
枬段廣瀛王啟曾知州劉秉琳知縣李秉衡李

承熙劉錫穀李璋楊中桂何崧泰或曾經勦賊
立功或派辦團練有效可否

飭下直隸總督察看該員等才具官聲酌量器使總
期固結人心保衛畿輔至直隸提鎮以下實缺
人員在他省者似應調回以重職守均奏入

上命軍機大臣傳諭曾國藩劉長佑吳棠喬松年閻
敬銘吳昌壽李瀚章劉銘傳曰賊蹤距清淮較遠

吳棠現派張從龍張樹聲等軍分扼宿遷等處黃
翼升水師暫泊邳宿著卽與彭玉麟會商妥籌布
置以期周密賊匪北竄後僧格林沁中伏陣亡該
逆屬集濮范菏澤一帶山東兵力甚單該漕督所
派總兵趙三元統帶輕利礮船四十號前赴濟甯
務卽催令迅速北駛與東省丁寶楨等駐紮濟甯
之軍妥籌策應劉銘傳現已由泗赴徐挑隊赴直

所需軍餉吳棠已接濟銀四千兩以利進行著該
提督懷遵疊次諭旨迅赴直隸與劉長佑會商勦
辦以固畿輔之防吳棠擬就黃河船隻添置礮位
配以濱黃兵弁駕駛一節是否可行著劉長佑閻
敬銘妥爲斟酌並著吳棠於水師兵弁中擇其能
入黃駕駛熟悉地形者趕籌辦理閻敬銘現已折
回省城北路未免空虛儻賊匪悉銳北趨萃冠朝

觀一帶伏莽所在響應直邊防不勝防著閻敬銘
斟酌緩急迅速添派勁旅嚴備東昌張秋一帶杜
其聲東擊西之計豫省東路河防考城蘭儀密邇
山東曹單最爲喫緊北岸則龍門口正當其衝吳
昌壽現派湯聘珍所部三千會同崔廷桂及河北
鎮道嚴密堵遏南岸復有宋慶張曜等軍防守尙
屬周妥著嚴飭北岸防兵與直隸官軍聯絡聲勢

遇賊卽擊並催調譚仁芳四營迅由許州前進駛
赴北路擇要布置如賊勢西趨並檄宋慶張曜各
軍沿河攔截直隸防兵未厚北路宣化大同等鎮
標兵並著劉長佑棟調數千隨時聽候調遣本日
又據祁寯藻奏畿輔防堵緊要酌保余承恩等十
一員以資任使著該督查明是否均在直省酌量
器使其提鎮以下實缺將弁如有調赴他省軍營

者並著調回本任以重職守山東東昌兗州泰安
直隸大名河閒等處著劉長佑閻敬銘慎簡牧令
聯絡紳民協勦妥籌堅壁清野之法以輔兵力所
不逮傅振邦前隨僧格林沁勦賊屢著戰功該員
現在何處著閻敬銘咨令赴東會籌防勦張曜一
軍素爲捻逆所憚能否飭帶所部渡河而北與直
東官軍聯絡擊勦著吳昌壽酌量檄調河南安徽

之汝光穎亳一帶爲捻蹤潛匿之區吳昌壽喬松
年務卽選派員弁帶兵駐紮消患未萌此時賊勢
猖獗僧格林沁以督師重臣竟以追賊陣亡各該
省督撫提鎮當如何力圖整頓痛殄逆氛儻逆蹤
竄擾何省該省督撫提鎮並不督兵出境實力助
剿定當重治其罪曾國荃前已諭令來京陛見或
徑赴軍營著曾國藩再行嚴催飭令酌帶親兵趕

緊北上毋庸另募新勇稽延時日並著李瀚章就
近速行宣諭剋日起程據劉長佑馳奏賊勢猖獗
請令劉銘傳迅速前進並請派曾國藩統師北上
與疊次諭旨適相吻合陳國瑞未能救援僧格林
沁本屬咎有應得姑念其從前打仗奮勇此次身
騎俱受重傷不無可憫姑免置議劉長佑惟當令
其收集潰散繞赴北面努力擊賊爲僧格林沁復

仇該總兵部伍如距闔敬銘軍營稍遠卽著徑赴大名軍營聽候劉長佑調遣劉長佑請調余承恩差委本日已諭知沈桂芬飭令赴直矣

上又命軍機大臣傳諭特普欽曰前因逆匪回竄山東曹州距野一帶僧格林沁力戰陣亡諭阜保特普欽各挑馬隊五百名馳赴直隸聽候調遣惟北路軍情緊要該官兵等前往協勦必須大員統帶

方足以資得力吉林副都統安在現在回籍穿孝
卽著特普欽傳諭該副都統管帶所調馬隊五百
名剋日起程馳赴直隸聽候調遣

上又命軍機大臣傳諭麒慶連成曰僧格林沁督軍
追賊在山東曹州城西遇伏陣亡現在北路緊要
必須寬籌兵力方足以資防勦著麒慶連成於熱
河密雲地方各挑精壯兵丁二千名配齊軍裝器

械選派得力大員管帶勤加訓練聽候調遣

上又命軍機大臣傳諭沈桂芬曰總兵余承恩前在直東一帶勦匪素稱勇往此時東省匪勢熾張亟須諳練兵事之員前往協勦該總兵是否尙在山西著沈桂芬檄令余承恩迅速起程卽日馳赴直隸大名軍營聽候劉長佑調遣

同日禮部奏言欽奉

諭旨科爾沁博多勒噶台親王僧格林沁照陣亡例
以親王飾終典禮從優議卹查定例親王薨逝奏
請

輟朝三日今親王僧格林沁係外藩親王現在奉
旨以親王飾終典禮議卹應否

輟朝之處伏候

欽定奏入

上諭內閣曰欽差大臣科爾沁博多勒噶台親王僧
格林沁督師有年功勳卓著此次剿賊遇伏陣亡
覽其死事情形甚爲悲愴著輟朝三日以示悼念
忠盡至意

初三日
丁酉國瑞奏言探報捻匪現竄鄆城縣西

紅川口東至王家古堆南至安興木徧地有賊
邊馬時犯曹州一路查黃水雖退而王家古堆

安興木等處尙成河套紅川口卽在河邊該匪
盤旋不去勢必勾結伏莽徧勒民圩附從臣於
四月二十九日曾派翼長諾林丕勒副都統托
倫布常星阿帶領馬隊繞道馳赴曹州會同翼
長成保副都統富森保等就近赴城武定陶一
帶招集馬步是日接據總兵陳國瑞來稟現已
收集所部二三百名移紮曹州郭寶昌亦收集

所部千餘名前赴曹州該二員均身受矛傷尙不甚重陳國瑞所部零星勇丁軍械不齊該總兵猶欲立時出隊以滅此賊臣又選派委員迅赴曹州一面收集馬步各隊一面諭知該總兵齊隊聽候調遣不得再行輕進復蹈前轍並調詹啟綸帶領所部及宋慶一軍由曹單取道曹州會同諾林丕勒陳國瑞等就現有兵勇自蒞

澤以北黃河南岸設法兜剿但此軍山西北前進又慮該逆東竄搶渡運河復擾山東完善現探提督劉銘傳一軍已至單縣若得此軍取道金鄉嘉祥汶上濟甯等州縣由梁山一帶黃河南岸向西兜剿使該逆不得竄突東北兩路卽不能痛加剿洗亦可偪令南奔一俟大兵會齊再圖掃除餘孽可否請

旨飭下提督劉銘傳一軍由汶上相機兜剿以收夾擊之效

同日崇厚奏言查洋槍隊官兵均紮大沽海口已飭天津鎮總兵春霖迅卽統帶剋日起程回津馳赴景州一帶聽候調遣至留津巡防兵丁查有續行挑練之天津鎮標官兵四百四十名並大沽協標存營官兵二百名及津郡原練蘆

團勇五百名現已分飭長蘆運使克明天津道
李同文大沽協副將張秉鐸督同府縣並存營
員弁勤加操練妥籌布置以期無誤操防 臣於
五月初二日帶親隨弁兵百餘名先行由津起
程取道景州前赴畿南與劉長佑體察情形會
商辦理

同日闔敬銘奏言 臣於四月三十日到省卽據

單縣鉅野鄆城等處探報賊於二十四日後屯
踞鄆鉅一帶二十七八等日猶在鄆城各村有
漸趨東北之勢查賊情叵測深慮乘官軍失利
直撲省垣是以臣兼程折回以顧根本今臣已
抵省布置而該逆四日之久未卽離曹勢甚猖
狂非厚集兵力不足制賊死命曾國藩北來尙
需時日賊勢時窺東北濟甯要地僅有丁寶楨

駐紮五營省垣亦駐紮五營兼以零星兵勇共
計無多設賊以數萬之衆繞道直衝破東北之
藩籬卽首尾難於相顧臣聞直隸提督劉銘傳
有到徐之信卽遵

旨咨催北來因汶上縣稟報賊竄至汶上河西當函
致該提督迅速探明賊蹤穩慎前行能於東平
汶上扼要處所實力嚴防俾賊不能直竄東北

力保東省完善之地卽畿疆之門戶無虞

閻敬銘又奏言此次親王僧格林沁力戰陣亡
臣身膺疆寄不能率師救援上負

朝廷下無以對該親王之忠烈痛憤自責寢食難
安伏求

皇太后

皇上將臣從重治罪以示懲儆均奏入

上命軍機大臣傳諭會國藩國瑞劉長佑吳棠彭玉麟崇厚李鴻章閻敬銘吳昌壽劉銘傳曰逆匪竄至鄆城縣西紅川口東至王家古堆南至安興木邊馬時犯曹州一路其勢甚張國瑞已派諾林丕勒等帶馬隊繞赴曹州會同成保富森保等招集馬步並調詹啟綸一軍與宋慶之軍由曹單取道曹州會合陳國瑞等前進惟成保業已拏問著卽

飭諾林丕勒富森保等馬步各軍自蒞澤以北黃河南岸設法兜剿誠恐該逆東竄搶渡運河劉銘傳一軍已至單縣著卽取道金鄉嘉祥汶上濟甯等處由梁山一帶黃河南岸向西兜剿痛挫兇鋒仍當穩紮穩進不必貪功俟大軍到齊自不難一鼓勦盡陳國瑞收集兵勇聞其連日獲有小勝所有郭寶昌勇隊均著陳國瑞統帶昨已有旨將陳

國瑞加恩免議該總兵自當知恩圖報著國瑞傳
知該總兵不可恃勇輕進再有挫衄現在曹州一
路兵力漸厚而北路尙屬空虛該總兵如能繞赴
濟甯會合丁寶楨等迎頭扼剿固屬妥善否則設
法渡河赴劉長佑軍營聽候調遣並著酌度辦理
成保近年以來帶兵殊不得力此次首先潰退僧
格林沁死難該員未受一傷偷生倖免已降旨拏

問交閩敬銘審訊著閩敬銘卽將該革員提省嚴
訊從重定擬具奏不准稍涉瞻徇其餘在事潰退
各員仍著國瑞查明叅辦崇厚已於初二日起程
取道景州前赴畿南著卽催調洋槍隊速赴景州
一路扼防仍隨時與劉長佑妥商進止以固畿南
門戶昨諭劉長佑挑宣化鎮兵備調其大同一路
能否抽調著咨商沈桂芬妥籌辦理賊氛旣有黃

運河阻隔設防較易爲力劉長佑閻敬銘吳昌壽
務當督飭文武員弁晝夜巡防不可稍涉大意曾
國藩諒已迅籌出省著卽懷遵前旨剋日北上統
率諸軍以期各將士有所稟承捻逆旣勾通水套
諸賊裹脅愈衆而行走甚速遠調勢將不及清淮
駐紮之歐陽利見張樹珊等軍及揚防之吳毓芬
一軍可以調令北來較爲迅速吳棠調赴濟甯之

趙三元礮船四十號曾否到防著吳棠迅速調派
清淮後路亦關緊要並著吳棠妥爲布置應添兵
勇著李鴻章另行抽調以作後勁彭玉麟前已到
淮相度水道著卽會同吳棠妥籌進止機宜以期
水陸均有準備劉銘傳軍餉仍著李鴻章籌解如
一時接濟不及卽由劉長佑閻敬銘妥籌解濟直
東餉項本不寬裕曾國藩所統各軍應需餉項該

大臣務與李鴻章寬爲籌備以利師行正在寄論
聞據閻敬銘奏回省布置情形賊在汶上河西請
飭劉銘傳於東平汶上扼要嚴防與本日所諭辦
法亦合著劉銘傳設法繞出賊前扼要堵剿不可
令其北犯劉銘傳所帶兵勇究有若干如兵力不
敷剿辦仍著趕緊續調所部以厚兵力前因督師
重臣在山東境內陣亡已有旨將閻敬銘先行交

部嚴加議處該撫當力顧省垣督飭將士嚴防賊
匪北竄之路毋得再有疏虞致干重咎僧格林沁
舊有馬步若干現在收集若干劉長佑所部各路
在防兵勇共有若干著國瑞劉長佑詳晰查明奏
聞

國瑞又奏言禮部侍郎銜內閣學士全順補用
總兵京營副將何建鼇均爲營中得力之員現

據該二員親兵報稱何建鰲於四月二十四日
在曹州高樓集帶隊勦賊嗣各軍敗退該員猶
督領數騎殺賊多名後被大股圍裹馬先受傷
該員遂徒步衝擊復手刃數賊力竭陣亡全順
於二十五日夜間保護僧格林沁突圍殺出十
餘里身受多傷旋與僧格林沁失散該員情急
猶裹創衝突到處尋覓遂被馬賊包在該員復

用短刀殺賊多名力竭遇害該二員素爲賊匪
所恨戰歿之時被害尤慘以致屍身無從尋覓
今據各該親兵詳陳戰狀與臣所採訪者無異
伏思該二員忠勇素著復能見危授命大節凜
然惟有仰懇

天恩將禮部侍郎銜內閣學士全順照侍郎陣亡例
補用總兵京營副將何建鼐照總兵陣亡例交

部從優議卹以慰忠魂奏入

上諭內閣曰內閣學士全順總兵何建鼇隨同僧格
林沁帶隊勦賊四月二十四日官軍在曹州中伏
失利僧格林沁陣亡該學士等身陷重圍受傷甚
重猶復短刀殺賊力竭捐軀遇害尤慘該二員從
戎數省轉戰多年功績卓著其至死不離主帥見
危授命尤屬可嘉可憫全順著加恩照尙書陣亡

例從優議卹何建鼇著加恩照提督陣亡例從優
議卹並附祀僧格林沁專祠以慰忠魂

上又諭內閣曰前因副都統翼長成保不能救護僧
格林沁業經降旨將其先行革職本日據國瑞奏
查明內閣學士全順總兵何建鼇隨同僧格林沁
死事情形其成保一員尙未據查叅因思僧格林
沁以親王督師躬冒矢石屢蹈危機該營各將弁

果能奮勇爭先不避艱險皆如全順何建鰲等何
致令統師大臣竭忠畢命總緣畏憚性成趨避計
熟遂敢玩視軍律置主帥於不顧殊堪痛恨若不
從嚴懲辦何以肅法紀而振軍心卽如成保身爲
翼長出隊時自應隨侍僧格林沁左右何以四月
二十四日夜閒衝圍接仗並無成保在內亦未身
受一傷其爲首先潰逃情節顯然成保業經革職

著卽拏問交闔敬銘嚴訊確情從重定擬毋稍寬
縱至其餘臨陣退縮及援應不力各員仍著國瑞
確切查明據實叅奏

中央
研究院
藏書

欽定勦平捻匪方略卷二百三十二 乙丑年

五月初四日 戊戌 曾國藩喬松年奏言皖省肅清

後善後各事業已次第舉行惟皖北地勢遼闊其初因地瘠民貧不能多設官吏然幅員旣廣無以控制宵小易生今幸得就蕩平急須規畫新制爲一勞永逸之計未便顧惜小費致失經久遠圖謹將條陳事宜開列於左一請添設安

廬道員以資分巡查皖省向設兩道北道分巡
鳳廬潁滁和六泗等處兼管鳳陽關南道分巡
安徽甯池太廣等處兼管蕪湖關後將安徽甯
池太廣道改爲皖南道安慶一府遂無所屬若
仍歸南道則中隔一江旣難兼顧若改隸北道
則皖北控制千里鞭長莫及查各省省會皆有
道員駐紮臣等擬請於安慶府城添設安廬道

一員分巡安慶廬州二府滁州和州兩直隸州
其原設之鳳廬潁道改爲鳳潁道分巡鳳陽潁
州二府六安泗州兩直隸州仍兼鳳陽關監督
俾得各司其職庶幾控馭旣便呼應亦靈一請
添設雒河新縣以資治理查亳州所屬之雒河
集西距亳州東距蒙城皆百里而遙蒙亳旣不
能兼顧且地濱渦河勢處極要久爲遁逃淵藪

張落刑曾踞爲老巢爲地方官政教所不及臣
等擬請於雒河集添設縣治分蒙城亳州阜陽
懷遠四邑相連之地以隸之慎選廉能之吏妥
爲撫馭以制要害至雒河旣經設縣應請

旨錫予嘉名或卽名以古之渦陽是否可行伏候

欽定一請將鳳臺縣治移至下蔡以便控扼查鳳臺
縣本從壽州分出原爲地方遼闊分設一縣而

仍與壽州同城殊爲無益查壽州城北三十里
之下蔡鎮爲沿淮極要之區地隸鳳臺臣等擬
請將鳳臺縣治移於下蔡鎮其向管之六坊地
段民人卽令撥歸壽州以一事權而清界限一
請將宿州之龍山添設遊擊以便巡緝查雒河
旣設新縣應卽就近扼要駐兵該處附近之龍
山地勢極關緊要願宿亳各營皆有防守專責

不能撥兵臣等擬請於龍山添設遊擊一員與
潁宿亳遙爲犄角聯絡聲勢用資鈐束仍歸壽
春鎮節制以上各條臣等悉心酌度實爲當務
之急向來地方添設一官必須酌裁一官以抵
之皖北無可議裁且善後情形與尋常不同區
區廉俸之增所費無幾但求有裨大局卽可爲
日後永圖惟有仰懇

天恩准其添設免其議裁出自

鴻施奏入得

旨軍機大臣會同該部妥議具奏

喬松年又奏言前接探報賊蹤由滕嶧直趨兗
濟由濟甯境內渡運河西竄該逆若循曹單舊
路而南則蒙亳又形喫重臣一面飭令駐防蒙
亳之黃鳴鐸李南華等軍嚴行扼守一面飛飭

英翰宿州之軍扼駐雒河集探有賊蹤卽行迎
擊以顧北路之防並飭張得勝所部由泗州拔
隊迴駐宿州接防以期豫爲戒備 臣惟有隨時
會商吳棠聯絡聲勢妥籌防守斷不敢稍事疏
懈奏入

上命軍機大臣傳諭曾國藩富明阿劉長佑李鴻章
喬松年吳昌壽閻敬銘劉銘傳唐訓方曰現在賊

匪盤踞曹郡蔓延鄆鉅濮范一帶勾結土匪勢燄
日張東省兵勇寡不敵衆防不勝防直隸地勢平
衍兵力未厚尤恐賊蹤竄渡黃河震驚畿輔曾國
藩接奉前次疊諭諒已籌調兵勇屆期啟行惟東
省軍情刻不可緩該大臣接奉此旨務當剋日統
帶親軍小隊輕騎就道兼程北上先就直京現有
兵力妥籌調度其江南大隊援師儘可陸續檄調

北來曾國藩聲威久著早到一日則直東人心早
定一日李鴻章所部兵勇尙多除應留防蘇省外
如尙有可調之兵務當儘數調撥揀派得力鎮將
卽日管帶由輪船迅速北上俾曾國藩抵東時卽
可歸其調遣以期無誤改勦直東豫三省地方公
事雖有本省督撫管理其各該省地方文武如遇
有關軍務應行供支調度之件遲誤及不遵調度

者卽著該大臣嚴叅治罪該大臣值此時艱斷不可意存謙抑仍辭節制三省之命致往返再有耽延兵貴神速總以兼程繞赴山東北路保固畿疆爲目前第一要務劉長佑閻敬銘亦當就現有兵力分防黃運兩河一面勦辦土匪保衛完善地方不得專待援師稍存鬆懈河套伏莽本未盡除現旣爲賊衆盤踞則該處土匪船隻均可資以渡河

劉長佑聞敬銘務須籌備礮船多撥兵弁嚴密防
守儻任賊蹤北渡必當重治該督撫之罪唐訓方
現駐省垣保定一帶守禦事宜責無旁貸著該藩
司悉心經理務須周密妥善吳昌壽前已有旨令
其出省勦賊著卽會同劉長佑嚴防河岸並檄河
北鎮道及在防兵弁加意遏守毋稍疏虞劉銘傳
已抵單縣諒可卽赴濟甯汶上一帶著酌量情形

如賊氛甚熾將全部勇丁一併由周盛波統帶北
渡陸續起程會合攻勦並著劉長佑閻敬銘審度
賊勢會商劉銘傳迅速辦理富明阿前已留於直
隸軍營此時計已行抵直東地方著卽迅速來京
直隸滄州河間及山東德州恩縣一帶向有騎馬
賊匪並著劉長佑閻敬銘派兵嚴拏毋令乘隙蠢
動告病總兵鄭魁士現在是否在宣化本籍著劉

長佑傳令該員前赴軍營助剿直隸山東河南近
賊地方卽由劉長佑閻敬銘吳昌壽飭該地方官
辦理團練堅壁清野俾賊無所掠以助兵力所不
及曾國藩一軍應需餉銀本日雖已諭戶部寬爲
籌備仍著劉長佑李鴻章閻敬銘吳昌壽協力籌
解毋令缺乏正在寄諭聞據喬松年奏報皖省近
日軍情蒙亳一帶現有黃鳴鐸李南華等軍扼守

英翰張得勝等軍分防宿州雒河集等處布置尙
屬周妥著該撫隨時會商吳棠聯絡聲勢以固邊
境

上又命軍機大臣傳諭戶部曰現在山東軍情萬緊
直隸堵剿亦屬刻不容緩該兩省庫款本不充裕
曾國藩統帶各路兵勇北來剿賊需餉尤多必須
寬爲籌備方可收飽騰之效著戶部通盤籌畫爲

直東各軍設法迅撥款項儘所撥各款一時不能
濟急卽由該部酌提庫存銀兩分別解濟庶大兵
雲集不致有短絀之虞

上諭內閣曰欽差大臣協辦大學士兩江總督一等
毅勇侯曾國藩現赴山東一帶督師勦賊所有直
隸山東河南三省旗綠各營及地方文武員弁均
著歸曾國藩節制調遣如該地方文武不遵調度

卽由該大臣指名嚴叅

同日醇郡王奕譞奏言欽奉

諭旨以賊犯山東一帶偏近畿輔令臣豫籌防範查

臣營現練馬隊官兵一千七百餘員名步隊官

兵四千九百餘員名威遠隊官兵三千餘員名

共計九千八百餘員名該官兵等所練槍箭等

技雖漸嫻熟惟人數較少設有緩急尙恐不敷

調派 臣擬調吉林黑龍江馬隊各五百名並查
有協領常海佐領特爾清阿二員曾經出師堪
以管帶擬請

飭下吉林黑龍江將軍將現調官兵照數選派配齊
軍裝器械卽飭常海等二員統帶來京訓練藉
資防剿奏入

上命軍機大臣傳諭阜保特普欽曰前因北路防剿

喫重諭阜保特普欽於吉林黑龍江挑選馬隊各
五百名馳赴直隸聽候調遣茲復據醇郡王奏神
機營所練馬隊官兵爲數尙少請飭調吉林黑龍
江馬隊各五百名並查有協領常海佐領特爾清
阿二員曾經出師堪以管帶等語現在山東賊氛
甚熾畿輔重地亟應豫籌防範神機營現練官兵
馬隊尙嫌單薄必須添調訓練著阜保特普欽再

於吉林黑龍江各挑精壯馬隊五百名配齊軍裝
器械卽派常海特爾清阿星速統帶赴京聽候神
機營調遣

同日

上諭內閣曰前因山東巡撫閻敬銘布政使丁寶楨
於所轄境內未能加意協助致僧格林沁孤軍深
入力竭捐軀業經降旨將閻敬銘等交部嚴加議

處因思檢逆上年擾及湖北境內湖廣總督官文以欽差大臣督師勦賊其時楚師兵力甚厚如果調度得宜何難將該逆就地殲除乃該督督辦日久未能使賊大受懲創僅以驅之出境爲事致令該逆得以遠颺實屬咎無可辭前任河南巡撫張之萬責任封圻吏部左侍郎毛昶熙奉命督團勦賊於逆匪竄擾河南境內未能督率兵民協同截

勦均以空言敷衍任令賊匪乘虛遠竄貽害鄰疆
以致督師重臣戰歿於陣均有應得之咎追維前
事憤懣殊深官文張之萬毛昶熙著一併交部嚴
加議處近來賊匪竄擾之地各該省督撫往往意
存畛域以驅賊出境爲了事以致此勦彼竄迄無
了期實堪痛恨嗣後各該省督撫等務當協力同
心互相策應於賊匪奔竄之路嚴密防維訂期合

力夾擊庶幾軍務日有起色儻任其奔突不能遏
截必惟各該省督撫是問言出法隨決不寬貸

初五日己亥富明阿奏言欽奉

諭旨飭臣留於直隸與劉長佑籌商堵剿當此軍事
緊急正臣子效力之時臣一息尙存自應勉竭
涓埃何敢稍存諉卸惟此時傷疾加劇行動需
人兼之精神恍惚不能自持以殘病之身膺軍

集賢堂卷之三十三
二二
務之重必致貽誤將來 臣現已行抵新城離京
僅二百餘里惟有叩懇

恩施准 臣來京趕緊就醫調理一俟骸創斂口稍可
支持卽當馳赴直隸與劉長佑妥籌商辦如直
省防堵萬分喫緊 臣一時難望速痊可否仰求
天恩另簡賢員赴直籌勦庶免貽誤戎機

富明阿又奏言現在直省防務喫緊 臣愚以爲

神機營所操之兵均已訓練成軍若能將

圓明園八旗及護軍營內外火器營健銳營等處
馬隊官兵揀選一千名

圓明園八旗擡槍兵揀選三百名護軍營擡槍兵
揀選二百名八旗漢軍鳥槍兵揀選五百名洋
槍兵揀選二百名調派出京馳赴直省堵剿必
可於事有濟是否有當伏候

聖裁 臣揚防得力將官及文武員弁均已先期給咨
令其赴部引

見如蒙

天恩准 臣來京調理所有應留應遣之人卽可就近
料理挑選原部得力之員帶赴直省以咨調遣
奏入

上命軍機大臣傳諭富明阿曰前因直東防剿緊要

諭富明阿留於直隸與劉長佑籌商堵剿昨復諭
富明阿迅卽來京該將軍現已行抵新城距京甚
近卽著遵旨來京並准其乘坐肩輿以示體恤所
請調派神機營等兵赴直並挑選揚防得力員弁
帶赴直隸之處著俟該將軍到京後再行籌辦

同日劉長佑奏言據探逆匪於四月二十六七
等日分竄鄆城范縣一帶勾結水套匪徒漸有

竄向東北之勢所有原派駐防河干兵一千名
現調回省以資防守壽張一帶僅贍候補同知
劉時霖等帶勇七百五十名甚形單弱並聞二
十七日浙江處州鎮總兵陳國瑞收集餘隊在
曹州附近地方與賊接仗獲勝臣查濮范等處
伏莽甚衆水套河汊紛歧難保無藏匿船隻更
恐潛謀濟渡爲患非輕下游山東濮范至壽張

縣屬張秋鎮一帶頗覺空虛而張秋爲黃運合
流之處河面旣窄水勢復淺當此軍務喫緊未
敢少分畛域應將策應之隊先行調赴河干協
同防堵茲擬自開州入公橋起至山東張秋鎮
止沿河北岸節節分兵駐紮以期聲勢聯絡臣
已飭副將崔福泰帶勇五百名駐紮開州之八
公橋遊擊王得魁等帶省標兵一千名駐紮開

州之清河屯署宣化鎮總兵冷慶帶標兵六百
名駐紮開州之者河寨遊擊古禮治帶兵五百
名駐紮山東濮州之古雲集廣平府知府楊統
柁督同都司高振海帶武安軍五百名駐紮山
東范縣之道口遊擊常開運帶武安軍五百名
駐紮范縣棗強縣知縣李秉衡帶勇五百名駐
紮山東壽張縣之蓮花池署通永鎮總兵陳濟

清帶標兵五百名駐紮山東壽張縣涿州營守
備李惠英帶勇五百名駐紮壽張縣之張秋鎮
並派遊擊張得祿等帶馬勇二百餘名往來哨
探以通聲息其開州八公橋迤西厯長垣至豫
疆交界地方飭大順廣道范梁帶練勇一千名
署大名鎮總兵姜國仲帶練兵一千餘名分要
駐紮協同豫東兩省防軍不分晝夜實力巡防

一遇賊蹤搶渡卽行會擊仍出示曉諭防河各鄉團聯絡官軍互相援應俾收衆志成城之效臣卽親率小隊馳赴開州就近調度第景州一帶距臣營較遠設該匪乘隙渡河我兵悉成尾追之勢當調派防清河縣油坊鎮之官兵一千名移紮景州並令副將劉祺在該州選募壯勇五百名尙恐兵力未厚擬咨商通商大臣崇厚

添調天津鎮標兵數百名一併統帶起程以壯
聲勢

劉長佑又奏言總兵陳國瑞現已移紮曹州府
城招集馬步各隊數千名以期重振軍威惟口
糧旣無所出軍火器械亦俱無存不得不量爲
接濟就近在大名府屬各縣徵存地糧項下提
銀一萬兩並籌備擡槍一百桿鳥槍二百桿配

齊火藥鎔丸設法運交該總兵以資應用奏入
上命軍機大臣傳諭國瑞劉長佑吳棠闔敬銘吳昌
壽劉銘傳曰濮范一帶伏莽甚多此時逆匪方張
裹脅勾結勢漸東趨劉長佑恐下游河防空虛飭
副將崔福泰等分帶兵勇自開州入公橋起至山
東張秋鎮止沿河北岸節節駐紮具見不分畛域
調度得宜著卽督飭在防員弁迅速進紮嚴密扼

守惟兵力尙不甚厚賊至須互相聯絡併力協助
方免疏虞張秋係黃運交匯之區深恐該逆勾結
水套賊船穿黃入運徑行北趨著劉長佑圖敬銘
籌備礮船在該處梭巡堵遏吳棠前奏有將黃河
船隻改爲礮船之議卽著揀派熟習火器水師弁
兵前赴直東軍營教練演放以資得力其運河一
帶仍著吳棠慎遵前旨速派輕利礮船駛往防堵

閩敬銘督飭丁寶楨嚴守運河毋令東渡山東省
城防守事宜及張秋鎮東南一帶運河並責成閩
敬銘實力嚴防不准稍涉疏懈劉銘傳仍遵昨日
諭旨酌量軍情將周盛波全部統帶北來會合直
東各軍相機防勦劉銘傳如已行抵濟甯卽著聯
絡丁寶楨等軍嚴扼運河以遏賊衝陳國瑞現駐
曹郡招集潰勇劉長佑籌備餉需軍械前往接濟

尙屬力顧大局仍著隨時源源籌餉解濟毋令招
集之軍再至潰散國瑞仍收集潰卒力固運河扼
賊竄擾現在東北各面布置漸密該逆無隙可乘
必將西循熟徑擾及豫疆吳昌壽務當先事豫籌
派兵越境夾擊以勦爲防使賊首尾不能相顧景
州一帶防務緊要前諭崇厚統帶洋槍隊前赴該
處扼防劉長佑當檄劉祺等軍星速到景協同防

守以厚兵力

初六日庚子國瑞奏言捻匪自竄入河套後卽盤

踞紅川口一帶邊馬時至曹州及鄆鉅交界打

糧其詹啟綸宋慶兩軍已經臣飛調剋期移營

前進先令諾林丕勒成保托倫布常星阿管帶

現有馬隊又派營總達爾濟由濟甯招集到營

馬隊四百名赴曹會同陳國瑞等步隊偏賊而

營俟詹啟綸宋慶兩軍到齊再行設法進剿五月初二日經吳棠派來礮船五十隻到濟甯運河臣因派員往汶上東平一帶驗看水勢舟師可行已飭管帶礮船之總兵趙三元參將王正標卽時駛赴戴村壩安山等處巡防使賊知我運河有備不敢窺伺偷渡其哲里木昭烏達兩盟蒙古馬隊經臣剴切曉以大義該蒙古等咸

能知感知懼各懷勇往

國瑞又奏言欽奉

諭旨飭阜保特普欽各調馬隊五百名馳赴直隸令

臣與劉長佑酌量調遣伏思軍營馬隊馬勇原有四千餘員名馬匹亦敷騎用連年征戰死亡相繼此時馬隊堪以隨勦者不過二千名臣各處採買戰馬千餘匹及山東安徽河南撫臣代

辦戰馬又數百匹無如日行百餘里馬力疲乏
多屬不堪乘騎此次挫敗官兵馬匹又去十之
二三現捻逆不下萬騎數倍官軍非有得力勁
旅勢難進剿查吉林黑龍江近來派出官兵多
以西丹充數黑龍江所派西丹雖技藝生疏乘
騎尙稱熟習吉林所派西丹在本處俱係種地
爲生不善馳驟現在河南調到之兵未見得力

傷亡逾半 臣曾詢在營之吉林黑龍江官兵據稱本處食餉官兵足敷選派合無仰懇

天恩飭下吉林黑龍江將軍此次務派久經操練食餉官兵來營以資進剿並請

飭下察哈爾都統於備調官兵內選派精壯馬隊一千名外帶餘馬一千匹綏遠城將軍於土默特選派精壯馬隊五百名外帶餘馬五百匹以資

助勦

國瑞又奏言欽奉

諭旨飭查成保現在何處並令將此次不能力就主將各員查明叅奏查此次我軍挫敗實由經旬累月人馬不能休息步隊與賊惡戰陳國瑞身受矛傷何建鼈力竭陣亡所部死傷過半殺賊亦屬最多郭寶昌步陣間有傷亡至於諾林丕

勒托倫布達爾濟等所帶吉林黑龍江及察哈爾官兵與賊鏖戰一處拌命迎勦死傷亦多成保常星阿溫德勒克西富森保所部次之親王僧格林沁力竭陣亡實由昏夜遇賊猝不及防惟成保等帶領右翼馬隊郭寶昌帶領步勇係隨僧格林沁一處紮營至夜閒保護突圍究屬失於護持况該二員素爲僧格林沁相待最優

今僧格林沁歿於王事成保並未受傷郭寶昌
僅受微傷均得無恙且郭寶昌原係陳國瑞部
將祇以官階相等不受鈐束捏報陳國瑞謀叛
重情幾至大局敗壞已革副都統成保總兵郭
寶昌應如何懲辦之處伏候

聖裁

同日吳昌壽奏言據總兵宋慶張曜等馳報四

月二十四日親王僧格林沁在曹郡城西剿賊陣亡與臣所接探報大略相同刻下統帥戰歿軍情萬緊東豫毗連考城距曹郡百里外賊騎頃刻可至所有扼紮考城之宋慶張曜等軍兵力本單勢難堵扼當飭穩紮穩守以固邊防而河朔完善賊所垂涎防河尤爲喫緊復飭河北鎮道會同湯聘珍崔廷桂各軍力扼龍門口並

檄湯聘珍分兵扼紮上下游與直省大名防兵
聯絡聲勢防賊偷渡所有船隻均行提歸北岸
僧格林沁大營逃潰兵勇奔赴省城絡繹不絕
誠恐奸人乘機滲入除布置省防城守外遴派
武職大員二人分查逃兵安插城外以期有備
無患惟查捻勢狡猾豫省兵力祇有宋慶張曜
湯聘珍蔣希夷等步隊合計不過萬人三省馬

隊可用者悉交善慶帶往僧格林沁前敵現有
馬勇亦係零星隊伍尙待歸併成營 臣所帶楚
軍四營二千三百餘人初到豫省人地生疏現
在北路屏藩止恃黃河一水 臣一面督飭河北
在防將士嚴守河隄梭巡堵禦其直東兩省河
身繚長數百里誠恐防不勝防惟有請

旨飭下直東督撫儘兩省兵力聯絡民團扼守河干

務期周而總兵陳國瑞准將軍國瑞來咨該總
兵身受重傷尙無下落儻其人尙在可否仰懇
天恩仍舊錄用責令殄滅餘氛該營軍餉並請
飭下直東各省源源接濟均奏入

上命軍機大臣傳諭國瑞劉長佑吳棠關敬銘劉銘
傳陳國瑞曰逆匪自竄入河套後仍盤踞紅川口
一帶邊馬時在鄆鉅曹州打糧國瑞前派諾林丕

勒管帶現有馬隊又派營總達爾濟由濟甯招集
到營馬隊四百名赴曹州會合陳國瑞等步隊著
卽催齊前進並飭詹啟綸宋慶兩軍相度地宜妥
慎安營力圖進剿吳棠派來礮船五十隻已到濟
甯運河國瑞派員往汶上東平驗看水勢已飭趙
三元等駛赴戴村壩安山等處實力巡防張秋一
帶黃運交匯之處尤爲緊要此項礮船恐尙不敷

分布著劉長佑閩敬銘各就現有兵力聯集民團扼要守禦嚴密梭巡吳棠仍當續派輕利礮船交黃翼升等帶赴東境交劉長佑閩敬銘擇要布置郭寶昌帶領步隊隨僧格林沁勦賊不能護持主將獨以身免且從前係陳國瑞部將輒敢有誣陷陳國瑞之事其居心殊不可問著陳國瑞卽將該革員拏解濟南交閩敬銘審辦與前日拏問之成

保一併嚴訊定擬具奏陳國瑞軍威新挫總須養
足銳氣方可勦賊斷不可恃勇輕進陳國瑞軍餉
著劉長佑閻敬銘源源接濟劉銘傳已由單縣拔
營是否已抵汶上濟甯一帶總須繞赴北路遏截
賊氛以固畿疆仍須續調全部勇丁由周盛波管
帶分起赴東以厚兵力國瑞請調察哈爾馬隊官
兵一千名並餘馬千匹及調吉林黑龍江食餉官

兵已諭阜保等照所請辦理至所請調綏遠城馬
隊該處防務正緊著毋庸議僧格林沁靈樞尙在
曹郡該郡城現有賊氛國瑞仍當派員妥爲照料
以免疏虞現在收集馬步各隊共有若干務須詳
細奏聞不准稍涉含混豫爲將來冒銷地步

上又命軍機大臣傳諭官文吳昌壽曰吳昌壽現因
河防喫緊飛檄河北鎮道會同湯聘珍崔廷桂等

軍力扼龍門口並分兵扼禁上下游與直省大名
防兵聯絡遏賊偷渡布置尙屬周妥惟直東兩省
河身縣互數百里幾於防不勝防東豫毗連之考
城處所僅有宋慶張曜等軍扼禁兵力較單亟應
籌添勁旅以資捍禦著官文懍遵前旨迅飭姜玉
順統帶所部九營星速赴豫會同吳昌壽所帶楚
軍嚴扼河防如豫省防務漸鬆姜玉順一軍應否

飭赴直豫交界地方防勦卽由吳昌壽妥籌辦理
僧格林沁軍營逃潰兵勇絡繹奔赴豫省恐有奸
宄潛跡其中該親王部下桂錫楨一起馬勇本係
降衆近日更恐與賊聯爲一氣假借官軍名目貽
害地方著吳昌壽遴派得力武職精細明幹大員
分投盤查妥爲安置毋爲逆匪煽結致滋擾害河
南省城防務及沿河要隘仍著吳昌壽督飭湯聘

珍等軍及地方文武嚴密籌防吳昌壽請飭直東
督撫聯集民團扼守河干並接濟陳國瑞軍餉已
諭劉長佑閻敬銘迅辦矣

上又命軍機大臣傳諭國瑞阿克敦布廉至曰現在
捻逆回竄山東曹州等處親王僧格林沁力戰陣
亡匪勢颺張非有得力馬隊不足以制其奔突著
國瑞卽派員前往察哈爾會合阿克敦布廉至挑

選精壯馬隊一千名並另帶餘馬一千匹派委妥員管帶前赴山東聽候調遣

上又命軍機大臣傳諭阜保特普欽曰前因北路防勦喫重諭阜保特普欽於吉林黑龍江挑選馬隊各五百名又據醇郡王奏神機營所練馬隊不敷派撥復諭續調馬隊各五百名茲據國瑞奏稱吉林黑龍江近來派出官兵多以西丹充數黑龍江

所派西丹技藝雖屬生疏乘騎尙稱熟習吉林所
派西丹在本處俱係種地不善馳驟河南已經調
到之兵未見得力傷亡逾半詢之在營吉林黑龍
江員弁據稱本處食餉官兵尙敷選派等語直東
軍情緊要必須得力勁旅前來協助方足以利攻
勦而殄寇氛著阜保特普欽將先後所調馬隊選
擇食餉官兵久經操練技藝嫻熟者如數挑齊懍

遵疊次諭旨分別派赴京師及直隸軍營毋得以
西丹老弱充數

上諭內閣曰前因副都統成保遇賊潰逃節經降旨
將成保革職拏問交閩敬銘訊擬並令國瑞將不
能力救主帥各員查明叅奏茲據國瑞奏稱查得
已革副都統成保總兵郭寶昌分帶馬步各隊均
隨僧格林沁紮營一處乃於僧格林沁接仗失利

時失於護持全身苟免殊堪痛恨除成保業經革
職拏問外郭寶昌著卽行革職拏問一併交關敬
銘嚴訊確情從重定擬具奏

欽定剿平捻匪方略卷二百三十三 乙丑年

五月初七日 辛丑 曾國藩奏言水師由浦入東一

節屢奉

諭旨飭催查水師礮船宜用於長江大川之中不宜用於岸高河窄之地岸高則大礮難於仰攻河窄則戰船難於轉旋而陸賊轉得據高俯擊自處必敗之道現據黃翼升呈稱前赴運河察看

一次計清江至濟甯七百餘里河道久淤處處
攔淺自臺莊迤北隄岸愈高河面愈狹僅容一
舟有牖二十餘處牖口陡險必須多人絞車而
上水師斷難施展等語臣查吳棠前奏所謂扼
賊於黃運之交者指黃河以南運河以東言之
也儻使運東果有數路陸兵或可兜剿而痛懲
之而該處現在並無大枝陸兵僅有親王僧格

林沁一軍而步隊太少勞勩太久其劉銘傳周
盛波等軍萬餘人則尙在運河以西

諭旨令劉銘傳徑赴直隸則又須渡黃河以北與吳
棠所稱黃運之處者均不相合臣之愚見以爲
礮船扼住運河賊無歸路仍慮偪之北竄不如
讓出運河之西驅回皖豫之界則剿辦較易爲
力而直東始可無虞至扼防黃河似可不用礮

船但嚴檄州縣禁止船泊南岸該逆卽難飛渡
如必須用礮船則黃河之船與江船之式迥殊
南人弄船與北方水性亦異似宜由山東河南
撫臣另造三板戰船分列黃運兩河畿輔可永
無捻匪之患比之臣處派船北駛轉運較便調
遣較靈是否有當恭候

聖裁侍郎彭玉麟前於四月二十三日親率三板兩

營駛赴清淮與黃翼升共籌防勦目下清淮軍
事已鬆東境又勢難兼顧臣愚以爲彭玉麟黃
翼升可不必溯流上駛應以黃翼升留駐清江
一路而以彭玉麟回駐江西一路籌防叛勇及
閩匪諸事其劉銘傳一軍亦不必遽入直隸宜
勦賊於黃河以南不宜聽賊渡黃震驚畿輔如

蒙

俞允臣卽咨商彭玉麟由浦回江馳駐湖口藉以鎮撫上游並檄行劉銘傳暫留江皖相機防勦奏

八

上命軍機大臣傳諭曾國藩曰曾國藩所籌東豫捻逆情形自係尙未接奉僧格林沁陣亡後續寄諭旨現在該逆盤踞鉅野鄆城一帶與河套之匪互相勾結匪勢狍猖北路軍情萬緊著曾國藩懍遵

疊次諭旨剋日統帶親軍兼程北上先就直東現有兵力妥籌調度以固畿輔藩籬所稱水師礮船不宜用於岸高河窄之地清江至濟甯七百餘里河道久淤自臺莊迤北隄岸愈高河面愈狹僅容一舟牖口陡險必須多人絞車而上水師斷難施展朝廷亦以河道淺窄疊諭調撥輕利礮船藉資協勦吳棠所派礮船五十號已到濟甯運河業經

國瑞調赴戴村壩等處扼守嗣後應否再行續調之處仍著曾國藩相度地宜妥爲調度黃翼升彭玉麟等軍現應駐紮何處扼要堵剿並著統籌全局相機布置勦辦此股賊匪自以設法四面合兵圍攻聚而殲之爲上策否則如該大臣所稱偏賊北竄不如讓出運河之西驅回皖豫之界勦辦較易爲力亦合機宜惟現在賊情與前迥異畿南一

帶防務萬分喫緊直東等省現有兵力甚形單薄
劉銘傳一軍雖已行抵單縣而匪衆兵單亦尙不
敷勦辦天津所練洋槍隊千五百名已由崇厚帶
赴景州駐紮曾國藩節制直東豫三省督辦勦匪
事宜責無旁貸務當星速進行調度指揮迅殲醜
類力固北路之防

同日閩敬銘奏言捻逆仍在范縣之羅家樓南

至濮州之紅川口東至鄆城之水堡集蔓延百
數十里聞賊已築圩土匪半多響應查賊在鄆
城范濮一帶已屯踞十餘日其地素多伏莽水
套本易藏奸設使煽動匪黨踞以爲巢不同窮
寇無歸愈便四出焚掠此可慮一也賊若徧踞
鄆鉅范濮之地則南走豫境便其馳騁北窺東
昌東伺濟甯擾我腹地西犯開東震動畿輔四

達平曠防不勝防所恃有黃運兩河以阻之然
使後有追軍前有河阻賊自無由偷渡今之賊
勢似又不然以黃河論之督臣劉長佑大軍嚴
布直境河岸復派軍來東會同防守並臣所派
水陸兵勇及各州縣民團互相聯絡據報賊從
濮州搶船欲渡均被兵勇民團擊退防範尙非
不嚴然均在北岸設防無兵在南岸徧勦儻賊

或紮竹筏或用漁船於水套港汊之中零星偷渡但過百數十賊則河北之民必至驚擾此可慮二也現在該逆屯踞范濮一帶根蒂未深且驟勝而驕未必卽有遠計若日久擄造船隻分我黃河之險從開濮順流入大清河舟則可藏岸則可掠由黃通運奪水路以與我爭南北必至阻梗東西亦任其踰越此可慮者三也以目

前兵勢而論直豫清淮之軍扼於三面軍勢甚壯賊不敢輕山東新挫之餘虛實爲賊所測北防旣固惟有乘虛東犯濟甯東平汶上之間運路節節淺阻濟甯以北有淺至尺許者賊若擁衆復過運河則完善之區全遭蹂躪臣是以星夜折回省城今布置羸定擬卽赴東平汶上與濟甯丁寶楨一軍聯絡嚴防惟臣勇數太單新

募之勇未曾接戰丁寶楨先分防運之勇五百
名來護省垣近據該藩司稟報提督黃翼升撥
礮船十餘隻駛至濟甯因此路運河太淺節節
啟牖放水阻礙不靈必須陸隊防護經該藩司
復撥參將莫組紳一營及曹州兵與礮船相輔
是丁寶楨之勇愈分愈少臣新募之勇亦
難分布運路二百餘里之長聞劉銘傳領軍萬

餘自應迅帶精銳數千赴直其餘各營似應紮
駐濟甯以北又前據漕臣吳棠咨總兵張樹珊
現帶七營駐紮嶧縣韓莊以南扼守清淮查韓
莊以北濟甯以南水勢得湖爲助頗形寬深賊
匪前次未能搶渡且礮船亦便展駛與濟甯以
北防河猶如防陸者不同似應分撥張樹珊三
四營迅赴東平汶上一帶若得劉銘傳張樹珊

分兵助臣及丁寶楨會合聯防俾十日半月以
內民間得以刈麥收藏則腹地生氣尙完不至
良民亦流爲盜至東昌一路經臣派東昌壽張
范縣各營兵及各勇隊共二千二百五十名朝
寇等縣添勇一千五百名礮船水師三百名兼
有副都統定安馬隊及直隸督臣劉長佑協助
防兵嚴布河干兼以搜捕土匪斷不敢緩籌北

路上塵

聖懷

閻敬銘又奏言 臣屢次行知劉銘傳張樹珊由
韓莊迅卽撥軍北來至今尙未悉行抵何處惟
濮范一帶賊踞日久土匪必多勾結直東兩省
雖有兵勇節節嚴防但皆在北岸難以施力 臣
增設礮划數十隻亦難各路兼顧 臣已飛咨國

瑞彭玉麟吳棠飭趙三元水師並續添水師三板由濟甯放牖留防運河北路若干隻並拖入黃河多隻庶河防較爲嚴固惟濟甯以北水僅數尺卽黃河自四月以來亦淺落殊甚日爲焦急

閻敬銘又奏言副將楊飛熊帶兵得力嗣至豫省屢著戰功於北方形勢亦熟聞該副將現在

湖北營中應請

飭下湖廣督臣官文檄飭楊飛熊統帶一二營籌給
行糧星夜來東聽候調遣奏入

上命軍機大臣傳諭官文國瑞劉長佑吳棠閻敬銘
劉銘傳陳國瑞曰該逆仍在范縣之羅家樓南至
濮州之紅川口東至鄆境之水堡集蔓延百數十
里築圩久踞若徧踞鄆鉅范濮之地則南走豫境

北窺東昌東伺濟甯西犯開東實有防不勝防之慮閻敬銘布置省垣麤定現擬赴東平汶上濟甯與丁寶楨一軍聯絡嚴防惟勇數太單不敷分布著吳棠卽令張樹珊分撥三四營迅赴東平汶上一帶歸閻敬銘調遣其嶧縣韓莊以南兼須有兵駐紮以防清淮一路劉銘傳仍懍遵屢次諭旨設法繞出賊前扼要堵截其周盛波全部勇丁著劉

長佑催令陸續起程繞赴濟甯汶上一帶與劉銘
傳合軍一處以厚兵力曹州兵力漸厚陳國瑞能
否馳赴濟甯與國瑞合紮一處著酌度情形辦理
濟甯一帶防務著國瑞妥籌布置黃翼升礮船十
餘隻駛至濟甯因運河水淺阻礙不靈尙須陸軍
防護與本日曾國藩所奏情形相符東省既有礮
划運掉較便著閻敬銘擇要分撥黃運兼防以期

萬全無失大名一帶防務劉長佑仍當嚴密布置
閻敬銘請調楊飛熊帶兵助剿著官文飛飭楊飛
熊統帶一二營籌給行糧星夜赴東聽候閻敬銘
調遣姜玉順九營並著催令速進

同日吏部奏言查山東巡撫閻敬銘布政使丁
寶楨於捻匪竄擾所轄境內未能加意協助致
親王僧格林沁孤軍深入力竭捐軀各有應得

之咎欽奉

諭旨均著先行交部嚴加議處應請將山東巡撫閻
敬銘布政使丁寶楨均照官員任意耽延降一
級調用私罪例上加等各議以降三級調用均
毋庸查級紀議抵再查丁寶楨前在按察使任
內因管帶馬步兵勇駐紮堂邑不思勵兵滅賊
擅議收撫經 臣部議以降三級調用毋庸查級

紀議抵於同治二年九月初一日奏奉

諭旨著加恩改爲革職留任今因捻匪竄擾未能協
勦議以降調不准抵銷應請將丁寶楨照例革
任奏入

上諭內閣曰閣敬銘丁寶楨於捻匪竄擾所轄境內
未能助勦以致督師重臣力竭捐軀咎實難辭惟
念該撫等均在東昌東平等處分帶兵勇駐紮一

時救援不及情尙可原閻敬銘著加恩改爲革職
留任丁寶楨本有革職留任處分著加恩降爲四
品頂戴仍留山東布政使之任

初八日

壬寅

戶部奏言欽奉

諭旨飭將直東各軍餉需設法籌撥現在山東軍情
緊急曾國藩統帶各路兵勇北來勦辦需餉必
多自應寬爲籌備查山東河南山西向有協解

僧格林沁軍營餉銀每月山東五萬兩河南三萬兩山西二萬兩現在曾國藩奉調來東僧營官兵統歸節制所有山東等三省原撥僧營月餉應令各該撫按月解往該督軍營再兩淮鹽釐項下原有協濟僧營月餉亦應仍令該督就近酌提惟各軍分道並進前項協款尙恐緩不濟急擬請就近在江海關稅銀內先行提銀二

十萬兩撥給北來各軍以資飽騰相應請

旨飭下江蘇巡撫如數撥解至部庫現存銀兩爲數無多若再提銀協濟直東軍餉實屬難以兼顧

查直隸旗租項下有應解京餉銀十萬兩長蘆鹽課項下有應解京餉銀三十萬兩山東地丁項下原撥京餉銀三十萬兩已據報解銀十五萬兩尙欠解銀十五萬兩現時該二省需餉孔

殷擬請令山東巡撫將該省欠解本年地丁京
餉銀十五萬兩留充該省軍糈並令直隸總督
將長蘆鹽課及旗租項下應解本年京餉內各
扣留銀五萬兩以供防剿奏入

上命軍機大臣傳諭曾國藩劉長佑李鴻章閻敬銘
沈桂芬吳昌壽劉郇膏曰直東軍務緊要曾國藩
統帶各路兵勇北來剿辦需餉甚多自應寬爲籌

備僧格林沁各營官兵現已統歸曾國藩節制所
有每月協解該營月餉山東五萬兩河南三萬兩
山西二萬兩著閻敬銘吳昌壽沈桂芬迅卽籌備
按月如數解往曾國藩軍營其兩淮鹽釐項下原
協月餉曾國藩亦可就近酌量提用惟前項協款
尙恐緩不濟急該大臣先就近在江海關稅銀內
提銀二十萬兩以資分給卽著李鴻章劉卹膏迅

速如數撥解至直東軍餉戶部無款可提難以協濟著閩敬銘於地丁項下將欠解本年京餉銀十五萬兩留充該省軍糈劉長佑卽將長蘆鹽課及旗租項下應解本年京餉內各扣留五萬兩以供防勦

初九日癸卯劉長佑奏言捻逆大股現在山東鄆

城蒞澤鉅野一帶邊馬南至曹州府城北至濮

范沿河東至鉅野嘉祥交界處所西至東明定
陶邊境每日沿河窺探或泗水入河套滋擾或
乘馬薨水試渡又於濮州汭河蘆葦中搜去民
船數隻均經在防官兵團勇隨時遏擊賊始遁
回又探有砍伐樹木排造船筏之事其爲蓄志
北犯已可概見屢經嚴飭在防將弁無分雨夜
實力巡防惟山東撫臣閻敬銘適已回省壽張

濮范一帶未免空虛直東脣齒相依不能不通
籌兼顧擬悉衆進駐河干現自直隸長垣以至
山東張秋一帶布置麤有端倪雖賊屢窺伺均
經擊退然使大股麇集數路並進在防兵勇各
守河口一時不能策應而後路又別無攔截之
軍甚屬可危必須劉銘傳一軍來直會籌防剿
庶幾緩急可恃江南水師赴東防剿此時計可

入運聞詹啟綸張曜宋慶等軍亦經國瑞調赴
濟甯陳國瑞郭寶昌等收集士卒又均在東境
戰或不足守則有餘如果嚴扼運河則省城自
可無慮頃接閩敬銘來函已奏請以劉銘傳一
軍於東平汶上扼要嚴防是東路運河之防仍
責之劉銘傳而直隸防軍旣多出省萬一曾國
藩兵自南來賊以全力北犯直隸防軍與劉銘

傳一軍俱成尾追之勢貽誤實非淺鮮惟有仰
懇

天恩仍飭劉銘傳迅速督帶所部駐紮黃河北岸直
東界上會籌防剿使賊不敢北渡更可由臣抽

撥二三千人隨同劉銘傳進剿以期盡掃狂氛
至黃河水性挾沙溜勢湍急與大江運河迥不
相同其水手僅能挽渡於駕駛礮船之進止尙

須先行試練臣已飭大順廣道范梁等各覓船
十數隻駐兵巡防一面練習開礮以資利用再
大學士祁駕藻奏保堪以差委人員如楊毓枬
劉錫穀李秉衡已調營帶勇督團段廣瀛余承
恩亦經先後奏留其餘劉秉琳等皆係直隸出
色之員或委署地方或在省當差如營中有需
人之處再行酌調奏入

上命軍機大臣傳諭曾國藩國瑞劉長佑吳棠李鴻
章喬松年閻敬銘吳昌壽劉銘傳陳國瑞曰逆匪
大股現在鄆城荷澤鉅野及濮范沿河一帶周圍
數百里盤踞勾結時圖竄渡又探有砍伐樹木排
造船筏之事該逆蓄意北渡雖經沿河防兵擊退
而兵力尙單儻大股麕集數路並進官軍卽有難
以策應之勢自應厚集兵力先固藩籬陳國瑞前

已令其馳赴濟甯第該處兵力漸集且曹州距東
明長垣甚近較赴濟尤形便捷著陳國瑞迅帶所
部卽日前赴劉長佑軍營聽候調遣曹州府城著
國瑞閻敬銘調撥兵勇妥籌兼顧至劉銘傳一軍
疊經諭令迅赴濟甯汶上助剿此時賊思北竄後
路尤應有追躡之兵著仍遵前旨迅速拔營前進
於濟甯汶上一帶或張秋鎮扼要地方實力扼守

相機進剿著閩敬銘劉長佑飛速催提到防後卽
行具奏該提督如再遲延卽著嚴叅懲辦賊旣於
蘆葦深處覓搶船隻則黃河之險與我共之非多
集水師船隻分段扼截不足以遏賊氛劉長佑現
覓船練習開礮恐尙不敷分布著再添籌船隻與
北岸陸軍犄角嚴防以資得力閩敬銘於防河船
隻並未籌添設令賊匪偵知無備駛赴下游一帶

北渡震動畿疆該撫自問當得何罪著將省城守
禦布置一定卽赴濟汶等處將黃運兩河防守及
添造礮船事宜妥籌辦理並與劉銘傳丁寶楨等
軍嚴密扼防其張樹珊一軍及周盛波全部仍著
喬松年吳棠催令卽赴東省以厚兵力現在賊氛
正熾必須謀定後戰方能重振軍聲劉銘傳陳國
瑞務當穩慎圖功不可輕進浪戰致有挫失詹啟

綸一軍仍著國瑞催令前進至張曜宋慶等軍如
能越境會剿既可杜賊竄豫之路又可與直東各
軍兩面夾擊較有裨益著吳昌壽斟酌情形妥籌
調派直東軍務喫緊會國藩務當恪遵屢次諭旨
星夜北來督兵剿賊以副委任該大臣如因陸路
行走遲滯或航海前來尤形捷速著會國藩斟酌
妥辦如業已起程則毋庸議上海所練洋槍隊並

落地開花礮仍著李鴻章迅速調集山海赴津毋
稍遲誤徐宿一帶防軍陸續北調該處防守亦不
可令其空虛著吳棠喬松年豫籌調派扼要設防

初十日甲辰國瑞奏言賊匪仍在鄆鉅一帶盤旋

此時若有一隊來營或有一軍可恃臣卽親督
進剿陳國瑞收集之勇僅有四五百名臣在濟
甯等處招集陳國瑞所部四百餘名交守備陳

瀛章帶赴曹州以佐該鎮兵力之不足復令陳國瑞徑行募補勇丁多則五千名少則三千名剋日成軍候臣調遣合無仰懇

天恩將總兵陳國瑞仍隸臣營以收臂助又令投誠勇目守備劉添福魏希元迅赴宿州等處選募勇丁三千名星夜回營有此兩隊再將招集馬步兵勇由臣妥爲整頓或可望其奮勇將事至

整軍募勇需餉甚繁幸 臣營總辦糧臺道員盧朝安等諸凡節省又兼東豫協餉源源報解辦理目前軍務尙屬敷用 臣並函咨直隸山東山西河南各督撫嗣後務將應解協餉按月接濟以維大局提督劉銘傳一軍現據報稱定於五月初八日由徐州府前進 臣復遵

旨傳知該提督迅速馳赴汶上由梁山一路進剿至

鉅野民風強悍向來匪徒充斥現在賊氛逼近
儻二麥失收伏莽勢必蠢動擬令已革山西太
原鎮總兵田在田就近在鉅野招募良民二千
名由臣發給口糧再由臣將招集勇隊撥往一
千名分紮鉅野一帶既可稍壯聲勢又可彈壓
土匪保護麥秋

國瑞又奏言欽奉

諭旨飭將僧格林沁舊有馬步若干現在收集若干
詳晰奏聞查親王僧格林沁行營諾林丕勒管
帶左翼馬隊官兵一千五百三十餘員名內兩
盟馬隊官兵四百九十餘員名成保管帶右翼
馬隊官兵八百五十餘員名又桂錫楨所帶馬
勇五百餘名常星阿等由湖北管帶馬隊九百
八十餘員名此次官軍失利經臣連日收集潰

散馬隊及現隨各帶兵官在曹在濟者左翼有
官兵八百餘員名內兩盟馬隊官兵三百五十
餘員名右翼有官兵五百餘員名常星阿等所
帶馬隊官兵七百七十餘員名共計有馬無馬
官兵二千餘員名其何建鼇原帶參將施紹恆
遊擊周隆廷守備劉添福等三營步隊勇丁共
三千九百餘名陳國瑞原帶步隊勇丁二千五

百餘名郭寶昌原帶步隊勇丁三千四百餘名
自全軍挫敗勇皆渙散現在收集施紹恆營勇
丁一千餘名周隆廷營勇丁七百四十餘名劉
添福魏希元等勇丁七百八十餘名陳國瑞一
營現已收集勇丁四百餘名連臣在濟招集該
鎮所部四百餘名約共九百餘名郭寶昌一營
現已收集勇丁一千三百餘名是此役失散馬

步兵勇爲數甚衆謹將現在收集大概數目先行奏

聞

國瑞又奏言查江南山東交界之韓莊牯口經吳棠派候補按察使張樹聲總兵張樹珊統帶七營勇丁在彼駐守自係爲力保完善起見但滕嶧一帶已爲賊匪所擾湖河情形又鬆此項

勇丁似以有用之隊紮於無用之地可否請
旨飭下張樹聲張樹珊帶領全隊就近移紮汝東一
帶嚴防運河以厚兵力

同日吳棠奏言賊蹤現在曹州距徐州之豐碭
等縣道路偏近臣營從前督兵各員惟黃開榜
陳國瑞二員堪以支持一面刻下陳國瑞旣已
留東黃開榜亦赴九江鎮總兵本任合無仰懇

天恩飭將黃開榜調赴臣營差遣委用侍郎彭玉麟
現回金陵與曾國藩籌商江面防緝事宜所派
總兵喻俊明水師尙留桃宿之間藉資鎮撫其
劉銘傳一軍已據報稱定於五月初八日自徐
起程該提督現將全部八千餘人悉數管帶北
上至清淮水師弁兵於北路黃河水性雖非熟
悉而架放礮位相機防剿其事本屬相通臣現

派曾帶水師之遊擊龔文林挑選水勇二百名
整理大礮五十位一俟齊備卽令由濟甯馳赴
直隸一面咨會劉長佑派員迎提此起礮勇並
豫備船隻以資防禦均奏入

上命軍機大臣傳諭國瑞劉長佑吳棠閻敬銘劉銘
傳陳國瑞曰據國瑞奏賊匪在鄆鉅一帶盤旋時
圖竄犯北路昨因直隸兵力甚單諭陳國瑞迅帶

所部卽日赴劉長佑軍營令劉銘傳一軍於濟甯
汶上一帶或張秋鎮扼守著國瑞劉長佑閻敬銘
懍遵昨日諭旨卽飭陳國瑞一軍統帶全部赴直
仍歸劉長佑調遣至山東地方有收集馬步兵勇
數千名並劉銘傳詹啟綸等軍又續調周盛波張
樹聲等豈尙不敷調遣陳國瑞由曹考一帶赴劉
長佑大名軍營其勢甚便兼可爲畿疆保衛國瑞

所稱此時若有一軍可恃卽親督進剿等語朝廷
豈不知賊氛甚惡亟宜剿除以清腹地惟國瑞自
度新集潰散之卒遠來疲乏之師能當此兇鋒方
張之寇否若一意進剿勢必驅之北犯國瑞其能
當此重咎耶爲今之計祇宜養精蓄銳各守本境
勿令四出滋擾或閒出輕銳奇兵多方牽制俟會
國藩大軍調集四面布置周妥漸偪漸緊方可聚

而殲旃否則俟劉銘傳到後會商進剿謀定後動以期萬全無失其募勇助剿一節尤須慎重恐有奸匪溷跡不可不慎之又慎所招潰散馬步恐數目尙有虛報必須切實稽查嚴加甄覈張樹聲等軍前已令吳棠酌撥三四營赴東國瑞請以全隊就近移紮汶東一帶嚴防運河著吳棠酌度調派劉銘傳一軍於僧格林沁未經挫敗之先卽已調

令北來何以初八日始由徐州起程究竟已抵何處著卽飛速前進赴汝上濟甯一帶相機防剿如再遲延定當重治其罪黃運河防均屬緊要劉長佑閩敬銘當懍遵疊次諭旨妥籌防範務將渡船提禁淨絕並嚴防本境伏賊暗通消息不可稍涉大意吳棠奏請調黃開榜赴營現在寔營潰勇竄擾江西銅鼓營等處黃開榜督帶兵勇赴瑞州一

帶前往勦辦正當喫緊未便令其北來至淮徐兵
單疊諭李鴻章力籌調派著吳棠咨商李鴻章迅
派得力兵弁馳赴淮徐一帶防守喻俊明水師准
其暫留桃宿鎮撫吳棠挑選水勇二百名整理大
礮五十位由濟甯馳赴直隸卽著劉長佑派員迎
提並趕緊豫備船隻俟此項礮勇到齊卽行酌量
配帶以資防禦

國瑞又奏言查四月二十四日親王僧格林沁督帶馬步各隊在曹州府迤西勦匪因我軍追賊經旬累月人馬疲乏該逆恃強很鬪衆寡莫敵以致先後敗潰及親王僧格林沁夤夜突圍又未能同心保護因而主帥力竭捐軀所有帶隊各官若不從嚴叅辦何以肅戎行而儆效尤除成保業經奉

旨革職拏問應俟撫臣聞敬銘訊明辦理外查總兵
郭寶昌隨同僧格林沁一處紮營二十四日之
役不能與賊死戰是夜突圍又不能保護主帥
實屬督隊無能厥咎較重擬請革職並革去勇
號黃馬褂暫留軍營帶罪效力正藍旗蒙古副
都統常星阿身爲翼長未能實力督隊勦賊二
十四日之役先行退走雖因衆寡不敵究屬畏

蕙無能正黃旗蒙古副都統溫德勒克西伯都
誦副都統高福係與常星阿合爲一隊同時敗
退且常星阿等擅回濟甯迨臣嚴催始行帶隊
赴曹均難辭咎常星阿擬請卽行革職並革去
勇號溫德勒克西高福均擬請交部嚴加議處
成都副都統富森保雖與常星阿同隊挫敗惟
會同成保尋獲僧格林沁忠軀尙知愧奮擬請

身... 三三三
三三三
三三三

交部議處副烏槍護軍參領奎祥副前鋒參領
倭什布充當僧格林沁戈什哈章京當該親王
突圍遇害該員等均各走失未能保護咎亦難
辭奎祥擬請革去副都統銜並革去保升烏槍
護軍參領倭什布擬請革去保升前鋒參領會
同成保管帶土默特馬隊之土默特參領委營
總烏爾圖那遜管帶吉林馬隊之佐領委營總

春壽雖均歸成保調遣惟是夜突圍未能救護
僧格林沁亦有應得之咎擬請將烏爾圖那遜
革去頭品頂戴春壽革去卽補協領福州副都
統倭和都司施紹恆會同何建鼈管帶步隊或
不肯打仗或捏故告假素聞遇敵巧避倭和擬
請降爲副參領仍歸外火器營候補施紹恆擬
請革去副將銜儘先參將仍留都司本任以上

各員均請留營帶罪圖功以觀後效儻再不知
愧奮臣卽請以軍法從事至翼長頭品協理台
吉諾林丕勒副都統托倫布察哈爾委營總達
爾濟從征數載戰功素著此次失利實由全軍
潰散獨力難支且殺賊最多所部死傷亦復不
少合無仰懇

恩施從寬免議奏入

上諭內閣曰僧格林沁前在曹州勦匪各該員隨同帶隊先後潰敗迨該親王夤夜突圍又未能同心保護以致主帥孤軍無助力竭捐軀雖因官軍追賊數月人馬疲乏賊衆兵單所致惟不能力救主帥究屬咎無可辭除總兵郭寶昌業經革職拏問外副都統常星阿著卽行革職並革去勇號溫德勒克西高福均著交部嚴加議處富森保著交部

議處副烏槍護軍參領奎祥著革去副都統銜並
革去保升烏槍護軍參領副前鋒參領倭什布著
革去保升前鋒參領委營總烏爾圖那遜著革去
頭品頂戴春壽著革去卽補協領副都統倭和著
降爲副參領仍歸外火器營候補都司施紹恆著
革去副將銜儘先參將仍留都司本任以上各員
均著准其留營帶罪勦賊以贖前愆儻再不知愧

奮卽按照軍法從事頭品協理台吉諾林丕勒副都統托倫布委營總達爾濟從征數載戰功素著此次失利實因全軍潰敗獨力難支均著從寬免議

同日掌四川道監察御史陳廷經奏言直隸河間正定深冀等府州爲京師藩籬大名順德廣平實畿疆門戶現在直防十分喫緊督臣所統

兵勇僅五千餘人不敷分布恐有顧此失彼之虞爲今之計惟有遴選妥員勸辦團練或可輔兵力之不足查有前署安徽巡撫河南布政使賈臻在皖撫時當苗逆勾結粵捻攻撲潁州該員以孤軍支持八十餘日未致淪陷其功甚偉前河南巡撫鄭元善樸實老練辦事認真以上二員可否

飭令督辦畿南團練事務其從前在籍辦團之候選
道裘德俊知縣張鏐總兵鮑雲翥守備李全有
均籍隸畿南鄉望素著以之分任辦團可期得
力奏入

上命內閣曰直隸爲畿輔重地屢諭劉長佑舉行團
練以輔兵力所不逮現在賊蹤竄抵山東曹單一
帶密邇畿南尤當認真講求以期有備無患團練

本地地方應辦之事豈容日久生懈視爲具文著劉
長佑督飭地方官吏勸諭所屬紳民實力舉行務
期官民聯爲一氣兵團相輔而行以靖畿疆而禦
外侮御史陳廷經所保之前任河南布政使賈臻
降調巡撫鄭元善候選道裘德俊知縣張鏗總兵
鮑雲翥守備李全有均著交劉長佑差委

欽定勦平捻匪方略卷二百三十四 乙丑年

五月十二日丙午暫署兩江總督江蘇巡撫李鴻

章奏言臣渥荷

恩綸暫權兩江總督篆務聞

命震悚日夜傍徨臣籍隸安徽該省係總督兼轄例
須迴避又兩江政務殷繁所屬蹂躪已久彫瘵
萬分善後事宜兵餉二端在在棘手臣才智短

集註卷之三十四
一
絀非所克勝揣分量力必應固辭惟親王僧格
林沁勦賊陣亡捻氛日熾

宵旰憂勞急盼曾國藩前往督師需人接替 臣何敢
拘泥常例引嫌避位致誤事機擬卽料理交卸
馳赴金陵暫行接印查蘇郡水陸防軍三萬餘
人均已分布各隘又援勦福建之提督郭松林
楊鼎勳兩軍共八千餘人援勦徐州淮揚之提

督黃翼升劉銘傳周盛波臬司張樹聲道員吳
毓芬等軍共二萬數千人除黃翼升李朝斌兩
枝水師係曾國藩舊部餘皆由臣募練而來各
軍餉糧軍火專指蘇滬稅釐統計每月餉需及
製造採辦各項雜支額款將近五十萬而蘇滬
稅釐及藩庫地丁牽算月入不足三十萬挪東
掩西儘力湊濟雖前敵各營時時匱乏祇以恩

義相維尙不致於譁潰 臣暫署督篆距蘇較近
所有調度兵將籌畫餉需自當引爲己責隨時
會商曾國藩照章悉心經理以期仰副

宸廑

李鴻章又奏言 臣軍由江南剿賊入手本宜水
而不宜陸各營軍火輜重視他軍尤爲繁多曾
國藩所立楚軍營制每營五百人僅用擡槍小

槍一百二十餘桿 臣軍每營則用洋槍四百餘
桿少亦三百餘桿洋藥銅帽每開一仗則須數
萬斤其開花礮隊礮具之笨重藥彈之繁尤每
出一仗則須數十巨艦裝運此非他省所能接
濟者也楚軍營規無論調援何處事勢緩急仍
守古法日行三四十里半日行路半日築營糧
藥隨帶到處可以立腳勞逸飢飽之閒將領須

節養其氣力體恤其艱苦是以用兵十餘年卒
能成功爲其能自立於不敗之地致人而不致
於人臣軍陸戰亦用此法此又非他省將帥所
能依行他軍但圖野戰不肯紮營者所能合一
者也會國藩威望忠略特出冠時仰見

聖明倚任得人惟以儒臣帶兵向未騎馬督戰又自
金陵克復東南漸就肅清所部兵將陸續裁撤

惟鮑超一軍最爲得力近又潰變嘗與臣言精
力頽憊願求退息臣方極力勸阻外省調兵各
事臣方竭力相助目下事機緊急尙未接准來
函想必仰體

聖塵剋期就道惟江西鮑超潰勇無人收拾滋蔓可
虞漳州雖已克復據郭松林楊鼎勳函稱賊必
由廣東邊界上竄江西是皖南蘇常防備益須

嚴密臣軍分防蘇境三萬餘人內水師居多不能遠調陸師僅翰林院侍講學士劉秉璋十營常鎮道潘鼎新十營總兵王永勝劉士奇等十七營尙屬大枝勁旅若南路有警卽須分投堵剿曾國藩若再商調似亦不能多派致海疆餉源重地或有疏虞昨已緘商曾國藩現在劉銘傳亦抵徐州張樹聲周盛波已抵宿遷該三軍

共一萬七千餘人合之可當一面請該大臣酌量調遣屢奉

諭旨嚴催劉銘傳繞赴直隸自應先其所急護衛畿疆惟前據該提督來函云由六安趨程二十餘日始抵徐防該軍全係步隊拔行笨滯軍裝現尙落後冒暑遠役士卒必多病憊若令飢疲逐賊轉恐損銳

臣竊料黃河寬深溜急該地方官

但將渡船收提沿河北岸分責兵練扼守多置
疑兵該逆斷難飛渡更請

特旨嚴飭該督撫於賊到地方督令郡縣各守城垣
紳民各守圩寨萬一偷渡北竄當不遽擾亂大
局曾國藩督兵繼進先聲奪人諒可驅賊他走
至制捻之策臣愚以爲非令直東皖豫各省堅
壁清野官督民團去邪扶正認真辦理則賊得

就地覓食擄人增黨爲患竟無底止非令各省
整練步隊勁旅扼要紮營伺近邀擊則賊得任
意去來徵調徒增疲乏無裨實用非令各將帥
多練馬隊則無力兜追勦辦殊難痛快東三省
騎兵尤宜趕緊添練以備北方曾國藩及臣部
各軍於北省地勢未熟賊情亦異又無馬隊可
利馳逐當徐籌變通之方庶期有濟奏入

上命軍機大臣傳諭李鴻章曰據李鴻章奏所部諸軍分防蘇境三萬餘人水師居多不能遠調陸師僅劉秉璋潘鼎新兩軍各十營王永勝劉士奇等十七營曾國藩若再商調似亦不能多派等語現在賊衆屯聚濮范鄆鉅一帶蔓延開東長境內數百里閒一片賊氛劉銘傳及張樹聲周盛波三軍雖有一萬七千餘人然合之一面則見多分之數

百里閒則見少賊匪現於黃河南岸砍伐樹株編
造木筏又於蘆葦深處覓搶船隻蓄意渡河北犯
直東沿河一帶地廣兵單防剿甚形喫緊李鴻章
仍當先其所急多派勇丁聽候會國藩調遣不得
稍分畛域直東豫三省前已有旨諭該地方官興
辦團練惟堅壁清野之舉亦非一時所能猝辦自
應厚集兵力方足以利攻剿著李鴻章迅卽多派

兵勇洋槍各隊並攜帶開花炸礮由海道北上或由膠州登岸或由天津登岸前赴直東一帶防剿不准再事遷延開花礮質雖笨重仍可由黃運兩河運載軍營應用並著該撫迅由海道運解天津以備直東軍營急需該撫既經兼署兩江督篆所有應辦事宜自當隨時會商曾國藩悉心經理

同日吳昌壽奏言捻匪竄向曹郡正北五十餘

里羅口地方分股擾及濮鄆已脅從民寨十餘處均係舊日長槍會匪紮筏造船意圖北渡是該匪銳意渡河概可想見臣先後派崔廷桂湯聘珍等軍及晏飭河北鎮道調兵集勇實力備防而北面藩籬尤慮未能周密臣先其所急定於五月初九日督帶譚仁芳四營出省並添調馬勇以助聲威渡河而北由封邱馳至滑濬一

路履勘河干察看地勢何處宜戰何處宜守何
處宜密布旌旗何處宜分添勁旅督同河北鎮
道厚集兵團並嚴飭譚仁芳湯聘珍崔廷桂等
實力防守一面與直隸督臣劉長佑山東撫臣
閻敬銘往返咨商定議會勦會防務期三省兵
力指臂相聯同心固守其考城蘭儀防勦事宜
臣已飭張曜宋慶蔣希夷等會同地方官合力

守禦 臣仍隨時察看如賊蹤南遁北岸情形較
鬆卽抽調勁旅回顧省防相機截剿

吳昌壽又奏言查黃河自河南考城縣屬之銅
瓦廂決口北行當考城之西封邱之東不過數
十里卽出豫境而東其北岸地面爲直隸之長
垣開州清豐南樂又東出直隸境爲山東之濮
州范縣陽穀壽張荏平齊河濟陽濱州利津各

州縣是黃河北岸山東地面最長直隸次之河南又次之儻賊得偷渡無論由東由直由豫厥害惟均至於北岸渡口在豫省者祇有封邱所屬之尙店現已由臣派湯聘珍崔廷桂兵勇扼守在直隸者則長垣屬之翟莊口竹林口與山東曹州府屬之菏澤定陶對峙在山東者則曹州府屬之濮州范縣又壽張屬之張秋鎮該處

水平岸狹往來遂爲官渡其上爲齊河其下爲
李連橋皆成官渡而李連橋最狹尤爲緊要其
他私渡及水淺之處未可悉數故防河以山東
爲最要而山東河防尤以齊河一帶爲最要可
否請

旨飭下兵部左郎侍崇厚迅速督帶洋槍隊前赴齊
河一帶擇要駐紮賊不得渡黃何由渡運畿南

之防自臻鞏固矣奏入

上命軍機大臣傳諭劉長佑崇厚閻敬銘吳昌壽曰
據吳昌壽奏賊竄曹郡之羅口地方分股擾及濮
鄆脅從民寨十餘處紮筏造船意圖北渡與前日
劉長佑所奏情形大略相同該撫現帶譚仁芳等
四營出省由封邱至滑濬一路親履河干察勘地
勢分別戰守所籌尙屬周妥卽著飭令派出各軍

及河北鎮道調集兵勇實力嚴防以顧北面藩籬
並可與直東各軍聯絡聲勢會同防剿其考城蘭
儀防剿事宜卽責成張曜宋慶蔣希夷等合力固
守該處距東省較近總須嚴飭該將士不分畛域
以剿爲防仍著吳昌壽遵奉前旨妥籌調派如果
賊勢西趨該撫卽抽調勁旅回顧省防相機截剿
以杜逆蹤紛竄黃河北徙後綿互河南直隸山東

地面北岸渡口豫省封邱所屬之尙店已由吳昌
壽派湯聘珍等兵勇扼守直隸山東河岸綿長雖
經劉長佑閻敬銘等調派兵勇分段設防誠恐賊
匪乘隙偷渡前經疊諭劉長佑閻敬銘添籌礮船
調集兵勇民團巡防河岸以期周密仍著該督等
懍遵疊次諭旨趕緊添造船隻演放槍礮無分晝
夜梭織巡查一面嚴飭沿河兵勇民團遇有形跡

可疑之人認真盤詰毋令奸宄溷跡偷渡前諭崇
厚統帶洋槍隊駐紮景州以固畿南之防吳昌壽
請令該侍郎駐紮齊河自係爲遠防不如近勦起
見著該侍郎斟酌情形慎籌進止如劉長佑所派
駐防景州之兵足敷扼勦崇厚亦可進紮齊河以
重河防著劉長佑崇厚妥籌具奏

十三日
丁未國瑞奏言捻股麇聚鄆城之水堡集

紅川口等處邊馬四出五月初八日據探該逆
竄至運河迤西濟甯三四十里前股已至安居
邊馬由長溝白嘴偷渡運河擾及濟甯土圍以
外當與藩司丁寶楨商酌派該營副將王心安
馮義德各帶五成隊前赴安居迎勦臣復派在
營馬隊二百餘名前往遙爲聲援是時總兵趙
三元等所帶礮船在安居一帶停泊守備陳瀛

章帶勇五百名亦在安居迤東三十里鋪暫紮
遂會同王心安等前往迎勦該逆見我軍驟至
糾合馬步來撲經王心安等會合礮船水陸迎
擊小有斬擒該逆旋卽退回數里我軍因兵力
較單未便深追刻已飛催劉銘傳迅速北上並
飛咨直隸總督將防守黃河北岸兵勇移緩就
急撥防張秋以東鹽河以固北路藩籬親王僧

格林沁靈柩暫停曹郡該處現有馬步官兵駐紮及在城文武妥爲照料可免疏虞

同日崇厚奏言景州爲直東接壤之區西連故城南宮東接德州禹城等處畿疆門戶防範宜嚴臣到景後卽將已到頭起槍隊及未到二起槍隊官兵飭令會合該處防兵相度地勢分布景州城外及距州城四十里劉智廟地方駐紮

責成春霖等一律嚴密巡防並派副將劉景芳
添募壯勇一營復飭地方官督率城鄉團練互
相聯絡鎮定人心臣擬將槍隊屯紮穩妥後卽
親統小隊取道故城臨清探明督臣行營前往
會商布置

同日陝甘總督楊岳斌奏言欽奉

諭旨飭臣馳赴直東交界地方力固畿南門戶臣軍

已抵西安自應暫行駐紮候

旨遵行 臣前在湖南所募勇丁至二月十七日始行
到齊因赴甘期迫遂於二十日卽令分隊啟行
迨抵西安始將洋槍等項漸次操演然究未經
行陣若卽令赴防竊恐未可深恃 臣擬俟續奉

諭旨卽行親統全軍前赴晉豫交界之處擇要扼紮
一面飛催蔣凝學一軍取道豫境前來會齊屆

時應赴何路勦辦再行請

旨飭遵

同日閩敬銘奏言據各路稟報賊於五月初八日由汝上開河以北搶渡運河邊馬已至甯陽西南滋陽西北大股亦卽蠶至當卽飛飭丁寶楨俟詹啟綸一軍到濟卽令防守濟甯丁寶楨迅速移軍汝上開河一路與臣聯絡設營乃數

日之間臣之勇隊未齊各路兵亦未集現在賊
之大股是否全數渡運尙未探確竊恐賊情狡
詐先分一股阻遏江南之兵復越濟甯而至甯
陽則丁寶楨一軍亦爲隔絕該匪非由甯陽趨
泰安長清之路直犯省城卽恐由東阿長清窺
伺大清河北岸臣惟有就省中現有兵力布置
城防督飭沿河各地方官沿岸防範惟張秋以

東河道延長水淺岸窄處處可虞幸直隸督臣
劉長佑不分畛域撥兵協防張秋以西臣已飛
咨劉長佑如濮范賊蹤合股東竄卽分飭各營
沿河東移並札遊擊周森藻督帶礮划上下游
駛以防竄越不得專顧一隅均奏入

上命軍機大臣傳諭官文曾國藩國瑞劉長佑李鴻
章吳昌壽閻敬銘崇厚劉銘傳陳國瑞曰捻股在

鄆城之水堡集紅川口等處驕聚四出焚擄徧勒
民圩勢甚鴟張前股已至安居邊馬由長溝等處
偷渡運河竄至濟甯土圍以外國瑞現與丁寶楨
商派副將王心安等馬步各隊會合趙三元等所
帶礮船水陸迎勦小有斬擒該逆旋即退回數里
現在運河西岸賊蹤蔓延濟甯防守甚屬喫緊閩
敬銘所稱賊由汶上開河以北搶渡運河邊馬已

至甯陽西南滋陽西北大股亦卽遷至等情是兗
州泰安屬境又有賊蹤滋擾該匪非由甯陽趨泰
安長清之路直撲省城卽恐由東阿長清窺伺大
清河北岸是省垣及張秋以東鹽河一帶又屬萬
分喫緊著國瑞督率現有兵勇與丁寶楨所部嚴
守濟甯力扼運河南岸不得以水淺爲詞任聽大
股匪衆續行搶渡汶上滋陽一帶亦著閻敬銘責

成地方文武聯絡紳團分布兵勇力籌堵扼並整頓省防以固根本力顧鹽河口岸遏賊北渡劉銘傳前已疊催迅赴濟甯汶上一帶防剿該提督竟任意遷延遲至本月初八日始由徐州起程殊堪痛恨著先行交部議處並著迅帶所部全軍星夜兼程繞由濟甯汶上以北偏向西南截剿儻再一味疲玩致誤大局必當重治其罪詹啟綸一軍仍

著國瑞闔敬銘嚴催剋日馳赴濟甯如再延誤卽
著國瑞闔敬銘嚴叅丁寶楨俟詹啟綸到濟甯後
卽帶所部回赴濟南泰安一帶相機防堵陳國瑞
一軍前諭收赴劉長佑軍營著懷遵前旨統帶馬
步各營卽日由開州東明一帶渡黃北上繞赴大
名軍營歸劉長佑調遣陳國瑞遠在曹州道路爲
賊所阻著國瑞劉長佑闔敬銘飛速傳知至黃河

北岸自張秋以東絲長數百里水淺岸窄處處可
虞東省兵力空虛情形異常危險如濮范一帶賊
蹤合股東竄劉長佑卽當分飭所部於沿河合力
夾擊或飭陳國瑞一軍於渡黃北上時移防張秋
以東沿河口岸以固直隸邊防總以布置迅速勿
分畛域爲要周森藻所帶礮划卽著閩敬銘嚴飭
實力梭巡仍恐不敷應用該撫務須添籌船礮力

顧河防昨有旨令崇厚酌量情形相機進紮齊河
此時東省鹽河一帶空虛著該侍郎酌度情形統
帶洋槍隊速赴齊河北岸防守並與該處紳團聯
絡聲勢兼顧西面張秋一帶毋稍疏虞前諭李鴻
章多撥援師由海道北上現在直東情形緊要著
該撫懷遵前旨剋日撥兵起程不必等候會國藩
檄調以致遷延時日會國藩亦當趕緊起程星速

北上以慰塵盼蔣凝學一軍本日據楊岳斌奏有
令其取道豫省赴陝之語此軍計尙未離豫省著
吳昌壽檄令該道員迅速移營由豫赴直卽著劉
長佑飛速迎提到時酌派防守沿河要隘以厚兵
力姜玉順一軍著官文迅飭起程赴豫歸吳昌壽
調遣

上又命軍機大臣傳諭楊岳斌曰捻逆蔓延濮范鄆

鉅之交時圖北竄黃河北岸防守雖經劉長佑等
分路布置而兵力尙單恐不足以制衝突楊岳斌
如能親統全軍會勦卽著取道河南徑赴直隸會
同劉長佑合兵前進保衛畿疆盡殲醜類蔣凝學
一軍本日已寄諭吳昌壽於該軍道出豫省時檄
赴直隸歸劉長佑調遣楊岳斌卽檄令該道員迅
速赴直毋稍稽遲

三十四
三十四
二
十四日戊申會國藩奏言疊奉

諭旨飭臣趕緊赴援保衛畿疆臣部署一切擬於月

內起程先赴徐州以該郡爲老營派一良將駐

紮濟甯臣亦當親赴濟甯一帶察看形勢惟僧

格林沁以督師重臣猝爾捐軀震遠近之人心

長逆賊之兇燄

朝廷責臣討賊至切且速卽山東官民亦望臣星

速北上 臣躊躇再四有萬難迅速者數端請爲

我

皇上纓旆陳之查 臣部金陵未撤之兵僅存十六營
人人思歸此次聞有山東之行皆不願北征勸
諭三日始定議裁撤者十二營北征者僅四營
又新募兩營合三千人作爲隨 臣左右之親兵
此外劉松山甯國一軍相距較近現已飛檄往

調等候劉松山前來如其部卒不願北征臣亦
不復相強當酌帶楚軍將弁另募徐州勇丁俶
臣處之營制而約束之存楚師之規模開徐兗
之風氣李鴻章所部淮勇已稍習於北方矣然
尙專食稻米不慣麥麩若徐兗閒另出勁旅則
北路數省到處相宜臣鑒於金口兵叛之禍不
敢強楚勇以遠征現僅劉銘傳周盛波兩軍歸

臣調遣淮勇雖稱勁旅人數尙少不敷分撥不得已爲此迂緩之謀添募徐方之士約須三四箇月乃能訓練成軍此其不能迅速者一也捻匪積年擄掠戰馬極多此次蒙古馬隊潰散恐亦爲賊所得現聞賊馬多至萬餘匹馳驟平原其鋒甚銳臣擬在徐州添練馬隊派員前赴古北口一帶採買戰馬千匹約計往返程途至速

亦須三月加以訓練非再得兩月斷難集事若
竟不佐以馬隊而強驅步兵以當騎賊雖有賁
育之勇亦將不戰自靡此其不能迅速者二也
扼賊北竄惟黃河天險最爲可恃防河之策自
爲目前第一要義 臣 上次摺內卽擬由河南山
東撫 臣 另造三板戰船現在事機尤緊直隸齊
豫三省均須迅速造船分列河干以壯聲勢吳

棠所奏江南之船於黃河水性不合與 臣前奏
相符所有斟酌船式採辦木料招募水勇應由
該三省督撫悉心籌畫因地制宜惟礮位一宗
北省較少金陵存留尙多 臣擬撥礮三百尊分
濟三省派船解至濟甯州由該三省派船前來
迎提黃河水師辦成畿輔可永無捻匪之患其
事雖緩其利甚大然非有四五月工夫難期就

緒此其不能迅速者三也至劉銘傳一軍不宜
遽入直隸宜勦賊於黃河以南臣於上次摺內
陳明在案茲奉節次

諭旨嚴催劉銘傳渡河徑赴劉長佑軍營果使於事
有濟自應設法北渡惟目前濮州范縣荷澤鄆
城等處黃河南岸一片賊氛若非節節掃蕩焉
能衝過北岸若使遠避賊鋒繞路行走則上游

須繞至河南蘭儀等處下游須繞至山東歷城
長清等處非迂繞五六百里不能徑行渡河且
該軍現在南岸尙可遇賊一擊若賊未北渡而
該軍先至北岸反置勁旅於無用之地似於軍
情地勢均未相宜臣昨接劉銘傳來文批令在
魚臺滕縣附近運河之處駐紮擬俟糧運稍有
把握再令進紮濟甯正籌度間接奉

諭旨飭劉銘傳由金鄉嘉祥一帶黃河南岸向西兜
勦又接國瑞來函亦欲劉銘傳在黃河南岸協
勦與臣暫不比渡之說相合以理勢揆之黃河
夏秋盛漲劉長佑親統大軍防堵河南該逆應
難飛渡不特劉銘傳目下不宜渡黃卽將來事
勢稍定亦不宜令河南之兵兼顧河北查河北
僅有直隸一省近年捻患尙少河南有齊豫蘇

皖四省近年捻患極多據 臣愚見直隸宜另籌
防禦之兵但令分守河岸齊豫蘇皖四省宜令
籌追剿之師不使馳援河北蓋楚勇淮勇向係
每日僅行四十里黃河水少萬人渡河動逾旬
日若令時而北渡時而南渡我則疲於奔命賊
則相去已遠殊爲非策此因行軍不能迅速遂
不能兼顧直隸者其一端也僧格林沁之忠勇

絕倫婦孺皆知其統兵追賊日行七八十里或百餘里不等行走太速勢不能自帶米糧埋鍋造飯行文州縣令其供支麪飯將士爭先落後飢飽不均有連日不得一餐者其隊伍難整在此其行軍迅速亦在此臣處行兵之例每日紮營支帳埋鍋造飯不向州縣索米供應略師古法日行僅四十里少或二三十里李鴻章之淮

勇亦倣楚師之法其步步穩妥在此其行軍遲
鈍亦在此僧格林沁勦辦此賊一年以來周歷
湖北安徽河南江蘇山東五省若他人接辦此
賊斷不能兼顧五省不特不能至湖北卽齊豫
蘇皖四省亦不能處處兼顧如以徐州爲老營
則山東祇能辦兗沂曹濟四府州而濟東泰臨
以北力不逮矣河南祇能辦歸陳兩府而開許

南汝以西力不逮矣江蘇祇能辦淮徐海三府
州安徽祇能辦廬鳳潁泗四府州餘皆力不逮
矣此四省十三府州者縱橫千里從古四戰之
場歷年捻匪出沒之區若以此責成督辦之臣
而以其餘責成四省之巡撫則汎地各有專屬
庶軍務漸有歸宿此賊已成流寇飄忽靡常宜
各練有定之兵乃足制無定之賊此因行軍不

能迅速遂不能徧顧各省者又其一端也方今
賢帥新隕劇寇甚張山東之望援急於星火而
臣策戰事乃在半年以後北路之最重莫如畿
輔而臣策直隸乃須另籌防兵此皆駭人聽聞
之言殆不免於物議紛騰交章責備然臣籌思
累日非專力於擒匪最熟之十三府州不足以
弭流寇之禍理合直陳芻蕘備

聖主之採擇

曾國藩又奏言臣精力頹憊不能再任艱鉅憂
經具奏在案近則衰態更增說話至一二十句
舌尖卽木強寒澀不能再說以接見人客爲苦
前聞霆營金口潰變之信憂心如焚徹夜不寐
近聞賢王鄆城殉節之信益加焦灼寸心無故
驚怖更事愈久心膽愈小公事應了之件積壓

甚多所部兵勇除霆營及已撤外餘存尙近三
萬均屬強弩之末不堪驅策本日奏疏中所稱
專力十三府州者臣自問能言之而不能行之
惟有仰懇

天恩另簡知兵大員督辦北路軍務稍寬臣之責任
臣願以閒散人員在營效力不敢置身事外忘
盡瘁之大義亦不敢久縉兵符自知將致僨事

而不豫爲一言區區愚忱伏乞

聖慈垂鑒奏入

上命軍機大臣傳諭會國藩曰前因僧格林沁在曹
郡城西殉難北路馬步諸軍總統難得其人是以
特簡會國藩馳赴山東一帶督師勦賊茲據奏稱
訓練軍士採買戰馬添造礮船勦辦不能迅速等
語統籌全局不亟亟爭旦夕之效大臣謀國自應

如此惟賊勢方熾近復搶渡運河擾及兗境若徑由張秋一帶渡河而北畿輔不免震驚於大局殊有關繫僧格林沁舊部馬隊尙有千數陳國瑞等步隊亦不下四五千入現雖暫歸國瑞統帶深恐調度不能得力而直東軍情日緊南望實切殷憂曾國藩當仍遵前旨酌帶親兵迅速起程以副委任徐州扼南北之衝濟甯州亦衝要之所卽著該

大臣擇要駐紮以一事權俾諸軍有所稟承旗綠
防兵亦不至散而無紀至督辦軍務以規畫指揮
爲上不在身臨前敵僧格林沁統兵追賊日行七
八十里或百里不等節經諭令該親王持重穩進
無如求效太速視賊太輕以致士馬俱困一敗不
振中外震駭曾國藩謀定後動朝廷並不責令剋
日奏功但須權衡緩急趕緊調派一枝勁旅扼賊

北竄以固畿輔門戶一切應辦事宜悉由該大臣
隨時酌辦直東豫三省文武官員如有不能得力
卽由該大臣隨時奏請更換亦斷不可稍存拘泥
之心至山東本省並無得力之軍足資控制節經
諭令劉銘傳統率所部由魚臺滕縣星速前進力
固北路之防毋再延緩至黃運兩河疊經責成劉
長佑闔敬銘等嚴密防範第河道紆長該兩省兵

力不敷堵勦會國藩仍當隨時咨行該督撫等妥
籌策應該大臣籌兵籌餉數載以來勤勞備至現
值事機孔急正臣子竭忠報效之時會國藩諒不
忍以精力稍衰遽辭鉅任至所稱勦辦未能迅速
不免物議紛騰交章責備所奏未免過慮朝廷用
人具有灼見理之是非自有公論豈局外無端之
毀譽所能搖惑耶